

ԷԶՄԻԱԾԻՆ



1964

ՌՆԺԳ
ԻԱՏԱՐԻ

Մայիս


ԷԶՄԻԱԾԻՆ

ՊԱՇՏՈՆԱԿԱՆ ԱՄՍԱԳԻՐ
ՀԱՅՐԱՊԵՏԱԿԱՆ ԱԹՈՌՈՅ
Ս. ԷԶՄԻԱԾՆԻ

Ե

1964





Բ Ո Վ Ա Ն Դ Ա Կ Ո Ւ Թ Յ Ո Ւ Ն

ԱՄԵՆԱՅՆ ՀԱՅՈՑ ՀԱՅՐԱՊԵՏԻ կոնդակը երջանկահիշատակ Տ. Տ. Գևորգ Զ Կարողիկոսի մահվան տասներորդ տարելիցի առթիվ	էջ 3
ԱՄԵՆԱՅՆ ՀԱՅՈՑ ՀԱՅՐԱՊԵՏԻ կոնդակը գերաշնորհ Տ. Հայկազուն արևայսկուպոս Աբրահամյանին Հեղկատանի և Հեռավոր Արևելքի հայոց բնմի հայրապետական պատվիրակ նշանակելու մասին	7
ԱՄԵՆԱՅՆ ՀԱՅՈՑ ՀԱՅՐԱՊԵՏԻ հեռագիրը ՍՍՌՄ Մինիստրների սովետի նախագահ Նիկիտա Սերգեևիչ Խրուշչովին՝ ծննդյան յոթանասնամյակի առթիվ	9
ԽՄԲԱԳՐԱԿԱՆ— Մեծագործ Կարողիկոսը	10
Փրկչի հրաշափառ և Սուրբ Հարություն տոնի առթիվ Ամենայն Հայոց Մայրազույն Պատրիարք և Կարողիկոս Նորին Սուրբ Օծուրյուն Տ. Տ. Վազգեն Ա Հայրապետի և Բույր եկեղեցիների հոգևոր պետերի միջև փոխանակված ողջույնի հեռագրերն ու գրությունները	13
Փրկչի հրաշափառ և Սուրբ Հարություն տոնի առթիվ Ամենայն Հայոց Մայրազույն Պատրիարք և Կարողիկոս Նորին Սուրբ Օծուրյուն Տ. Տ. Վազգեն Ա Հայրապետի և եվրոպական Արևելքի ու առաջնորդարանների միջև փոխանակված ողջույնի հեռագրերն ու գրությունները	18
Խոհեր Գևորգ Զ Կարողիկոսից	22
ԳԱՐԵԳՐԻ ԿԱԹՈՂԻԿՈՍ— Էջմիածնի և Կիլիկիո Արևելք	29
ՊԱՐԳԵՎ ԵՊԻՍԿՈՊՈՍ ԳԵՎՈՐԳՅԱՆ— Անժոտանայի վեհափառ	32
ՎԱՀԱՆ ՎԱՐԴԱՊԵՏ ՏՆՐՅԱՆ— Մեծագործ և հայրենասեր Հայրապետը	37
ՌՈՒՐԵՆ ՔԱՀԱՆԱ ՄԱՐՏԻՐՈՍՅԱՆ— Գևորգ Զ Կարողիկոսը և Սուրբ Էջմիածնի Հոգևոր ձեմարանի վերաբացումը	45
Վ. ՀՈՎՀԱՆՆԻՍՅԱՆ— Խոսք երախտիքի	48
Մ Ա Յ Ր Ա Թ Ո Ռ Ո Ւ Մ	49
Հ. Ճ. ՍԻՐՈՒՆԻ— Պոլիս և իր դերը	51
ԼՈՒՐԵՆ ՄԱՅՐ ՀԱՅՐԵՆԻՔԻՑ	61



**ԽՄԲԱԳՐՈՒԹՅԱՆ ՀԱՍՑԵՆ՝
ՀԱՅԿԱԿԱՆ ՍՍՌ, ԷՋՄԻԱԾԻՆ
«ԷՋՄԻԱԾԻՆ» ԱՄՍԱԳՐԻ ԽՄԲԱԳՐՈՒԹՅՈՒՆ**

Армянская ССР, Эчмиадзин, Редакция журнала «Эчмиадзин».
Rédaction de la revue „Etchmiadzine“, Etchmiadzine, Arménie, URSS.

Մայր Աթոռ Ս. Էջմիածնի տպարան, 1964 թ.

ՀՐԱՄԱՆԱԻ

Տ. Տ. ՎԱԶԳԵՆԻ ԱՌԱՋՆՈՅ

ՎԵՀԱՓԱՌ ԵՒ ՍՐԲԱԶՆԱԳՈՅՆ ԿԱԹՈՂԻԿՈՍԻ

ԱՄԵՆԱՅՆ ՀԱՅՈՑ



ԵՐԱՆԱՇՆՈՐԸ Տ. Տ. ԳԵՎՈՐԳ Զ ԿԱԹՈՂԻԿՈՍ ԱՄԵՆԱՅՆ ՀԱՅՈՑ



**ԱՄԵՆԱՅՆ ՀԱՅՈՑ ՀԱՅՐԱՊԵՏԻ ԿՈՆԴԱԿԸ
ԵՐԶԱՆԿԱՀԻՇԱՏԱԿ Տ. Տ. ԳԵՎՈՐԳ Զ ԿԱԹՈՂԻԿՈՍԻ
ՄԱՀՎԱՆ ՏԱՄՆԵՐՈՐԴ ՏԱՐԵԼԻՅԻ ԱՌԹՎ**

ՎԱԶԳԷՆ ԾԱՌԱՅ ՅԻՍՈՒՍԻ ԲՐԻՍՏՈՍԻ,
ՈՂՈՐՄՈՒԹԵԱՄԲՆ ԱՍՏՈՒԾՈՅ ԵՒ ԿԱՄՕՔՆ ԱԶԳԻՍ
ԵՊԻՍԿՈՊՈՍԱՊԵՏ ԵՒ ԿԱԹՈՂԻԿՈՍ ԱՄԵՆԱՅՆ ՀԱՅՈՑ,
ԾԱՅՐԱԳՈՅՆ ՊԱՏՐԻԱՐԶ ՀԱՄԱԶԳԱԿԱՆ ՆԱԽԱՄԵԾԱՐ
ԱԹՈՒՈՑ ԱՅՐԱՐԱՏԵԱՆ ԱՌԱՔԵԼԱԿԱՆ ՄԱՅՐ ԵԿԵՂԵՑԻՈՑ
ՍՐԲՈՑ ԿԱԹՈՒՂԻԿԷ ԷԶՄԻԱԾՆԻ

ԲՐԻՍՏՈՍԱԻԱՆԴ ՍԻՐՈՑ ՈՂԶՈՐՑՆ ԵՒ ՕՐՀՆՈՒԹԻՒՆ ՀԱՅՐԱՊԵՏԱԿԱՆ
ԿԱԹՈՂԻԿՈՍԻՆ ՄԵԾԻ ՏԱՆՆ ԿԻԼԻԿԻՈՑ Տ. Տ. ԽՈՐԵՆԱՅ ԱՌԱԶՆՈՑ,
ՊԱՏՐԻԱՐԶԻՆ ՀԱՅՈՑ ՍՐԲՈՑ ԵՐՈՒՍԱՂԵՄԱՅ Տ. ԵՂԻՇԷԻ
ԱՐԶԵՊԻՍԿՈՊՈՍԻՆ, ՊԱՏՐԻԱՐԶԻՆ ՀԱՅՈՑ ԿՈՍՏԱՆԴՆՈՒՊՈԼՍՈՑ
Տ. ՇՆՈՐՀՔԱՅ ԱՐԶԵՊԻՍԿՈՊՈՍԻՆ, ՀԱՄՕՐԷՆ ԱՐԶԵՊԻՍԿՈՊՈՍԱՅ,
ԵՊԻՍԿՈՊՈՍԱՅ, ՎԱՐԴԱՊԵՏԱՅ, ԲԱՀԱՆԱՅԻՑ ԵՒ ՍԱՐԿԱԻԱԳԱՅ,
ԹԵՄԱԿԱՆ ԵՐԵՍՓՈԽԱՆԱԿԱՆ ԺՈՂՈՎՈՑ, ԹԵՄԱԿԱՆ ԵՒ ԹԱՂԱԿԱՆ
ԽՈՐՀՐԴՈՑ ԵՒ ՊԱՇՏՕՆԷԻՑ ՀԱՅԱՍՏԱՆԵԱՅՑ ԱՌԱՔԵԼԱԿԱՆ
ԵԿԵՂԵՑԻՈՑ ՍՐԲՈՑ ԵՒ ՍԻՐԵՑԵԱԼ ՀԱՄԱՅՆ ՀԱԻԱՏԱՅԵԱԼ
ԺՈՂՈՎՐԴԵԱՆ ՀԱՅՈՑ

«Ի վախճանել առն արդարոյ, ոչ կորնչի յոյս»:
(Առակք ԺԱ 7)

Հայոց հինաւուրց աշխարհէն, եկեր ու անցեր էին օրերը ծմրան: Արարատի
լաւերժական նայուածքի տակ, Հայաստանի Մայր Հողը ծածկուեր էր կրկին ծիւ ու
կանաչով, ծաղիկ գորգերով: Հայ շինականը, աչքերը լեցուն կեանքի երազով, իր
պապերու արտն ու այգին կը բանար, գոհութեան աղօթքը ջրօններուն առ բարձ-
րեալն Աստուած, երբ Ա. Էջմիածնի կամարներուն տակ, խաղաղ, անվրդով, իր
աչքերը կը փակէր Հայրապետը Հայոց՝ Գեորգ Զ Նոր-Նախիջևանցին:

Գարնան պայծառ առաւօտ մըն էր՝ 1954 մայիս 9-ը:

Երախտագէտ Հայ Եկեղեցին և հայ ժողովուրդը ծանր սուգի դրօշ պարզեցին ու փառքով, աղօթքով, Մայր Հողին յանձնեցին յոգնած մարմինը մեծ Հայրապետին:

Այդ օրէն անցեր են արդէն տասը տարիներ:

Տարիները բազում յիշատակներ կը տանին իրենց հետ, յանձնելու համար պանոնք գիրկը գորշ մոռացութեան: Բայց կան յիշատակներ, որոնք անցնող տարիները առաւել կը լուսաւորեն, առաւել կ'արժնորեն ու կեանքի կը կոչեն: Ժամանակը ինքն է իրաւ դատաւորը մարդոց կեանքին, անոնց գործերուն: Աստուածային նախախնամութիւնը, պատմութեան դատաստանով, արդարութիւն կը գործէ:

Յիշատակը Գէորգ Զ Կաթողիկոսին այդպէս ահա կը ներկայանայ այսօր, մեր գիտակցութեան առաջ:

Անձնաւորութիւն մը, հոգիով ու մարմնով առողջ, ամրակուռ, Հայոց աշխարհի լեռներուն նման: Նկարագիր մը հպօր ու ապնիւ, խոր պզգցումով մարդկային բարոյականի բարձր արժէքներուն: Հաւատաւոր, աներեր հոգի և քաջ Հովուապետ, աւելի քան վաթսուն տարիներու հաւատարիմ ծառայութեամբ: Ուխտեալ պիտուր և սիւն Եկեղեցւոյ, և արթուն լուսարար Ս. Էջմիածնի: Ծարտար նաւապետ փոթորիկներու պահուն, անվեհեր առաջնորդ իր ժողովուրդին դէպի նաւահանգիստը խաղաղ ափերու: Պաշտպան հայրենեաց, խիպախ, աննահանջ, հալկական հոգիի մարմնացած վահան: Հայրենասէր՝ իր ամբողջ էութեամբ, բովանդակ իր կեանքով, մտածումներու և տեսիլներու իր ամբողջ աշխարհով, իր կենդանի գործով:

Ահա Ան, երիտասարդ վարդապետ, մէկ ձեռքին մէջ բռնած խաչը Զրիստոսի, միւսին՝ գիրքը հայոց պատմութեան, աւելի քան քսան տարիներ կրթական մշակ, հմուտ քարոզիչ և կազմակերպիչ հոգևոր կեանքի, իր ծննդավայր Նոր-Նախիջևանի մէջ:

Կու գան սակայն մօայլ ու ծանր օրեր: Համաշխարհային առաջին պատերազմն է բռնկած: Արևմտեան Հայաստանի մէջ կը նահատակուի ժողովուրդ մը ամբողջ: Տեղահանութիւն, սով, արիւն և մահ: Սպանդի ճիրաններէն հրաշքով փրկուած, անվերջ կարաւաններ թշուառ հայերու, կը թափուին Արաքսի ափին:

Նորապսակ Գէորգ եպիսկոպոս, հուժկու ձեռքերով և հայ մարդու արի իր սրտով, կանգնած է ամուր՝ գաղթականներու փրկութեան գործի առաջին գծերուն վրայ, կատարելով իր պարտքը իբրև անձնդիր ու բարի Հովիւ և հարապատ վաւակը հայ ժողովուրդին:

Պատերազմէն յետոյ դժուար տարիներ, ալեկոծումներ, հերոսական ճիգեր՝ բուժելու համար վէրքերը հայոց վիրաւոր ազգին և վերաշինելու քանդուած կտուրը հայ հայրենիքին: Բայց շուտով ահա խաղաղութիւն և նոր վերածնունդ, երջանիկ կեանքի պայծառ լուսաբաց: Գէորգ եպիսկոպոս, գաւապանը ձեռքին, բազում տարիներ իր ուժերը ի սպաս կը դնէ Հայ Եկեղեցւոյ ամրապնդման գործին, Վրաստան, Հայաստան և Ս. Էջմիածին: Աստուծոյ խօսքը կը քարոզէ Ան իր ժողովուրդին. կը լուսաւորէ, լոյս կը ներշնչէ ու կը մխիթարէ:

Մայր Աթոռ է Ան իբրև Տեղակալ Կաթողիկոսի, երբ կը բռնկի նոր պատերազմ մը համաշխարհային:

Հայ ժողովուրդը ամբողջ, մէկ մարդու նման, ոտքի է կանգնած, ազատատենչ եղբայրական ժողովուրդներու կողքին, մղելու համար հայրենական սրբազան կռիւ, խաւար ու դաժան չար ուժերու դէմ:

Հանգուցեալ Հայրապետը ներկայ է կրակի դիմաց, հայրենեաց պաշտպան հայ ժողովուրդի պաւակներուն հետ: Չեն մոռցուիր երբեք կոչերն իր մարտի, քարոզներն իր հուր և իր ծաւալած կազմակերպչական գործը հսկայական, պիտուրազդելու համար Հայաստանի և Սփիւռքի բոլոր հայերը: Սասունցի Դաւիթի անունը կրող հրասայլերու շարասիւնները ընծաներն են Հայոց Հայրապետին, հայրենա-

կան փառապանծ յաղթանակին համար, օժանդակութեամբը նոյնքան հայրենասէր Գարեգին Ա Հայրապետին Տանն Կիլիկիոյ, որ Սարդարաբադէն յետոյ, անգամ մը ևս իր անունը կ'արձանագրէր մեր ազգի պատմութեան գրքի մէջ ոսկի տառերով:

Եւ երբ հորիպոնէ հորիպոն, մեծ յաղթութեան շեփորները կը հնչէին, Գեորգ արքեպիսկոպոս, 1945-ի գարնան օրերուն, կ'օծուէր Կաթողիկոս Ամենայն Հայոց, ողորմութեամբն Աստուծոյ և կամքովը ազգին:

Հայոց հին երկրի վրայ կ'իջնէր նոր առաւօտ և կը բացուէր հայրենաշէն կեանքի լուսեղէն ճամբայ:

Նոր կեանքի կը կոչուէր նաև Հայ Եկեղեցին:

Ծերունապարդ Հայրապետը Հայոց, ժամանակներու, պատերազմներու աւերներէն յետոյ, Ս. Էջմիածնի կամարներուն տակ, կը ստեղծէր ամէն բան գրեթէ ոչինչէն:

Մեծ հայրենասէրը եղաւ նաև մեծ Հայրապետ:

Վերակազմեց միաբանութիւնը մեր Մայր Աթոռի, բացաւ դուռները Հոգևոր Ճեմարանին, հիմնեց «Էջմիածին» ամսագիրը, բարեկարգեց ու կազմակերպեց ներքին թեմերը, և բնականոն ու սերտ գործակցութեան կապեր հաստատեց մեր նուիրապետական Աթոռներուն և արտասահմանի մեր թեմերուն հետ:

Գեորգ Զ Կաթողիկոս, իր հոգևոր բարձր հեղինակութեան ներքև, անխռով պահպանեց հոգևոր միութիւնը Հայ Եկեղեցւոյ և միասնութիւնը հայ ժողովուրդին: Զի այդ է պատգամը հայոց պատմութեան և կամքն Աստուծոյ, որուն Միածին Որդին Հայաստան իջաւ և այնտեղ հաստատեց Սրբութիւն Սրբոցը ամենայն հայոց:

Հոգեւոյս Հայրապետը եղաւ ու մնաց մինչև իր կեանքի վերջը՝ նաև մեծ աղօթող մը և պայքարող մը վասն խաղաղութեան համայն աշխարհի: Իր հեղինակաւոր խօսքը, իր արդար ծայրը տևապէս հնչեցին հպօր Էջմիածնի սուրբ բարձունքներէն:

Գեորգ Զ Կաթողիկոսի կեանքն ու գործը մարմնացումն իսկ են աստուածային խաղաղարար կամքին ու հայոց պատմութեան հարապատ ոգիին:

Ահա վաստակը Հայոց Հայրապետին, որուն մահուան տասներորդ տարեկիցը կը կատարենք մենք այսօր:

Ով գիտէ իր կեանքն ու իր գործը ընծայաբերել իր Մայր Ժողովուրդին, իր Մայր Հայրենիքին, ով կը տեսնէ յստակ, կեանքը ալեկոծող հոսանքներուն մէջէն, ազգի ու Մայր Երկրի յաւիտենական շահերու ուղին, ան կը մնայ ճշմարտապէս մեծ և յիշատակութեան արժանի պատմութեան գրքին մէջ:

Կը տօնենք Գեորգ Զ Հայրապետի յիշատակը, իբրև Հայ Եկեղեցւոյ ու հայ ժողովուրդի յաղթանակի օր: Կը տօնենք ուրախ, հպարտ սրտերով, որ Տէրը մեր Եկեղեցիին պարգևեր էր Հովուապետ մը մեծ, նման երանեալ հայրապետներուն, որոնք պայծառ հետք են թողած Հայոց աշխարհի երկնակամարին վրայ:

Տասը տարի յետոյ, հինաւուրց մեր երկրի վրայ, կրկին իջած է գարունը կեանքին: Նոյն Արարատի յաւերժական նայուածքին ներքև, Մայր Հողն Հայաստանի վարթնած է կրկին, ու ծածկուած ծիլ ու կանաչով, վառ ծաղիկներով: Հայ շինականը նոյն երազներով, նոյն երգն իր շրթներուն, իր պապենական արտը կը հերկէ, երբ Ս. Էջմիածնի լոյս կամարներէն աղօթք կը բարձրանայ դէպի Երկինքը բարի՜ վասն խաղաղութեան հոգւոյն հանգուցեալ մեծագործ Հայրապետին մերոյ՝ Տ. Տ. Գեորգայ Զ Կաթողիկոսին Ամենայն Հայոց:

Երանաշնորհ Հայրապետի հոգին, կեանքի միւս ափին, կը հանգչի խաղաղ, կը հանգչի երջանիկ, ու կ'ոգեշնչէ մեզ և պատգամ կու տայ բոլոր հայերուս՝ ապրիլ անբաժան, սիրով միաբան, ամուր պահպանել լոյս հաւատքը մեր քրիստոնէական, ամբողջ, անխռով ու ծաղկեալ պահել Ս. Եկեղեցին, շէն, անշարժ պահել համայն հայութեան հոգևոր կեդրոն Ս. Էջմիածինը մեր, և բոլորուիլ սիրով, հաւատարմու-

թեամբ, վերածնած Մայր Հայաստանի սուրբ հողի վրայ, կերտելու համար լուսափայլ ապագան հայ ժողովուրդին:

Այսու Մեր կոնդակաւ կը հրահանգենք, որ լուսաբնակ Գէորգ Զ Կաթողիկոսի մահուան տասներորդ տարելիցին առթիւ, Հայաստանեայց բոլոր եկեղեցիներուն մէջ հոգեհանգստեան պաշտօններ կատարուին կիրակի, մայիս 10-ին:

«Երանի մեռելոցն, որք ի Տէր ննջեցին, զի գործք իւրեանց չոգան զհետ նոցա»
(Յայտնթ. ԺԴ 13):

Ողջո՛յն և փա՛ռք Գէորգ Զ մեծ Հայրապետի լոյս յիշատակին:

Ողջո՛յն և փա՛ռք Հայ Առաքելական Ս. Եկեղեցիին և հայ հաւատացեալ համայն ժողովուրդին:

Ամէն:

Կապույտ

ՏՈՒՆԻ ԿՈՆՏԱԿՏ Ի-9-Ն մայիսի
1964 Փրկչական ամի,
և ի տոմարիս Հայոց ՌՆԺԳ,
ի մայրական Սրբոյ Էջմիածնի:

ԾԱՅՐԱԳՈՅՆ ՊԱՏՐԻԱՐԷ ԵՒ ԿԱԹՈՂԻԿՈՍ
ԱՄԵՆԱՅՆ ՀԱՅՈՑ





ԱՄԵՆԱՅՆ ՀԱՅՈՑ ՀԱՅՐԱՊԵՏԻ ԿՈՆԴԱԿԸ
ԳԵՐԱՇՆՈՐՀ Տ. ՀԱՅԿԱԶՈՒՆ ԱՐՔԵՊԻՍԿՈՊՈՍ ԱՔՐԱՀԱՄՅԱՆԻՆ
ՀՆԴԿԱՍՏԱՆԻ ԵՎ ՀԵՌԱՎՈՐ ԱՐԵՎԵԼՔԻ ՀԱՅՈՑ ԹԵՄԻ
ՀԱՅՐԱՊԵՏԱԿԱՆ ՊԱՏՎԻՐԱԿ ՆՇԱՆԱԿԵԼՈՒ ՄԱՍԻՆ

Վ Ա Զ Գ Է Ն Ծ Ա Ռ Ա Յ Յ Ի Ս Ո Ւ Ս Ի Զ Ր Ի Ս Տ Ո Ս Ի,
ՈՂՈՐՄՈՒԹԵԱՄԲՆ ԱՍՏՈՒԾՈՅ ԵՒ ԿԱՄՕՔՆ ԱԶԳԻՍ
ԵՊԻՍԿՈՊՈՍԱՊԵՏ ԵՒ ԿԱԹՈՂԻԿՈՍ ԱՄԵՆԱՅՆ ՀԱՅՈՑ,
ԾԱՅՐԱԳՈՅՆ ՊԱՏՐԻԱՐՔ ՀԱՄԱԶԳԱԿԱՆ ՆԱԽԱՄԵԾԱՐ
ԱԹՈՌՈՑ ԱՅՐԱՐԱՏԵԱՆ ԱՌԱՔԵԼԱԿԱՆ ՄԱՅՐ
ԵԿԵՂԵՑԻՈՑ ՍՐԲՈՑ ԿԱԹՈՒՂԻԿԷ ԷԶՄԻԱԾՆԻ

ՊԱՏՈՒԱՐԺԱՆ ԱՆԴԱՄՈՑ ՀՆԴԿԱՅ ԱՇԽԱՐՀԻ ՀԱՅ ԵԿԵՂԵՑԱԿԱՆ
ՎԱՐՉՈՒԹԵԱՆՑ ՈՐ Ի ԿԱԼԿԱԹԱ, Ի ԲՈՄԲԷՅ ԵՒ Ի ՄԱԴՐԱՍ,
ՅԱՐԳԱՐԺԱՆ ՍՆԴԱՄՈՑ ՀԱՅԿԱԿԱՆ ԸՆԿԵՐԱԿՑՈՒԹԵԱՆ,
ՄՇԱԿՈՒԹԱՅԻՆ, ԿՐԹԱԿԱՆ, ԲԱՐԵՍԻՐԱԿԱՆ ԿԱԶՄԱԿԵՐՊՈՒԹԵԱՆՑ,
ԵՐԻՏԱՍԱՐԴԱՅ ՄԻՈՒԹԵԱՆ ԵՒ ՅՈՑԺ ՍԻՐԵՑԵԱԼ ՀՆԴԿԱՀԱՅ
ՀԱՒԱՏԱՑԵԱԼ ԺՈՂՈՎՐԴԵԱՆ ՄԵՐՈՑ, ՈՂՋՈՅՆ ՀԱՅՐԱԿԱՆ
ԵՒ ՕՐՀՆՈՒԹԻՒՆ ՀԱՅՐԱՊԵՏԱԿԱՆ

Յոյժ սիրելի է Մեզ յղել ձեզ Մեր ողջոյնը և հայրապետական օրհնութիւնը,
ամենաջերմ աղօթքներով առ Բարձրեալն Աստուած, որ ձեզ բոլորիդ պահի և պահ-
պանի երջանիկ ու խաղաղ օրերով, ձեր բարի գործերի լիակատար յաջողութեամբ.
Մենք քաջ ծանօթ ենք հնդկահայ պատուական մեր ժողովրդի փառաւոր ան-
ցեալին, ժողովուրդ, որ Նոր-Ջուղայի կրօնական սուրբ աւանդութիւնները և հայ-
րենասէր ոգին իր հետ բերեց ու հաստատեց Հնդկաց հիւրընկալ աշխարհի ափերին:
Փա՛ռք, պատի՛ւ և օրհնութի՛ւն ձեր հայրերի ու նախահայրերի անմոռաց յիշա-
տակին:

Անցեալ տարի Հնդկաստան Մեր հովուապետական ուղևորութեան առթիւ,
Մենք խորապէս հրճուեցինք հաստատելով, թէ նաև այսօր վառ են ձեր մէջ թէ՛ մեր
նախնեաց հաւատի լոյսը և թէ՛ հայրենատենչ քաղցր շունչը: Դուք հարապատ ու
հաւատարիմ որդիներն էք ձեր լուսաբնակ նախնիքների: Դուք հարապատ ու հաւա-
տարիմ վաւակներն էք հայ ժողովրդի և Մայր Աթոռ Ս. Էջմիածնի:

Ընդառաջելով ձեր և համայն մեր հաւատացեալ ժողովրդի ցանկութեանց, որ
Մեզ ներկայացրիք Մեր այցելութեան առթիւ, այսու հայրապետական կոնդակա-
նշանակում ենք գերաշնորհ Տ. Հայկապոլոն արքեպիսկոպոս Աբրահամեանին որպէս
հայրապետական պատուիրակ Հեռաւոր Արևելքի մեր թեմի, որի առաքելութիւնը կը
լինի հոգևոր մխիթարութիւն և առաջնորդութիւն ընծայել Հնդկաստանի, Աւստրա-

լիայի և Հեռաւոր Արեւելքի այլ երկրների հայ եկեղեցական կեանքին ու հաւատացեալ ժողովրդին, և, տեղական հայ եկեղեցական վարչութեանց հետ գործակցաբար, օժանդակել համայնքի հոգևոր և եկեղեցական հարցերի բարուք լուծման, ըստ Հայ Եկեղեցու կանոնների և համաձայն ձեր եկեղեցական կանոնադրութիւնների և ձեր երկրի պետական օրէնքների:

Գերաշնորհ Տ. Հայկապուն արքեպիսկոպոս Աբրահամեանը մեր Եկեղեցու պնտառոգի և ազգանուէր բարձրաստիճան հոգևորականներից մին է, որ անսահման սիրով յիշում է ձեզ և ձեր սքանչելի երկիրը, իր նախորդ այցելութեան օրերից: Վստահ ենք, որ դուք գրկաբաց և ջերմ յարգանքով կ'ընդունէք Մեր հայրապետական պատուիրակին և ամէն պայման կը ստեղծէք ու ամէն միջոց կը տրամադրէք, որ Նորին Սրբապնութիւնը առաւել յաջողութեամբ ի կատար ածի իր հոգևոր առաքելութիւնը:

Տ. Հայկապուն սրբազան արքեպիսկոպոսի և ձեր միջև սիրալիր ու շինարար գործունեության բարի լուրերը ստանալով, Մենք ևս հոգեպէս պիտի հրճուենք ու մխիթարուենք, վասնզի ձեր եկեղեցիների պայծառութիւնը, ձեր գործերի յաջողութիւնը Մեր ուրախութիւնն է և Մեր հպարտութիւնը:

Ապրեցէք և գործեցէք, գօտեպնդուած սուրբ հաւատով, սիրով միաբան ու խաղաղութեամբ:


«Եւ Աստուած խաղաղութեան և սիրոյ եղիցի ընդ ձեզ» (Բ Կորնթ. ԺԳ 11),
այժմ և յաւիտեանս: Ամէն:

Վ Ա Ջ Գ Է Ն Ա

ԾԱՅՐԱԳՈՅՆ ՊԱՏՐԻԱՐԷ ԵՒ ԿԱԹՈՂԻԿՈՍ
ԱՄԵՆԱՅՆ ՀԱՅՈՅ

Տուաւ կոնդակս ի 11-ն ապրիլի
1964 Փրկչական ամի,
և ի տունարիս Հայոց ՌՆԺԳ,
ի մայրավանս Սրբոյ Էջմիածնի:





**ԱՄԵՆԱՅՆ ՀԱՅՈՅ ՀԱՅՐԱՊԵՏԻ ՀԵՌԱԳԻՐԸ
ՍՍՌՄ ՄԻՆԻՍՏՐՆԵՐԻ ՍՈՎԵՏԻ ՆԱԽԱԳԱՀ
Ն Ի Կ Ի Տ Ա Ս Ե Ր Գ Ե Ե Վ Ի Չ Խ Ր Ո Ւ Շ Չ Ո Վ Ի Ն՝
ԾՆՆԴՅԱՆ ՅՈԹԱՆԱՍՆԱՄՅԱԿԻ ԱՌԹԻՎ**

**ՍՍՌՄ ՄԻՆԻՍՏՐՆԵՐԻ ՍՈՎԵՏԻ ՆԱԽԱԳԱՀ
Ն Ի Կ Ի Տ Ա Ս Ե Ր Գ Ե Ե Վ Ի Չ Խ Ր Ո Ւ Շ Չ Ո Վ Ի Ն**

Մ Ո Ս Կ Վ Ա, Կ Ր Ե Մ Լ

Հայ Եկեղեցու և անձամբ Մեր անունից սրտագինս շնորհավորում ենք Ձեզ
Ձեր ծննդյան 70-ամյակի և Ձեզ Սովետական Միության հերոսի բարձր կոչում շնոր-
հելու առթիվ:

Ամբողջ աշխարհի ժողովուրդները և բարի կամքի տեր մարդիկ խորապես
գնահատում են Ձեր անխնջ պայքարը հանուն խաղաղության: Ձեր եռանդուն
ջանքերը սովետական մեծ երկրի բարգավաճման և սովետական ժողովուրդների
բարօրության համար առաջ են բերում անկեղծ հիացմունք: Ամբողջ սրտով մաղ-
թում ենք Ձեզ քաջամողջություն, երկար կյանք և նոր հաջողություններ Ձեր բեղմ-
նավոր գործունեության ասպարեզում՝ մեր երկրի և սովետական ժողովուրդների
բարօրության համար:

Վ Ա Զ Գ Ե Ն Ա

**ԾԱՅՐԱԳՈՒՅՆ ՊԱՏՐԻԱՐԷ ԵՎ ԿԱԹՈՂԻԿՈՍ
ԱՄԵՆԱՅՆ ՀԱՅՈՅ**

22 ապրիլի 1964 թ.
Ս. ԷԶՄԻԱԾԻՆ





Խ Մ Բ Ա Գ Ր Ա Կ Ա Ն

Մ Ե Ծ Ա . Գ Ո Ր Ծ Կ Ա Թ Ո Ղ Ի Կ Ո Ս Ը

(1869—1954)

1964 թվականի մայիսի 9-ին լրացավ երջանկահիշատակ Ս. Տ. Գևորգ Զ Կաթողիկոսի մահվան տասը տարին:

Ազգիս Վեհափառ Հայրապետը՝ Նորին Ս. Օծուքուն Ս. Տ. Վազգեն Ա Ամենայն Հայոց Կաթողիկոսը, այս առթիվ գրած իր մայիս 9 թվակիր սրբատառ կոնդակով հրահանգում էր, որ «Լուսաբնակ Գևորգ Զ Կաթողիկոսի մահվան տասներորդ տարելիցին առթիվ, Հայաստանյայց բոլոր եկեղեցիներուն մեջ հոգեհանգստյան պաշտոններ կատարվին կիրակի, մայիս 10-ին»:

Երանաշնորհ Ս. Գևորգ Զ Կաթողիկոսը մեծ էր և միաժողով ամբողջություն որպես հոգևորական, հայրենասեր մարդ, խաղաղության մարտիկ, կրթական մշակ, կապակերպիչ և բարձր կրթության տեր անձնավորություն:

Հանգուցյալ Վեհափառը Հայաստանյայց Առաքելական Եկեղեցու պատմության նորագույն շրջանի բացառիկ և ինքնատիպ դեմքերից մեկն էր, որի կյանքն ու գործունեությունը կապված են եղել մեր ժողովրդի վերջին հիսնամյակում տեղի ունեցած պատմական խոշոր իրադարձությունների հետ:

Ավելի քան 60 երկար տարիների վրա տարածվող Նրա կրթական, վարչական, հովվական և հայրենասիրական գործունեությունը առանձնապես ուսանելի է և նշանակալից նրանով, որ լուսահոգի Հայրապետը Ս. Էջմիածնի Գևորգյան ճեմարանի գրասեղաններից մինչև Հայաստանյայց Առաքելական Եկեղեցու նվիրապետական բարձրագույն գազաթը բարձրացել է շնորհիվ իր անընկճելի հավատի, իր անձնական ու բարոյական այն հազվագյուտ շնորհների և ձիր-

քերի, որոնց խոր արմատը գտնվում է Նրան ծնունդ տվող հայ ժողովրդի հոգեկան երակներում:

Ահա թե ինչու Գևորգ Զ Կաթողիկոսը իր բովանդակ գիտակցական կյանքը, գիտությունն ու շնորհները, առանց մնացորդի, նվիրել է Ի՛ր Եկեղեցուն, Ի՛ր ժողովրդին, Ի՛ր հայրենիքին:

Վեհափառ Հայրապետը իր 9 մայիս թվակիր սրբատառ կոնդակում շատ զեղեցիկ, իրավ և ամբողջական ձևով է բնութագրել լուսահոգի Գևորգ Զ Կաթողիկոսի կյանքն ու գործունեությունը. «Անձնավորություն մը, հոգիով ու մարմնով առողջ, ամրակուռ, Հայոց աշխարհի լեռներուն նման: Նկարագիր մը հզոր ու ազնիվ, խոր պացումովը մարդկային բարոյականի բարձր արժեքներուն: Հավատավոր, աներեր հոգի և քաջ Հովվապետ, ավելի քան վաթսուն տարիներու հավատարիմ ծառայությամբ: Ուխտյալ ցինվոր և սյուն Եկեղեցվո, և արթուն լուսարար Ս. Էջմիածնի: Ճարտար նավապետ փոթորիկներու պահուն, անվեհեր առաջնորդ իր ժողովուրդին դեպի նավահանգիստը խաղաղ ափերու: Պաշտպան հայրենյաց, խիպախ, աննահանջ, հայկական հոգիի մարմնացած վահան: Հայրենասեր՝ իր ամբողջ էությունը, բովանդակ իր կյանքով, մտածումներու և տեսիլքներու իր ամբողջ աշխարհով, իր կենդանի գործով»:

Հանգուցյալ Հայրապետը ծնվել է 1869 թվականի նոյեմբերի 2-ին, Ռոստով Դոնի Նոր-Նախիջևան քաղաքում, փականագործ արհեստավորի համեստ, բայց ազգային-եկեղեցական ավանդություններով հարուստ և բարեպաշտ ընտանիքում:

Մանուկ Գևորգի կրթության գործում վճռական դեր է կատարել Հայ Եկեղեցու ոգով և ազգային դաստիարակությամբ սնված ու մեծացած նրա բարեպաշտ մայրը՝ Կատարինեն, որ իր պավին մայրական կաթի հետ, տվել է նաև եկեղեցասիրության և ազգասիրության շունչն ու ոգին:

Այնուհետև լուսահոգին սովորում է Գևորգյան ձեմարանում 1879—1889 թվականներին և իր ուսումը կատարելագործում Գերմանիայում, Լայպցիգի համալսարանում:

Ապա երանաշնորհ Հայրապետի առաջ բացվում է կյանքի և գործունեության փառավոր ուղի:

Երջանկահիշատակ Հայրապետի կյանքի բոլոր երեսներին ու գործունեության հանգրվանները եղել են արդյունավետ ու բեղմնավոր: «Ահա Ան,— գրում է Վեհափառ Հայրապետը,— մեկ ձեռքին բռնած խաչը Զրիստոսի, մյուսին՝ գիրքը հայոց պատմության», ավելի քան 60 տարիներ ծառայել է Եկեղեցուն և ժողովրդին, որպես «երիտասարդ վարդապետ», «իբրև անձնդիր ու բարի հովիվ», «նորապսակ եպիսկոպոս», «իբրև Տեղակալ Կաթողիկոսի» և իբրև «Կաթողիկոս Ամենայն Հայոց, ողորմությամբ Աստուծո և կամքովը ազգին»:

Արդարև, մեծ է լուսահոգի Կաթողիկոսի ավանդը մանավանդ Մայր Աթոռում տեղակայության օրերից սկսած Հայ Եկեղեցու կազմակերպման, Մայր Աթոռի բարգավաճման բնագավառում: Նրա կյանքն ու բեղմնավոր գործունեությունը ներշնչող օրինակ կարող են հանդիսանալ բոլոր նրանց, որոնք ուխտել են Հայ Եկեղեցու լուսեղեն խորանների առաջ ծառայել բոլորանվեր կերպով մեր ժողովրդին և մայր հայրենիքին:

Գևորգ Զ-ի գահակալությունը Լուսավորչի պատմական Աթոռի վրա նոր և խոստումնալից մի էջ բացեց Հայ Եկեղեցու պատմության նորագույն շրջանի տարեգրության մեջ:

Ծերունավարդ Հայրապետը երիտասարդի խանդավառությամբ և պատասխանատվության բարձր պզգցումով ձեռնամուխ եղավ Ամենայն Հայոց Հայրապետության առաջ կանգնած կարևոր և անհետաձգելի խնդիրների լուծմանը: Եվ լուսահոգին Հայրապետական Իր Աթոռի վրա արդարացրեց հայ ժողովրդի և Հայ Եկեղեցու Իր բարձր անձնավորության հանդեպ ցուցաբերած խոր հարգանքն ու անալյալ վստահությունը:

Երանաշնորհ Հայրապետի գահակալության տարիների գեղեցիկ արդյունքներից մեկը եղավ նաև Հայ Եկեղեցու միության և հայ ժողովրդի միաբանության գաղափարների իրագործումը: Նա Ինքը հանդիսացավ անձամբ հայ ազգային-եկեղեցական միասնության ոսկեղեն կապը Մայր

Աթոռի, նվիրապետական Աթոռների և թեմերի, Մայր Հայրենիքի և Սփյուռքի միջև:

1945 թվականի հունիսի 22-ին, Մայր Տաճարում գումարված Ազգային-եկեղեցական ժողովում արտասանած Իր ճառը եղավ պատմական. «Հայ Եկեղեցին ցարդ բարոյական տեսակետով միասնական էր, բայց իրավական տեսակետով ոչ: Տանն Կիլիկիո Վեհափառ Կաթողիկոսը, նկատի չառնելով երկար ճամբորդության հետ կապված դժվարությունները, անձամբ եկավ իբրև ուխտավոր ու ճշմարիտ ու դրական միասնականության հիմքը դրավ»:

Մայր Աթոռ Ս. Էջմիածինը և Մեծի Տանն Կիլիկիո Կաթողիկոսությունը երանաշնորհ Ս. Տ. Գևորգ Զ և Գարեգին Կաթողիկոսների օրոք իրար հետ շաղկապվեցին ավելի սերտ սիրով և եղբայրությամբ: Երկու հայրապետների սրտի, մտքի և հոգու մեծ բարեկամությունը աճեց, պտղաբերեց նրանց հովվապետության տարիներին: «Ընդունելով Ամենայն Հայոց Կաթողիկոսի գերագահ դիրքը,— գրել է լուսահոգի Գարեգին Վեհը,— կկամենայինք որ ըստ ամենայնի պահպանվեր նրանց պատշաճ հարաբերությունը ըստ պաշտոնի և կոչման... Միասնականությունը կամենում ենք իրականացած տեսնել գիտակցական, փոխադարձ հասկացողությամբ և հարգանքով կատարված պարտքերի, նպատակների և ձգտումների միության մեջ... Մենք, իբրև Կիլիկիո Հայրապետական Աթոռի Գահակալ, պատրաստ ենք Մեր կարելին բերել, հավերժացնելու ավելի սերտ, ավելի գիտակցական և միևնույն ժամանակ ավելի շրջահայաց հարաբերություն Մայր Աթոռի հետ»:

Գևորգ Զ երանաշնորհ Հայրապետը ոչ միայն մեր ազգային-եկեղեցական միասնության առաքյալն էր, այլ նաև իրավ հայրենասեր:

«Հայը, բացի Սովետական Հայաստանից, չունի այլ հայրենիք,— պատգամում էր մեծ Հայրապետը:— Հայը Հայաստանից դուրս չունի այլ հաստատուն կռվան, բայց եթե Մայր Հայրենիքը, Հայ Եկեղեցին և նրան գլխավորող Ամենայն Հայոց Հայրապետությունը, Ս. Էջմիածնի Հայրապետական Աթոռով»:

Իսկ ի՞նչ է Ս. Էջմիածնի Ամենայն Հայոց Հայրապետությունը, ըստ Լուսահոգի Հայրապետի. «Հայոց Հայրապետությունը հայի պզգյուն սիրտն է եղել, որ դարեր շարունակ ապրել է նրա անհուն ցավերով և սակավ ուրախություններով: Հայոց Հայրապետությունը հայի ստեղծող միտքն է եղել, որ լուսավորված քրիստոնեական լույսով, ստեղծել է գրականություն և գեղարվեստ՝ մեր փառքն ու պարծանքը: Հայոց Հայրապետությունը հայի ազնիվ և տոկուն կամքի արտահայտիչն է եղել, տալով առաքինության հերոսներ, աստվածային կամքի ճշմարիտ աշակերտներ: Հայոց Հայրապետությունը վեհ գաղափարների մի փունջ է, որ հյուսվել է Հա-

յոց մեծ հայրապետների ձեռքով: Եթե հիշենք հայոց հայրապետների շարքը, որպիսի՝ պատկառելի դեմքեր կտեսնենք, որոնց առաջ կխոնարհի մեր գլուխը»:

Կարելի չէ խմբագրականի այս սեղմ տողերի մեջ ընդհանուր խոսքերով բնութագրել երանաշնորհ մեծագործ Հայրապետի և մեծ հայրենասերի կյանքն ու գործունեությունը:

Արդար է ազգիս Վեհափառ Հայրապետը, երբ իր մայիս 9 թվակիր սրբատառ կոնդակում գրում է. «Կտոնենք Գևորգ Զ Հայրապետի հիշատակը, իբրև Հայ Եկեղեցվո ու հայ ժողովուրդի հաղթանակի օր: Կտոնենք ուրախ, հպարտ սրտերով, որ Տերը մեր Եկեղեցիին պարգևեր էր Հովվապետ մը մեծ, նման երանյալ հայրապետներուն, որոնք պայծառ հետք են թողած Հայոց աշխարհի երկնակամարին վրա»:

Լուսահոգի Կաթողիկոսի անունն ու գործունեությունը սերտորեն կապված են եղել նաև խաղաղության համաշխարհային շարժման կապմակերպման և մասնակցության հետ:

Պատահականություն չէր որ Հայոց լուսաբնակ Հայրապետը խաղաղության համար պայ-


քարողների առաջին շարքերում է եղել. «Հոգե-լույս Հայրապետը եղավ ու մնաց մինչև իր կյանքի վերջը՝ նաև մեծ աղոթող մը և պայքարող մը վասն խաղաղության համայն աշխարհի: Իր հեղինակավոր խոսքը, իր արդար ծայր տևապես հնչեցին հպոր՝ Էջմիածնի սուրբ բարձունքներեն: Գևորգ Զ Կաթողիկոսի կյանքն ու գործը մարմնացումն իսկ են աստվածային խաղաղարար կամքին ու հայոց պատմության հաղապատ ոգիին», — գրում է Վեհափառ Հայրապետը:

«Սիրեցեք Էջմիածինը... և ինձ հիշեցեք...»: Լուսահոգի Հայրապետի սրբական կտակն է այս:

Գևորգ Զ Կաթողիկոսը կենդանի է մեր կյանքում, Մայր Աթոռում, Հայ Եկեղեցու ծոցում, իր պալակաների և ժողովրդի հոգիների մեջ, և Նրա անունն ու գործը մնայուն ու անմահ հայոց պատմության էջերում որպես մեծագործ Կաթողիկոսի, մեծ հայրենասիրի և ճշմարիտ կայ մարդու:

«Երանի՛ որ ունիցի յիշատակ ի Ս. Էջմիածին»:





ՓՐԿԶԻ ՀՐԱՇԱՓԱՌԻ ԵՎ ՍՈՒՐԲ ՀԱՐՈՒԹՅԱՆ ՏՈՆԻ ԱՌԹԻՎ
ԱՄԵՆԱՅՆ ՀԱՅՈՑ ԾԱՅՐԱԳՈՒՅՆ ՊԱՏՐԻԱՐԶ
ԵՎ ԿԱԹՈՂԻԿՈՍ ՆՈՐԻՆ ՍՈՒՐԲ ՕԾՈՒԹՅՈՒՆ
Տ. Տ. ՎԱԶԳԵՆ Ա ՀԱՅՐԱՊԵՏԻ
ԵՎ ԲՈՒՅՐ ԵԿԵՂԵՑԻՆԵՐԻ ՀՈԳԵՎՈՐ ՊԵՏԵՐԻ ՄԻՋԵՎ
ՓՈԽԱՆԱԿՎԱԾ ՈՂՋՈՒՅՆԻ ՀԵՌԱԳՐԵՐՆ
ՈՒ ԳՐՈՒԹՅՈՒՆՆԵՐԸ

Հռոմեական Կաթոլիկ Եկեղեցու Բաժանայապետ Նորին Սրբություն

Տ. Տ. ՊԱՎՂՈՍ Զ ՊԱՊԻՆ (Հռոմ),

Կոստանդնուպոլսի Տիեզերական Պատրիարք Նորին Սրբություն

ԱԹԵՆԱԳՈՐԱՍԻՆ (Ստամբուլ),

Մոսկվայի և համայն Ռուսիո Պատրիարք Նորին Սրբություն

ԱԼԵՔՍԻԻՆ (Մոսկվա),

Ալեքսանդրիայի և համայն Աֆրիկայի Պատրիարք Նորին Սրբություն

ՔՐԻՍՏԱՓՈՐ Բ-ին (Ալեքսանդրիա),

Անտիոքի և համայն Արևելքի Պատրիարք Նորին Սրբություն

ԹԵՈԴՈՍԻՈՍ Զ-ին (Դամասկոս),

Երուսաղեմի Հունաց Պատրիարք Նորին Սրբություն

ԲԵՆԵԴԻԿՏՈՍԻՆ (Երուսաղեմ),

Անտիոքի Պատրիարք Նորին Սրբություն

ԻԳՆԱՏԻՈՍ ՅԱԿՈԲ Գ-ին (Դամասկոս),

Համայն Վրաց Պատրիարք-Կաթողիկոս Նորին Սրբություն

ԵՓՐԵՄ Բ-ին (Թբիլիսի),

Քենտրբերիի Արքեպիսկոպոս, համայն Անգլիայի Եպիսկոպոսապետ և Միտրոպոլիսի

Նորին Սրբություն դոկտ. ՄԱՅԶԼ ՌԵՄՋԻՆ (Լոնդոն),

Ռումինական Օրթոդոքս Եկեղեցու Պատրիարք Նորին Սրբություն

ՀՈՒՍՏԻՆԻԱՆԻՆ (Բուխարեստ),

Բուլղարական Օրթոդոքս Եկեղեցու Պատրիարք Նորին Սրբություն

ԿՅՈՒՐԵՂԻՆ (Սոֆիա),

Սերբիայի և համայն Հարավսլավիայի Պատրիարք Նորին Սրբություն
 ՀԵՐՄԱՆԻՆ (Բելգրադ),
 Չեխոսլովակյան Եկեղեցու Պատրիարք Նորին Սրբություն
 ղուկտ. ՄԻՐՈՍԼԱՎ ՆՈՎԱԿԻՆ (Պրագա),
 Աթենքի և համայն Հելլադայի Միտրոպոլիտ Նորին Սրբություն
 ԽՐԻՍՈՍՏՈՄՈՍԻՆ (Աթենք),
 Կիպրոսի Արքեպիսկոպոս Նորին Սրբություն ՄԱԿԱՐԻՈՍԻՆ (Նիկոպիա),
 Ղպտի Ուղղափառ Եկեղեցու Պատրիարք Նորին Սրբություն
 Աբունա ԿՅՈՒՐԵՂ Բ-ին (Ալեքսանդրիա),
 Համայն Եթովպիայի Պատրիարք Նորին Սրբություն
 Աբունա ԲԱՍԻԼԻՈՍԻՆ (Ադդիս-Աբեբա),
 Հնդկաստանի և Արևելքի Մալաբար Եկեղեցու Կաթողիկոս Նորին Սրբություն
 ՏԻՄՈԹԵՈՍԻՆ (Կերալա),
 Հայ Կաթողիկե Եկեղեցու Պատրիարք Նորին Ամենապատվություն
 Ի ԳՆԱՏԻՈՍ ՊԵՏՐՈՍ ՊԱԹԱՆՅԱՆԻՆ (Բեյրութ),
 Արևմտյան Նյու-Յորքի Եպիսկոպոսական Եկեղեցու Առաջնորդ
 ԼՈՐԻՍՏՈՆ ԼԵՎԻՆ ԳՍՏՈՆ ՍԶԵՅՅ Եպիսկոպոսին
 (Նյու-Յորք),
 ԱՄՆ-ում Բրիստոսի Եկեղեցիների Ազգային Խորհրդի Նախագահ
 Գերարժանապատիվ Հայր Ժ. ԻՐՎԻՆ ՄՅՈՒԼԼԵՐԻՆ (Նյու-Յորք),
 Լատվիական ՍՍՌ Ավետարանական-Լուծերական Եկեղեցու Արքեպիսկոպոս
 Նորին Սրբապետություն ԳՈՒՍՏԱՎ ՏՈՒՐՍԻՆ (Ռիգա),
 Էստոնական ՍՍՌ Ավետարանական-Լուծերական Եկեղեցու Արքեպիսկոպոս
 Նորին Սրբապետություն ՅԱՆ ԿԻՅՎԻՏԻՆ (Տալլին),
 Միխիթարյան Ուխտի Աբբահայր Գերհարգելի Հայր ՍՐԱՊԻՈՆ
 Վարդապետ ՈՒԼՈՒՀՈՃՅԱՆԻՆ (Վենետիկ),
 Միխիթարյան Ուխտի Աբբահայր Գերապայծառ Հայր ՄԵՍՐՈՊ
 Վարդապետ ՀԱՊՈՋՅԱՆԻՆ (Վիեննա),
 Ֆրանչիսկյան Միաբանության Կուստոդ
 Հ. ԼԻՆՈՒՍ ԳՈԲԵԼԼԻՆԻՆ (Երուսաղեմ),
 Եկեղեցիների համաշխարհային խորհրդի ընդհանուր քարտուղար
 ղուկտ. ՎԻԼՅԱՄ ՎԻՍՍԵՐ ԴԼՈՒՅՏԻՆ (ժընև):

Բրիստոսի հրաշափառ հարության ավետիսը ուրախությամբ կլեցնե մեր հուսացյալ սրտերը, քի Աստուծո Որդին «յարեաւ ի մեռելոց և յարութեամբն իւրով մեզ վկեանս պարգևեաց»:

Մեր սիրտն ալ լեցուն այս սուրբ ուրախությամբ, Ս. Էջմիածնէն, Մենք կրենք Մեր սիրո ողջույնները Ձեզ, ինչպես նաև Ձեր Ս. Եկեղեցիին, աղոթելով առ Աստված, որ ՎՁեզ և Ձեր Ս. Եկեղեցին պահե խաղաղությամբ իր ապահով հովանիին ներքև:

Հարուցյալ Փրկչի շնորհներով թող առավել ամրապնդվի նաև խաղաղությունը ամբողջ աշխարհի և եղբայրությունը ի մեջ եկեղեցյաց և ժողովուրդոց:

«Բրիստոս յարեաւ ի մեռելոց»:

Եղբայրական սիրով՝

ՎԱԶԳԵՆ Ա

ԾԱՅՐԱԳՈՒԹՅ ՊԱՏՐԻԱՐԷ ԵՎ ԿԱԹՈՂԻԿՈՍ
 ԱՄԵՆԱՅՆ ՀԱՅՈՑ

Ս. ԷԶՄԻԱԾԻՆ

ՆՈՐԻՆ ՍՐԲՈՒԹՅՈՒՆ Տ. Տ. ՎԱԶԳԵՆ Ա,
ԾԱՅՐԱԳՈՒՅՆ ՊԱՏՐԻԱՐԶ ԵՎ ԿԱԹՈՂԻԿՈՍ ԱՄԵՆԱՅՆ ՀԱՅՈՑ

ԷԶՄԻԱԾԻՆ

«Արդարև Բրիստոս յարեալ ի մեռելոց: Դու յաղթական և թագաւոր, գթա մեզ»:

Ս. Զատիկի տոնի առթիւ, ուրախությամբ և հաճույքով ստացել ենք Ձեր սիրալիւր ռոջույնի պատգամը, որի համար Ձերդ Սրբության հայտնում ենք Մեր սրտագին երախտագիտությունը:

Շնորհակալություն ենք հայտնում Ձերդ Սրբության՝ Մեզ և Մեր հավատացյալների համար կատարած Ձեր աղոթքների համար, և փոխադարձաբար Մենք ևս հայցում ենք Բարձրալիւր Վատկական շնորհների և բարիքների առատություն Ձեզ և Ձեր Եկեղեցու անդամների համար:

«Բրիստոս յարեալ ի մեռելոց: Օրհնեալ է յարութիւնն Բրիստոսի»:

ՔԱՂԱՐ ՎԱՏԻԿԱՆ

ՊԱՊ ՊՈՂՈՍ Զ

«Բրիստոս յարեալ ի մեռելոց»:

Ընդունեցե՛ք մեր սրտագին ռոջույնները Բրիստոսի հրաշափառ հարության տոնի առթիւ:

Թո՛ղ Տիրոջ հոգևոր ուրախությունն ու սերը առաջնորդեն մեզ հավիտենական կյանքի հույսով, Նրա երկնային արքայության համար:

Թո՛ղ Տերը մեզ օրհնի և պահպանի այդ սուրբ ուրախությունն ու սերը մեր սրտերի մեջ մեր ամբողջ կյանքի օրերում, որպեսզի քարոզությամբ և օրինակելի գործով տարածենք Նրա սուրբ անունը մեր սերունդների մեջ, որոնք հանձնված են մեր հոգևոր հոգատարության Աստուծո կողմից:

Եղբայրական սիրով ի Բրիստոս՝

ԱԼԵՔՍԻ

ՄՈՍԿՎԱ

Պատրիարք Մոսկվայի և համայն Ռուսաստանի

«Բրիստոս յարեալ: Արդարև յարեալ Նա: Ալէլուիա»:

Սա հաղթական այն պատգամն էր, որ հնչեց առաջին առաքյալների շրթունքներից: Այսօր էլ Բրիստոսի Եկեղեցին դավանում է և հռչակում այս առաքելական պատգամը: Մեր Փրկիչ Հիսուս Բրիստոսը երրորդ օրը հարություն առավ համաձայն Ս. Գրքին:

Ամեն ինչ, որ գրված է Մովսեսի և մարգարեների կողմից Մեսիայի, Նրա չարչարանքների և փառքի մասին, ապացուցված է նույնիսկ հարուցյալ Բրիստոսի կողմից Էմմաուսի ճանապարհին, երկու աշակերտների վկայությամբ էլ: Մեկը մյուսին ասում էր. «Ո՛չ իսկ և սիրտք մեր ճմլէին ի մեզ մինչ խօսէրն ընդ մեզ զճանապարհայն» (Ղուկ. ԻԴ 32):

Մեր օրերին, բոլոր քրիստոնյաների սրտերը բաբախում են հանուն միության և աղոթում՝ որպեսզի Բրիստոս նորից շարունակի հայտնել մեզ, Ս. Հոգու միջոցով, Աստուծո սիրող նպատակների գաղտնիքը և ընկերանա մեզ մեր կյանքի ճանապարհի վրա: Մեր ջերմագին աղոթքն է, որ այն ճանապարհը, որով մենք ընթանում ենք. մեզ առաջնորդի այդ Ս. Հաղորդության խնջույքին, որից բոլորն էլ կարող են բաժին ունենալ, ինչպես Բրիստոս Ինքն օրհնեց հավիտենական կյանքի հացը և բաժանեց Իր ժողովրդյան:

Այս սրբազան օրերին, մենք շնորհակալությամբ միանում ենք Ձեզ՝ հռչակելու մեր Փրկչի հարության փառքն ու հաղթանակը, և աղոթում, որ Ս. Հարության նոր կյանքը լիառատ կերպով իջնի Ձերդ Սրբության, Ձեր հոգևորականության և Ձեր համայն հավատացյալ ժողովրդի վրա:

Ձեզ սիրող եղբայր ի Բրիստոս՝

ՄԱՅՔԼ

Արքեպիսկոպոս Ջենտրեբրիի.

Եպիսկոպոսապետ և Միտրոպոլիտ համայն Անգլիայի

ԼՈՆԴՈՆ

Շնորհակալություն Ա. Զատկի առթիվ Ձեր ողջույնների համար: Մեր Տիրոջ հրաշալի հարությունը մեզ գոտեպնդում է միշտ հավատարիմ մնալու Իրեն, որ մահացավ և հարություն առավ, հաղթելով մեր հոգևոր թշնամիներին՝ մեղքին և մահվան, և շնորհելով մեզ հավիտենական կյանք:

Թո՛ղ Տերը Իր օրհնությունները ցողի Ձերո՛ւ Սրբության և Ձեր համայնքի վրա, Իր հաղթական հարության միջոցով:

Ձերո՛ւ ի Տեր՝

ԴԱՄԱՍԿՈՍ

ԻԳՆԱՏԻՈՍ ՀԱԿՈԲ Գ

Պատրիարք Անտիոքի և համայն Արևելքի

Զատկի այս սուրբ օրերին, երբ մենք տոնում ենք մեր մարդացյալ Տիրոջ մահվան վրա տարած պատմական հաղթանակը, թույլ տվեք որ ես, մեր բոլոր եպիսկոպոսները և Հնդկաստանի այս հեռավոր երկրի հին Եկեղեցու հավատացյալները, շնորհավորենք Ձերո՛ւ Սրբությանը և մաղթենք Ձեզ և պատմական Հայ Եկեղեցուն ամենայն խաղաղություն, ուրախություն և բարգավաճում:

Թույլ տվեք, կրկին անգամ, հղել Ձերո՛ւ Սրբության և Հայ Եկեղեցու բոլոր եպիսկոպոսներին ու հավատացյալներին իմ և իմ Եկեղեցու ողջույնները: Թո՛ղ Աստված Իր անգնահատելի գթությունը ցողի Ձեր և Ձեր Եկեղեցու բոլոր անդամների վրա Զատկի այս սուրբ օրերին:

«Քրիստոս յարեա՛ւ»:

Եղբայրական ողջույններով ի Տերն մեր՝

ՔՈՏԱՅԱՄ

ՕՋԻՆ ՄԱՐ ՏԻՄՈԹԵՈՍ

Կաթողիկոս Հնդիկ Մալաբար Եկեղեցու

Հաճեցեք ընդունիլ Զատկի առթիվ եղբայրական մաղթանքներս միացած աղոթքիս, Ձեր բարօրության, Եկեղեցվո պայծառության, սիրելի հայ ազգի հառաջդիմության համար:

ԻԳՆԱՏԻՈՍ ՊԵՏՐՈՍ ՊԱԹԱՆՅԱՆ

Կաթողիկոս-Պատրիարք

ԲԵՅՐՈՒԹ

Սրտագինս և սիրով ի Քրիստոս, շնորհավորում ենք Ձերո՛ւ Սրբությունը Ա. Հարության հրաշափառ տոնի առթիվ: Աղոթում ենք, որ հարուցյալ Փրկիչը պարգևի Ձեզ բաջառողջություն և հաջողություն՝ ի փառս Հայ Եկեղեցու, իսկ Ձեր Եկեղեցուն և ժողովրդին՝ խաղաղություն և բարօրություն:

ԿՅՈՒՐԵՂ

ՍՈՖԻԱ

Պատրիարք Բուլղարիայի

Ձերմագին՝ աղոթքներով, խոնարհաբար դիմում ենք ամենաբարի Աստուծուն, որ Իր ողորմությամբ համայն մարդկությանը տա խաղաղություն և հոգևոր խնդություն:

Հրաշափառ տոնի առթիվ ցանկանում ենք Ձեզ հաջողություններ և հղում ենք Ձեզ Սերբիայի Ուղղափառ Եկեղեցու հավատարիմ միաբանության և անձամբ իմ եղբայրական վատկական սրտալի համբույրներն ու շնորհավորությունները:

«Քրիստոս յարեա՛ւ ի մեռելոց»:

Սրտագին, բարի ցանկություններ ենք հայտնում Ձերո՛ւ Սրբության, Ձեր եպիսկոպոսներին, բահանայական դասուն և Հայոց քույր Եկեղեցուն:

Ընդունեցեք մեր ամենաանկեղծ և լավագույն ցանկությունները մեր Տիրոջ՝ Հիսուս Քրիստոսի Հարության տոնի առթիվ: Թո՛ղ Նա մեր հոգիների ու սրտերի մեջ հաստատի Աստուծո թագավորության և հավիտենականության անսահման հավատը:

Հայտնելով Ձեզ մեր բարեմաղթությունները, հանձնում ենք մեզ Ձեր սուրբ աղոթքներին և մնում Ձեր հարգելի Սրբության մշտապես եղբայր և ծառայակից՝

• ՀԵՐՄԱՆ

ԲԵԼԳՐԱԴ

Պատրիարք համայն Սերբիայի

Սրտագինս շնորհակալ եմ Վատկական շնորհավորանքի համար: Թո՛ղ հարուցյալ Զրիստոսը իր հոգևոր բազում շնորհներով լուսավորի և Վորավիզ լինի Ձերդ Սրբությանը, Ձեր գործակիցներին և ամբողջ Հայ Եկեղեցուն:

ԳՈՒՍՏԱՎ ՏՈՒՐՄ

ՌԻԳԱ

Լատվիայի Ավետարանական-Լուսերական Եկեղեցու Արքեպիսկոպոս

Շնորհակալ եմ Ձեր բարի ցանկությունների համար:

Մեծ տոնի առթիվ շնորհավորում եմ Ձերդ Սրբության և Ձեզ հանձնված Եկեղեցուն և բաժանում մեր մտքերը Զրիստոսի հարության հաղթանակի առթիվ:

Զրիստոսի հարությունը մեզ համար փայլուն գրավականն է բարիի հաղթանակի ընդդեմ չարի:

Այս հավատով լիաբույս ենք, որ հարուցյալ Զրիստոսը, որը խաղաղություն կտակեց իր աշակերտներին, կխաղաղացնի աշխարհը և աշխարհի բոլոր ծայրերում կշողան մարդասիրությունը, փոխադարձ վստահությունը և եղբայրական հարգանքը ժողովուրդների միջև:

Թո՛ղ Զրիստոսի հարության խնդությունը Ձերդ Սրբության պարգևի ուժ՝ փառավորելու հարուցյալ Տիրոջը երկա՛ր, երկա՛ր տարիներ:

«Զրիստոս յարեա՛լ ի մեռելոց»:

ՅԱՆ ԿԻՅՎԻՏ

Եղբայրական սիրով ի Զրիստոս՝

ՏԱԼԼԻՆ

Լատվիայի Ավետարանական-Լուսերական Եկեղեցու արքեպիսկոպոս

Հարուցյալ Փրկչին աստվածային հաղթանակն ավետող Վանգերուն հետ հասավ Ձերդ Վեհափառության շնորհավորական գիրը, հոգեկան սուրբ ուրախությամբ համակելով ամենուս սրտերը:

«Օրհնեալ է յարութիւնն Զրիստոսի», կգոչենք ոգևորված, հարության սուրբ լույսին շնորհներով օծուն, ու մեր խոնարհ աղոթքով փոխադարձ կհայցենք երկար կյանք Ձերդ Վեհափառության և հաջողություն Ձեր բոլոր աստվածասեր վաստակներուն:

Եղբայրական ջերմ մաղթանքներով կողջունենք նաև Ս. Էջմիածնի աստվածապահ ուխտիդ բոլոր միաբանները: Ու Ձեր միջոցով կցանկանք Ս. Ղազարեն սիրո մեր ողջունը ուղղել Արարատի ստորոտն ապրող և աշխատող համայն հայ ժողովուրդին:

Հարուցյալ Հիսուսի երկնային շնորհներով հավետ թող պայծառանա Հայոց աշխարհն ու Եկեղեցին:

Ամենախորին հարգանքներով, մնամ Վեհափառ Տյառնդ՝

Հ. ՍՐԱՊԻՈՆ ՎԱՐԴԱՊԵՏ ՌԻՈՒՀՈՃՅԱՆ

ՎԵՆԵՏԻԿ

Ընդհանուր արքա Միսիթարյան Միաբանության, Արքեպիսկոպոս Զերտնի

Խորին շնորհակալություն Վեհափառ Տերությանդ՝ Զրիստոսի փառավոր Հարության տոնին առթիվ մաղթանքներու համար:

Փրկիչն, որ իր կենդանության ըսավ «Ես եմ յարութիւն և կեանք», իր այդ խոսքն հաստատեց իր աստվածային լուսափայլ հարությամբ խորտակելով մահվան շղթաները և տալով մարդկության հավիտենական կյանքի ուրախության երաշխիքը:

Մարդկությունը ծարավի է ուրախության, բայց դժբախտաբար կմոռնա, թե նյութեղենին, նյութապաշտության՝ թաղումին է որ միայն կհաջորդե աստվածապաշտության աղբյուրն բխող անվերջ ու անխառն ուրախությունը: Կմաղթեմ, որ այս աստվադապարզ ուրախությամբ ցնծա միշտ սիրտը Վեհափառիդ, նույն ուրախությամբ լեցված տեսնելով իր հոտը:

Ահա այս պգացումներով կգոչեմ.

«Օրհնեալ է յարութիւնն Զրիստոսի»:

Վեհափառ Տյառնդ աղոթակից՝

ՄԵՍՐՈՊ ՀԱՊՈՋՅԱՆ

ՎԻԵՆՆԱ


Արքեպիսկոպոս և ընդհանուր արքա


«Զրիստոս հարյավ»:

Թո՛ղ Ս. Հարության ուրախությունն ու խաղաղությունը անպակաս լինին Ձերդ Սրբության և Հայ Եկեղեցու բոլոր հավատացյալների վրա:

ԺԸՆԵՎ

ՎԻՍԵՐ Դ. ՀՈՒՅՏ





ՓՐԿԶԻ ՀՐԱՇԱՓԱՌ ԵՎ ՍՈՒՐԲ ՀԱՐՈՒԹՅԱՆ ՏՈՆԻ ԱՌԹԻՎ
ԱՄԵՆԱՅՆ ՀԱՅՈՑ ԾԱՅՐԱԳՈՒՅՆ ՊԱՏՐԻԱՐԶ
ԵՎ ԿԱԹՈՂԻԿՈՍ ՆՈՐԻՆ ՍՈՒՐԲ ՕԾՈՒԹՅՈՒՆ
Տ. Տ. ՎԱԶԳԵՆ Ա ՀԱՅՐԱՊԵՏԻ
ԵՎ ՆՎԻՐԱՊԵՏԱԿԱՆ ԱԹՈՌՆԵՐԻ ՈՒ ԱՌԱՋՆՈՐԴԱՐԱՆՆԵՐԻ
ՄԻՋԵՎ ՓՈԽԱՆԱԿՎԱԾ ՈՂՋՈՒՅՆԻ ՀԵՌԱԳՐԵՐՆ
ՈՒ ԳՐՈՒԹՅՈՒՆՆԵՐԸ

ՆՈՐԻՆ ՍՐԲՈՒԹՅՈՒՆ Տ. Տ. ԽՈՐԵՆ Ա,
ԿԱԹՈՂԻԿՈՍ ՄԵԾԻ ՏԱՆՆ ԿԻԼԿԻՈ

ԱՆԹԻԼԻԱՍ

Շնորհապարդ եղբայր.

Քրիստոսի հրաշափառ հարության ավետիսը վերստին ուրախությամբ կ'ենցնէ մեր հուսացլալ սրտերը, զի Աստուծո Որդին «յարեաւ ի մեռելոց և յարութեամբս իւրով մեզ վկեանս պարգևեաց»:

Մեր սիրտն ալ լեցուն այս սուրբ ուրախությամբ, Փրկչի իջման տեղեն՝ Ս. Էջմիածնեն, Մենք եղբայրական սիրո ողջույն կ'հղենք Ձերդ Սրբության, սրտաբուխ մաղթանքներով, որ մնաք միշտ հաստատ Ձեր պատմական Աթոռին վրա և միշտ նույն եռանդով շարունակեք Ձեր նվիրական առաքելությունը Հայ Եկեղեցվո սիրո և միության լուսավոր ճամբեն, հառավել ամրապնդումն հայ ժողովուրդի հոգևոր կյանքի, որ խարիսխն է և գերագույն գրավականը մանավանդ ի սփյուռն աշխարհի ապրող մեր ազգի պահպանման ու գոյատևման:

Ս. Էջմիածնեն Մեր ողջույնը և օրհնությունը նաև Ձեր ուխտանվեր միաբանության, Ձեր եկեղեցիներուն և համայն հավատացլալ հայ ժողովուրդին:

Թող անշարժ ու միշտ ծաղկլալ մնան մեր Ս. Եկեղեցին և մեր հարապատ ժողովուրդը, սիրո և միության վեմին վրա, խաղաղ կյանքով և արդյունավետ աշխատանքով:

Թող առավել ամրապնդվի խաղաղությունը ամբողջ աշխարհի մեջ և ժողովուրդները բոլոր վիրար ողջունեն իբրև եղբայրներ և իբրև որդիները միևնույն Աստուծույն, արարիչը երկնի և երկրի:

«Քրիստոս յարեաւ ի մեռելոց»:

«Շնորք, սէր և խաղաղութիւն Յիսուսի Քրիստոսի եղիցին ընդ Ձեզ այժմ և յաւիտեանս»:

Ամեն:

ՎԱԶԳԵՆ Ա

ԾԱՅՐԱԳՈՒՅՆ ՊԱՏՐԻԱՐԶ ԵՎ ԿԱԹՈՂԻԿՈՍ
ԱՄԵՆԱՅՆ ՀԱՅՈՑ

Ս. ԷԶՄԻԱԾԻՆ

**ԱՄԵՆԱՊԱՏԻՎ Տ. ԵՂԻՇԵ ԱՐՔԵՊԻՍԿՈՊՈՍ ՏԵՐՏԵՐՅԱՆ,
ՊԱՏՐԻԱՐԻ ՀԱՅՈՑ ԵՐՈՒՍԱՂԵՄԻ**

Ս. ԵՐՈՒՍԱՂԵՄ

**ԱՄԵՆԱՊԱՏԻՎ Տ. ՇՆՈՐՀՔ ԱՐՔԵՊԻՍԿՈՊՈՍ ԳԱԼՈՒՍՏՅԱՆ,
ՊԱՏՐԻԱՐԻ ՀԱՅՈՑ ԹՈՒՐԶԻՈ**

ՍՏԱՄԲՈՒԼ

Ամենապատիվ Սրբապան Եղբայր.

Քրիստոսի հրաշափառ հարության ավետիսը վերստին ուրախությամբ կլեցնե մեր հուսացյալ սրտերը, զի Աստուծո Որդին «յարեաւ ի մեռելոց և յարութեամբն իւրով մեզ վկեանս պարգևեաց»:

Մեր սիրտն ալ լեցուն այս սուրբ ուրախությամբ, Փրկչի Իջման տեղեն՝ Ս. Էջմիածնեն, Մենք եղբայրական սիրո առջույն և աստվածային օրհնություն կբերենք Ձերդ Ամենապատվության, Ձեր հոգևորական դասուն և Մեր հավատացյալ բոլոր վավականներուն, ջերմագին աղոթքով, որ Տերը զՁեզ բոլորդ անսասան պահե, անփորձ ու անվտանգ, խաղաղ ու անվրդով, և հաջողությամբ պսակե Ձեր բոլոր եկեղեցաշէն ու ազգանվեր գործերը:

Հարուցյալ Փրկչի շնորհներով թող առավել զորանա և պայծառանա հայոց քրիստոնեական լույս հավատքը և Հայ Առաքելական Եկեղեցին, որ խարիսխն է և գերագույն գրավականը մեր ազգի պահպանման և գոյատևման:

Թող անշարժ ու միշտ ծաղկյալ մնան մեր Ս. Եկեղեցին և մեր հարապատ ժողովուրդը, սիրո և միության վեմին վրա, խաղաղ կյանքով և արդյունավետ աշխատանքով:

Թող առավել ամրապնդվի խաղաղությունը ամբողջ աշխարհի մեջ և ժողովուրդները բոլոր վիրար ողջունեն իբրև եղբայրներ և իբրև որդիները միևնույն Աստուծույն, արարիչը երկնի և երկրի:

«Քրիստոս յարեաւ ի մեռելոց»:

«Շնորհք, սէր և խաղաղութիւն Յիսուսի Քրիստոսի եղիցին ընդ Ձեզ այժմ և յաւիտեանս»:

Ամեն:

ՎԱԶԳԵՆ Ա

ԾԱՅՐԱԳՈՒՅՆ ՊԱՏՐԻԱՐԻ ԵՎ ԿԱԹՈՂԻԿՈՍ
ԱՄԵՆԱՅՆ ՀԱՅՈՑ

Ս. ԷԶՄԻԱԾԻՆ

**ԳԵՐԱՊԱՏԻՎ ԵՊԻՍԿՈՊՈՍՆԵՐԻՆ ԵՎ ԲԱՐԵԽՆԱՄ ԲՈԼՈՐ
ԹԵՄԱԿԱԼ ԱՌԱՋՆՈՐԴՆԵՐԻՆ**

Քրիստոսի հրաշափառ հարության ավետիսը ուրախությամբ կլեցնե մեր հուսացյալ սրտերը, զի Աստուծո Որդին «յարեաւ ի մեռելոց և յարութեամբն իւրով մեզ վկեանս պարգևեաց»:

Մեր սիրտն ալ լեցուն այս սուրբ ուրախությամբ, Փրկչի Իջման տեղեն՝ Ս. Էջմիածնեն, Մենք կբերենք սիրո ողջուն և օրհնություն Ձեզ, թեմիդ հոգևոր դասուն, Ձեր թեմական խորհուրդի և եկեղեցական վարչությանց անդամներուն, Ձեր եկեղեցիներու դպրաց դասերուն, տիկնանց, երիտասարդաց և մշակութային կազմակերպություններուն, Ձեր վարժարաններու ուսուցչության և աշակերտության և համայն Մեր սիրեցյալ և հավատացյալ վավականներուն, ջերմեռանդ աղոթքով առ բարձրալն Աստված, որ զՁեզ բոլորդ պահե և պահպանե Իր ապահով հովանիիս ներքև, խաղաղ ու անվրդով, սիրով միաբան, Ձեր բոլոր եկեղեցաշէն և ազգանվեր գործոց հաջողությամբ:

Հարուցյալ Փրկչի շնորհներով թող առավել ամրապնդվի նաև խաղաղությունը ամբողջ աշխարհի և եղբայրությունը ի մեջ եկեղեցյաց և ժողովրդոց:

«Քրիստոս յարեա՛ւ ի մեռելոց»:

«Շնորհք, սեր և խաղաղություն Յիսուսի Քրիստոսի եղիցին ընդ Ձեզ այժմ և յաիտենաս»:

Օրհնությամբ՝

ՎԱԶԳԵՆ Ա

ԾԱՅՐԱԳՈՒՅՆ ՊԱՏՐԻԱՐԷ ԵՎ ԿԱԹՈՂԻԿՈՍ

ԱՄԵՆԱՏՆ ՀԱՅՈՑ

Ս. ԷԶՄԻԱԾԻՆ

Փրկչի հրաշափառ Ս. Հարության տոնի առթիվ, նմանօրինակ շնորհավորական գրություններ ուղարկվեցին նաև ազգային կենտրոնական, թեմական, կրոնական, եկեղեցական խորհուրդներին, Հայկական բարեգործական՝ ընդհանուր միության կենտրոնական վարչության նախագահ պր. Ալեքս Մանուկյանին (Նյու-Յորք), Գալուստ Կյուլպենկյան հիմնարկության կենտրոնական խնամակալության նախագահ դոկտ. Ժուլյե դե Ալբերտի Պերտիգաոյին (Լիսաբոն), Աբգարյան ավանդի և Էջմիածնի հիմնադրամի հանձնաժողովին (Լոնդոն), Էջմիածնի օժանդակ հանձնաժողովին (Բեյրութ), Վարդանանց ասպետների կազմակերպության ավագ դպրապետ դոկտ. Յուհաննես Մուկարին (Վոտերտաուն), հայրենակցական, մշակութային, տիկնանց, երիտասարդաց և օրիորդաց զանազան կազմակերպություններին, Մայր Աթոռի և Հոգևոր ձեմարանի բարերարներին և ազգային ծանոթ դեմքերին, որոնցից ստացվեցին պատասխաններ:

ՆՈՐԻՆ Ս. ՕԾՈՒԹՅՈՒՆ Տ. Տ. ՎԱԶԳԵՆ Ա
ԿԱԹՈՂԻԿՈՍ ԱՄԵՆՅԱՆ ՀԱՅՈՑ

ԷԶՄԻԱԾԻՆ

Վեհափառ և սիրելի Եղբայր ի Քրիստոս.

Տյառն մերո Հիսուսի Քրիստոսի Ս. Հարության հրաշափառ տոնին առթիվ կփութանք ներկայացնել Ձերո Սրբության Մեր ջերմ շնորհավորություններն ու լավագույն մաղթանքները:

Ի բոլոր սրտե կաղոթենք առ բարձրյալն Աստված, որ անշարժ ու անսասան պահե ու պահպանե Հայաստանյայց Առաքելական մի և անբաժան Ս. Եկեղեցին ու նվիրապետական Ս. Աթոռները և բարոր ու երջանիկ կյանք պարգևե մեր ազնվական հայ ժողովուրդին:

Մաղթելով Ձեզի քաջառողջ կյանք և կատարյալ հաջողություն Ձեր եկեղեցանվեր բոլոր ծրագիրներուն ու ձեռնարկներուն, մնամ եղբայրական սիրո ողջունիվ, Աղոթակից՝

ԽՈՐԵՆ Ա

ԿԱԹՈՂԻԿՈՍ ՄԵԾԻ ՏԱՆՆ ԿԻԼԻԿԻՂ

ԱՆԹԻԼԻԱՍ

Մեր Տիրոջ հարության երջանիկ առիթով մեր, միաբանության և ժողովուրդին կողմե կներկայացնենք մեր ամենաանկեղծ շնորհավորությունները, մաղթելով Ձերո Ս. Օծության առողջություն, երջանկություն և Մայր Աթոռին բարգավաճում:

ԵՂԻՇԵ ՊԱՏՐԻԱՐԷ

ԵՐՈՒՍԱԳԵՄ

Ս. Զատիկը, մեր հավատքին մեծագույն տոնը, կուգա վերստին արծարծել մեր մեջ հրճվանքի այն հուրը, որ վառեցավ հոգիներու մեջ պատմության մեծագույն հրաշքով:

Սրտով կմաղթենք Վեհիդ երջանիկ տոնակատարություն, առողջություն Ձեր թանկագին կենաց ու հաջողություն Վեհիդ բոլոր եկեղեցաշեն ձեռնարկներուն և կատարում հոգենորոգ ծրագիրներուն:

ՍՏԱՄԲՈՒԼ

ՇՆՈՐՀՔ ԱՐՔԵՊԻՍԿՈՊՈՍ

Պատրիարք հայոց Թուրքիո

Ամենայն Հայոց Վեհափառ Հայրապետի անունով ստացվեցին նաև ամենա-
ջերմ և հարգալից պգացմունքներով գրված բազմաթիվ այլ շնորհավորական հե-
ռագրեր և նամակներ արտասահմանի և ներքին բոլոր թեմերից, թեմակալ առաջ-
նորդներից, ապագային-եկեղեցական և մշակութային կապակերպություններից, հայ
և օտար պաշտոնական անձնավորություններից:





ՆՈՂԵՐ ԳԵՎՈՐԳ Զ ԿԱԹՈՂՆԿՈՍԻՑ

Ազգի մեծութիւնը նրա ստեղծագործող ոգու և այդ ոգու ստեղծած արգասիքների արժանավորութեան մեջ է կայանում: Հայ ազգը անցյալում ստեղծագործել է և յուր ստեղծագործութեան հուշարձանները կազմում են այսօր հայութեան փառքն ու պատիւը և նորա բարոյական արժեքն օտար կուլտուրական ազգերի առաջ: Նույնը պահանջվում է նաև ներկայից, որի ստեղծագործողը հայ հանճարը պիտի լինի, իսկ գործի մարմնացնողը՝ հայ մեկնասար:

Բարեգործութիւնը մարդկային կյանքում մեծ դեր է խաղացել, մանավանդ փոքր ազգերի և հատկապես մեր կյանքում, որ աշխարհի ամեն կողմը ցաքուցրով ընկած հայութեան բեկորներ ունինք՝ նյութական և հոգևոր բազմատեսակ կարիքների ենթակա և աջակցութեան կարոտ: Ազգային մեծ բարերարներ, ձեր կատարելիք գիտակցական և նպատակահարմար բարեգործութիւնը ոչ միայն պիտի նպաստեն՝ հայ ժողովրդի տնտեսական կարիքները հոգալով՝ ազգային փառքի ու պատւի բարձրացման ուղին հարթելու, աստվածահաճո և կրոնական ասպարեզի բարեգործութեամբ՝ ազգապահպանման և ազգային միութեան գործն ապահովելու, այլև ձեր նոր ձեռնարկները անհուն մխիթարութեան աղբյուր պիտի հանդիսանան նաև ձեզ համար, կանգնելով երկրի վերա անջնջելի հուշարձաններ՝ ձեր համարյուն եղբայրների սիրտը շահող և երկնքում՝ Տիրոջ գութը շարժող:

* *

Հայրական ողջունս նաև ձեզ՝ հայ տիկիներ և օրիորդներ: Կյանքի ղեկավարը միտքը չէ միայն, այլ սիրտը, և անավել ևս սիրտը: Բազմաթիվ դարեր սահել անցել են, մարդու միտքը զարգացել է և մարդու ստեղծագործող մտքի և աշխատունակ ձեռքի շնորհիվ արտաքին աշխարհը կատարելագործվել է, որի հետևանքով բազմատեսակ նյութական բարիքներ են ստեղծվել, բայց մարդն ինքը ապերջանիկ է մնացել: Ինչո՞ւ. որովհետև Փրկչի ոգին, սիրտ և մարդասիրութեան ոգին չի իշխում մարդկանց սրտում:

Հայ տիկիներ և օրիորդներ, դուք, որ աստվածային գերազույն շնորհին եք արժանացել և սիրտ ու մարդասիրութեան քաղցր ու բնութայն զգացմունքներով օժտվել, հանդես եկեք ձեր հոգու այդ թանկարժեք փանծով, որպեսզի մտքով հարուստ և մարդկային կյանքը իրապես երջանիկ դառնա:

* *

Հայ գիրն ու գրականութիւնն էր, որ ազատագրեց հայ ժողովրդին և՛ հեթանոսական խավարի վերապրուկներից, և՛ ասորահելլենական օտարացնող ազդեցութիւններից: Հայաստանյայց Եկեղեցու և հայկական մշակութի շնորհիվ էր, որ երկրայնորեն անջատյալ և քաղաքականորեն անիրավացյալ հայ

ժողովուրդը, Սասանյան Պարսկաստանում թե Քյուղանդական կայսրության լծի տակ, ինչպես և բնաշխարհից ի սփյուռս տարագրյալ, պահպանեց իր գոյությունը և մնաց անբաժան, միասնական:

* *

Ազգի և հայրենիքի վարած կյանքի և մահվան հերոսական պայքարի ժամին, ո՛վ ոճգործ հանդգնություն ունի ճեղքելու ազգային միասնության ճակատը, առավել ևս զավաճանորեն հարվածելու՝ իրավունքի, պատության և արդարության անձնվեր մարտիկների թիկունքից, ժողովրդի անհիշաշար հոգում անգամ կարեկցության զգացմունք չի վաստակի և դավաճանի սև կնիքը կընդունի իր ճակատին:

* *

Արթուն հսկողություն ունեցեք եկեղեցիների վերա, որ Աստուծո տունը վաշխելու և բարեկարգ վիճակի մեջ լինի և այնտեղ հնչեցրեք հավատացյալների ախանջին՝ Փրկչի կենսատու և կենարար խոսքը ի մխիթարություն և ի դաստիարակություն: Սփյուռքի սրբազան առաջնորդներ, քաղցրաբարո և հեղահամբույր բնավորությամբ և կիրթ վարվեցողությամբ կապեցեք մեր տարագիր ժողովրդի սիրտը ձեզ հետ, սիրով վառեցեք ու շաղկապեցեք Ս. Էջմիածնի և մեր հայրենիքի՝ Խորհրդային Հայաստանի հայրենի հուշարձանների հետ՝ ի մխիթարություն և ի շինություն նոցա: Հորդորեցեք ձեր հոտը կուսակցական պայքարներից հեռու կենալ, սուլնպես նաև թշնամական երկյթներից ու արարքներից՝ մեր Մայր Հայրենիքի՝ Խորհրդային Հայաստանի և նորա հարազատ ու հավատարիմ կառավարության հանդեպ: Այլ որ կարևորագույնն է՝ ըստ Ավետարանի՝ անձնդիր հովիվ եղեք ձեր հոտի, որ ձեր ձայնին լսեն և ձեզ հետեն, որպեսզի հափշտակիչ գայլերն անկարող լինեն փախցնել նոցա ձեր փարախից:

* *

Կինը, ընդհանրապես, և հայ կինը, մասնավորապես, հայտնի է իր կրոնասիրությամբ: Քրիստոնեական կրոնի արշաղույսին յուղաբեր կանայք էին, որ հավատով գորացած աներկյուղ եկան, իրենց սիրած ու պաշտած Վարդապետին պատանեցին, նորա մարմինը թանկարժեք ու անուշահոտ յուղերով օծեցին ու դրին գերեզման: Եվ այս՝ այն ժամանակ, երբ Պետրոս առաքյալը քահանա-

յապետի աղախնի առաջ մեղկացավ, թուլացավ և ուրացավ իր Վարդապետին՝ Հիսուսին, այն ժամանակ, երբ թովմաս առաքյալը, թեոհազատությամբ բռնված, իր Վարդապետի կողմը շոշափել ցանկացավ, որ հավատա:

Հայ կինն էր, որ հինգերորդ դարում, Վարդանանց պատերազմի օրերին կրոնի, ազգի և հայրենիքի ազատության և անկախության համար մղվող պատերազմում, ամեն տառապանք կրելով, կանգնեց իր ամուսնու կողքին ի խրախույս՝ և անձնվիրաբար օգնեց պատերազմող մարտիկներին՝ մարտիրոսացավ ու անմահացավ:

Հայ կինը՝ հայի տառապալից տևական պատմության ընթացքում, ամեն շարժաշար կյանք տանելով՝ իր ամուսնու անբաժան ընկերն է հանդիսացել, իր ընտանիքի պատիվն է պահել սրբությամբ, իր զավակների դաստիարակն է եղել՝ նոցա հայ լեզուն սովորեցրել, հայ սովորույթներն ուսուցել, ընտանեկան տնտեսության վարժեցրել, որով ցայսօր հայ ընտանիքը անձույլ է մնացել և որի հետևանքով հայ ժողովրդի ազգային անկախ գոյությունն է պահպանվել:

Եվ, վերջապես, կինը, որոնց թվում նաև հայ կինը, իր սրբակրոն կյանքով և մաքուր հավատով՝ սրբացել է. կուսանաց տոները՝ դրա լավագույն ապացույցն է:

Վերոհիշյալ փաստերը ցույց են տալիս, որ հայ կինը ազգապահպանության կարևոր գործոն է հանդիսացել մեր պատմական կյանքում:

* *

Մանր և պատասխանատու ժամանակներ ենք ապրում, անհրաժեշտ է հասկանալ ժամանակի ոգին և պահանջները, ինչպես նաև շմոռանալ մեր պարտականությունները հանդեպ Եկեղեցու և ազգի: Զափազանց մեծ զգուշավորություն և արթնություն է պահանջվում, որպեսզի մեզ հանձնված նավը դեկավարենք ուղիղ և ճշմարիտ ճանապարհով, խուժահար լինելուց զերծ մնանք և ապահով նավահանգիստ հասնենք:

* *

Ազգի, հատկապես գաղութահայության, ինքնուրույն գոյության պահպանության համար անհրաժեշտ է նաև մայրենի լեզուն: Ընտանիքն է այն օջախը, որ պահպանում է մայրենի լեզուն. հայ կինն է, որ իր նազանքով և օրորոցի անուշիկ երգով հաղորդում է իր սիրասուն զավակին մայրենի լեզվի անուշիկ հնչյունները որպես նախապատրաստություն: Հայ կինն է, որ հետզհետե ուսուցա-

նում է իր մանկիկներին մայրենի լեզուն, ազգային սովորույթները և եկեղեցական ավանդությունները, որով սկիզբ է առնում ազգային ինքնագիտակցությունը: Ազգային լեզվով է, որ հայ երիտասարդը և ընդհանրապես հայ մարդը հնարավորություն է ստանում ճանաչելու իր ազգի անցյալը, կարգալու իր պատմությունը, իմանալու իր նախնյաց առաքինությունները, նոցա հանճարեղ ստեղծագործությունները, նոցա սխրագործությունները, նոցա հերոսական ոգին և վերջապես՝ անձնական տառապանքների գնով, նոցա մատուցած ծառայությունը թե՛ իրենց ազգին և թե՛ մանավանդ օտարներին, ինչպես խոստովանում են օտարներն իրենք: Ահա այս բոլորի շնորհիվ է, որ անհատը սիրել է սկսում իր ազգն ու հայրենիքը: Վերոհիշյալից պարզ է, որ հայ ընտանիքի համար՝ անհրաժեշտ է մայրենի լեզվով խոսող հայ մայր, և հայ դպրոցի համար՝ հայ ոգի շնչող և հայ լեզվով դասախոսող հայ ուսուցիչ:

* *

Գաղութահայ ժողովրդի ազգային ինքնագիտակցությունը պահպանելու և ազգային անկախ և ինքնուրույն գոյությունը պահելու տեսակետներով՝ անհրաժեշտ է նաև հայրենիքի գաղափարը կենդանի պահել ժողովրդի հոգու մեջ և սեր վառել ու բորբոքել հանդեպ նորա: Հայրենիքը այն վայրն է, որ պահում է ազգի նյութական ու հոգեկան ստեղծագործությունները: Հայրենիքը այն վայրն է, ուր ապրում են գաղութահայության արենակից եղբայրները, որոնք աշխարհիս երեսին միակ հարազատներն են, որ անկեղծությամբ, հավատարմությամբ ու իրենց պատմական անցյալով անխզելիորեն կապված են և անհամբեր անկախում են գաղութահայ բոլոր զանգվածների վերադարձին, որ գրկաբաց ընդունեն նոցա:

Հայրենիքը այն վայրն է, ուր ի վերջո պիտի վերադառնան՝ հայրենիքից դուրս, աշխարհի ամեն կողմը ցաքուցրիվ ժամանակավորապես հաստատված ազգի բնկորները, որպեսզի ազգը միանա և ամբողջանա՝ և՛ իրրև ամբողջական ազգ, ստեղծել լեզվի, մտածելակերպի և հոգեբանության միություն, ևս առավել զարգանա տնտեսապես ու կուլտուրապես և շարունակե ազատ ու երջանիկ ապրել:

Հայրենիք ունեցող ազգը, որպեսզի կարողանա ինքնուրույն և անկախ ապրել և իր հոգեկան ուլթերը ազատորեն դրսևորել ու զարգացնել, պիտի ունենա նաև ազատ ու անկախ հայրենի պետություն: Հայությունը այսօր բախտավոր է, որ ունի նաև ազատ ու անկախ

հայրենի պետություն, որ ապրում է իր ժողովրդի համար, որ մտահոգված է իր ժողովրդի կուլտուրական և տնտեսական զարգացման հոգսերով, որի արդյունքը հրապարակի վերա է և չի կարոտում ապացույցի, զի այն տեսանելի և շոշափելի է ամենին՝ «Որ ունիցի ականջս լսելոյ՝ լուիցէ» (Մատթ. ԺԳ 43), «Եւ ակն տեսանելոյ՝ տեսցէ»:

Մի իդճ՝ եւ ունեցել պատանեկության օրերից, որ ժամանակի ընթացքում զարգացել ու զորացել է և հետզհետե իրականանալու ճամբի վերա է՝ եղել: Իսկ այսօրվա իրականությունը մեծագույն հույսն է ներշնչում Մեզ՝ թե Մեր ըլճի և հույսի իրացման ժամանակը մոտեցել է: Մեր իդճը եղել է՝ հայրենի երկրում, հայրենի հարազատ պետության հովանու ներքո, տեսնել ազգի բոլոր բնկորները ներգաղթած, կենտրոնացած, միացած ու ամբողջացած և լծված հայրենիքի կուլտուրական ու տնտեսական կյանքին, տեսնել ազգի ամբողջական կյանքը հայրենի երկրում ազատ ու անկախ և խաղաղ ու երջանիկ... և փառք տալ ու աղերսել Բարձրյալին՝ «Արդ արձակեա զծառայս քո Տէ՛ր, ի խաղաղութիւն, զի տեսին աչք իմ զփրկութիւն ազգի իմոյ, զոր պատրաստեցիր առաջի ամենայն ժողովրդոց»:

Հայ Եկեղեցին դարերի ընթացքում եղած է հայության համար ոչ միայն հավատո վառարան, այլև ազգապահպանման էական աղբակ: Հայ Եկեղեցին է, որ հավատացյալների աչքն ու սիրտը դեպի ինք դարձնելով, ի մի է խմբում և շաղկապում իր տարագիր ավակներին, ջերմացնելով նոցա սիրտը՝ նախնյաց ջերմեռանդությամբ և մեծագործությամբ ու առ ազգն ու հայրենիքը ունեցած անձնվիրությամբ՝ պահելով նորան հնադարյան հաստատություն՝ Մայր Աթոռ Ս. Էջմիածնի հովանու ներքո:

Նյութական եկեղեցին բարոյական շնք դարձնողը կենդանի հավատն է, իսկ հավատը կենդանի և վառ պահողը՝ անձնվեր հովիվն է: Անձնվեր հովիվն է, որ հավատացյալների միտքը լուսավորում է Ս. Ավետարանի լուսով և սիրտը ջերմացնում սիրո զգացմունքով դեպի ընկերը, և այսպես դեկավարում է անձնվեր հովիվը հավատացյալների միտքն ու սիրտը դեպի բարին, գեղեցիկն ու ճշմարիտը՝ դաստիարակելով նոցա ճշմարիտ հավատացյալ և դարձնելով Հիսուս-Քրիստոսի ճշմարիտ աշակերտ:

Հայ դպրոցն է, որ հայ մատաղ սերունդը հայեցի է դաստիարակում և կրթում՝ մարզելով նորա միտքը հայ աշխարհի քաջամարտիկ նահատակների պատմությամբ և սրբազան ավանդներով: Հայ դպրոցն է, որ վառում է հայ մատաղ սերնդի սիրտը հայրենիքի սի-

րով և մկրտում նորան ազգային ոգով: Հայ եկեղեցին՝ իր անձնվեր հովիվով, և հայ դպրոցը՝ իր անձնվեր ուսուցչով ազգային ինքնագիտակցության և ազգային ինքնություն գոյության սյուների են: Սոցա միացյալ ջանքերով է, որ հայությունը ամենուրեք, մանավանդ գաղութահայությունը օտար երկրներում և կուլտուրապես բարձր ազգերի մեջ կարող է անխաթար պահպանել իր ազգային ոգին և՛ իրեն ազգ, անձույլ մնալ:

* *
*

Հայ եկեղեցին օրհնել է հայ ժողովրդի հերոսական դիմակալության ոգին, ներշնչել է ազգային անկախության գաղափարը, մշակել է ազգային ինքնագիտակցության զգացումը և՛ խաչն ու Ավետարանը ձեռին՝ քաջալերելով հայ զորքը, զեպի հաղթություն է առաջնորդել նրան:

* *
*

Հայոց Հայրապետությունը հայի զգայուն սիրտն է եղել, որ դարեր շարունակ ապրել է նրա անհուն ցավերով և սակավ ուրախություններով:

Հայոց Հայրապետությունը հայի ստեղծող միտքն է եղել, որ լուսավորված բրիտանիական լուսով, ստեղծել է գրականություն և գեղարվեստ՝ մեր փառքն ու պարծանքը:

Հայոց Հայրապետությունը հայի ազնիվ և տոկուն կամքի արտահայտիչն է եղել, տալով առաքինության հերոսներ, աստվածային կամքի ճշմարիտ աշակերտներ:

Հայոց Հայրապետությունը վեհ գաղափարների մի փունջ է, որ հյուսվել է հայոց մեծ հայրապետների ձեռքով: Եթե հիշենք հայոց հայրապետների շարքը, ո՞րպիսի պատկանելի դեմքեր կտեսնենք, որոնց առաջ կխոնարհի մեր գլուխը:

* *
*

Հայ եկեղեցու անցյալ պատմությունը հայ ազգի տառապանքների և վշտերի մի անվերջ շղթա է, իսկ հայ երկիրը օտարի, վայրագ ու անխիղճ ազգերի մրցության ասպարեզ: Այդ ավերածությունների մեջ Հայոց Հայրապետությունն է, որ մոխրի տակ թաքնված կայծի նման անշեջ մնացել է և եղել հայ ժողովրդի հուսոյ և մխիթարության միակ ապավենը:

Ահա թե ո՞ւր է գաղտնիքը այն դուրբիշ դոկտրինայի և հրապուրչի, որ ունեցել են Ս. Էջմիածինն ու Հայոց Հայրապետությունը դարեր շարունակ հայի աչքում:

* *
*

Մեր ազգի գոյության, նրա մեծության, նրա փառքի և նրա բարեկեցության համար շատ սերունդներ են մաքառել և տանջվել: Մենք ժառանգներ ենք այն բոլորի, որ մեր պապերի ջանասիրությամբ, անձնվիրությամբ, նրանց հերոսական ոգին է ձեռք բերել: Ես հավատում եմ, որ ինչ որ մեր հայրերը մեզ ավանդ են թողել, այդ նույն հիմքի վրա մենք կշարունակենք շենքի կառուցումը: Այս բարոյական պարտականությունը պիտի լինի մեր բոլորիս համար իրեն սրբություն:

* *
*

Չջլատել Հայրենիքի և Ս. Էջմիածնի բարոյական ուժն ու հեղինակությունը, սառնություն չբարոզել նրանց դեմ և շմուրեցնել ժողովրդին. այս է ամեն ազնիվ հայրենասերի պարտքը:

* *
*

Հոգիս հրճվում է տեսնելով հայ եկեղեցական Աթոռների համերաշխ դիրքը և սիրո շողկապը Մայր Աթոռի հետ, որ Մեր օրով անշուշտ առավել ևս պիտի զորանա, որով ազգի կողմից ուսերիս բարձած քաղցր, բայց ծանր լուծը պիտի թեթևանա և դուրանա կոշմանս հետ կապված պարտքիս կատարումը:

Ցավ է ինձ, որ Տանն Կիլիկիո Կաթողիկոսական Աթոռը զրկված է իր պատմական տեղերից, որ այնքան հարուստ է հայ ժողովրդի կուլտուրական և պատմական հուշարձաններով, որոնց հետ անքակտելիորեն կապված է Կիլիկիո հայ ժողովուրդը: Սակայն մխիթարական է, որ այդ տարագիր և աստանդական Աթոռը այսօր դառնում է կայուն և հաստատուն: Առավել ևս ուրախ եմ, որ այդ Աթոռը բաղմել է Մեր հոգեկից հարազատ եղբայր՝ Տանն Կիլիկիո շնորհազարդ Գարեգին Ա Կաթողիկոսը, Մեզ հետ միասին սնված ու դաստիարակված Ս. Էջմիածնի Հոգևոր Ճեմարանում: Երջանկահիշատակ Գևորգ Գ-ի և Հայոց Հայրիկի ազգասիրական, հայրենասիրական և կրոնական զգացմունքներով ներշնչված, նոցա զգայուն և քնքույշ հոգու արտահայտությունները տեսած ու վայելած, Մեզ հետ անշուշտ պիտի պայքարե եկեղեցական և ազգային միասնականության և համերաշխ գործունեության գաղափարները կյանքի մեջ իրացնելու և նոցա իրավական բնույթ տալու համար, որոնց սկիզբը դրվեցավ Ազգային-եկեղեցական ժողովում:

* *

Ս. Երուսաղեմի Պատրիարքական Աթոռը իր սրբազան վայրերով, ուր ծնվել է աշխարհի Փրկիչը, որ եղել է Նորա մկրտության սրբազան ավազանը, ուր հնչել է Փրկչի Ավետարանը, ուր լսվել է Նորա կենդանի ու կենարար քարոզը՝ հայ ազգի պարծանքն է, Հայ Եկեղեցու և Նորա հոտի Սրբություն Սրբոցը՝ Դեպի այդ նվիրական վայրերը դարձած է նաև համայն բրիստոնյա աշխարհի աչքը:

Հայ Եկեղեցու և բրիստոնյա աշխարհի այդ նվիրական սրբությունների պահպանության ու պայծառության համար է, որ դուք՝ Ս. Հակոբյանց միաբանական ուխտիդ հետ՝ օր ու գիշեր տքնում եք: Աստվածային խնամքն ու հովանին եմ հայցում ձեր և ուխտիդ վերա, որպեսզի սրբությամբ զորանաք, բրիստոնեական ջերմեռանդությամբ աճիք և կենդանի օրինակ հանդիսանաք բոլոր այցելու ուխտավորներին, որպեսզի նոքա պատկառանքով հիշեն սուրբ տեղերն ու միաբանությունդ:

* *

Ավարայրը հայ ժողովրդի բազմադարյան անցյալի վեհագույն ու պանծալի բարձունքն է հանդիսանում՝ հերոսական արտահայտությունը հայ ազգի բարոյական բարձր նկարագրի՝ հայրենասիրության ու ազգասիրության, եկեղեցական ուխտապահության, անձնուրաց հերոսության, հոգևոր մշակույթի, նվիրվածության և մարտական կորովի:

Բազրեանդի դիմադրությունը, Ավարայրի ճակատամարտը, Ղևոնդյանց նահատակությունը և Վահանյանց մաքառումը պսակազարդվեցին հայ ժողովրդի բարոյական-բազազական հաղթանակով:

Ավարայրի հերոսամարտը հոգեզմայլ-անսասանելի բարձունքն էր ազատագրական մաքառման—ահա թե ինչո՞ւ նա եղել է, կա և կմնա առհավետ ազգապանծ էջը հայոց պատմության, հոգեզմայլ մի էջ, որ դարեր անընդհատ տգեղնչել և մխիթարել է հայազն սերունդներին և ազգային-բազազական առաքինության ուղիներն է պատգամել հայրենիքին, ազգին և Եկեղեցուն:

* *

Հայ ժողովուրդը, որ իր պատմական անցյալում լիապես ճաշակել է պատերազմի դառնությունը, որ՝ առաջին համաշխարհային պատերազմում մեկ ու կես միլիոն զոհ է տվել և երկրորդ Հայրենական պատերազմում իր

հարազատների և բազմաթիվ սիրասուն զավակների կորուստը ողբացել խաղաղություն է պահանջում:

Իմ սիրելի՛ վտարանդի զավակներս, ի սեր հայ ազգի և հայրենիքի, ի սեր ազատության և անկախության՝ խաղաղություն պահանջեցեք և ձեր ստորագրություններով վավերացրեք ձեր արդար և իրավացի պահանջը:

Հայ Եկեղեցին, որ միշտ հավատարիմ է եղել Փրկչի Ավետարանի վարդապետության՝ միշտ աղոթել և աղոթում է «վասն խաղաղության աշխարհի»:

Հայ Եկեղեցին, որ՝ իր գոյության ամբողջ ընթացքում՝ երազել է խաղաղություն և խաղաղության օրերին ստեղծել է իր ազգային կուլտուրան, որի շնորհիվ պահպանել է իր ազգի գոյությունը և փառք ու պատիվ վաստակել, նա այսօր էլ խաղաղության ջերմ կողմնակից է և հակառակ պատերազմին:

* *

Սիրո և գուրգուրանքի, ակնածանքի և հիացմունքի Սրբություն Սրբոցն է հանդիսանալու մեր ազգային-հայրենական պետությունը՝ Սովետական փառապանծ Հայաստանը: Սովետական մեծ Միության պաշտպանության ապավինած, ուս ազնիվ ու քաջարի ազգի ամենօրյա օգնությունը վայելելով, սովետական բոլոր ժողովուրդների անշահախնդիր աջակցության արժանացած, սովետական հիասքանչ մեծ ընտանիքի եղբայրակցության կենսատու և փրկարար շունչը շնչելով, բնաշխարհի հայությունը իր ազգային պետության հիմքերն է կերտում ու ամրապնդում և հրաշագործում ու պայծառազարդում հայրենական սուրբ օջախը, որի լույսի և ջերմության ուժով այսօրվա սերունդը անօրինակ թափով ու հանճարով դարձնում է ո՛չ միայն իր, այլև գալոց սերունդների երջանկությունը:

* *

Ինչպես արևի կենսատու ճառագայթների ազդեցության շնորհիվ զվարթանում ու կենդանանում է թառամած ծաղիկը, այնպես էլ մեր Մայր Հայաստանը ուս մեծ ժողովրդի աջակցության շնորհիվ աղբառության ճիրաններից և ավերակների ծոցից ելնելով, վերականգնանալով և դարձավ զորավոր ու հարուստ երկիր: Հայ քրտնաջան ժողովուրդը այդ տարիների ընթացքում ստեղծեց նյութական ու կուլտուրական շատ արժեքներ...

Հայր, բացի Սովետական Հայաստանից, չունի այլ հայրենիք: Հայր Հայաստանից

դուրս չունի այլ հաստատուն կռիվ, բայց եթե Մայր Հայրենիքը, Հայ Եկեղեցին և նրան զլխավորող Ամենայն Հայոց Հայրապետությունը՝ Ս. Էջմիածնի Հայրապետական Աթոռով:

* *

Նրկրորդ հարցը ձուլման վտանգն է, որ ծառացած է յուրաքանչյուր հայ վտարանդի համայնքի առաջ: Այս վտանգի առաջն առնելու էական միջոցը հայրենադարձն է, սակայն, նկատի առնելով, որ ներկայումս, ժամանակավորապես, այդ հարցը կանգ է առել, կարևոր է ազգային ինքնագիտակցությունը դարգացնել և հայ մշակույթի շնորհիվ պահպանել ընտանիքներում հայ լեզուն, ազգային ու կրոնական ավանդություններն ու սովորույթները, կաղմակերպել հրապարակային մատչելի դասախոսություններ ազգային և եկեղեցական պատմական թեմաներով՝ զորացնելով և, ի հարկին, դարթեցնելով ազգասիրական և հայրենասիրական զգացմունքներ ժողովրդի մեջ: Օտար ամուսնություններից հեռու պահել հայ երիտասարդներին, որպեսզի հայ ընտանիքն անարատ հայ մնա:

* *

Իմ սիրելի հայ ժողովուրդ, յուրաքանչյուր անհատ ձգտում է առողջ և երկար ապրելու, ազդերն ևս ձգտում են նույն նպատակին, որին հասնելու համար անհրաժեշտ է, որ ազգի հատվածները կենտրոնացած լինեն հայրենի երկրում, որպեսզի ազգը ֆիզիկապես զորավոր, տնտեսապես ապահով, կուլտուրապես զարգացած լինի, և մտքի ու զգացմունքի միություն ու նմանություն տեսնա:

* *

Այսօր ավելի քան երբեք եկել է ժամանակը, որ Եկեղեցին հանդես գա որպես միասնական անկախ հաստատություն, կենսագործելու քրիստոնեական կրոնի հիմնական վարդապետությունը:

Այսօր Քրիստոնեական Եկեղեցին, ինչպես և մյուս կրոնները և կրոնական միավորումները իրավունք չունեն այլևս լռելու, երբ մարդկության համարյա կեսը, իրենց ստորագրություններով պատերազմի հակառակ են և խաղաղություն են պահանջում, խաղաղություն՝ որ քրիստոնեական վարդապետության հիմնական գաղափարներից մեկն է: Քրիստոնեական Եկեղեցու և մյուս կրոնների

այսօրվա լռությունը համազոր կլինի ինքնասպանության. նրանք կկորցնեն իրենց հմայքը ժողովրդի աչքին, նրանք կդառնան կյանքի համար անկարելի հաստատություններ:

* *

Մարդու որոնող մտքի մշակման և զարգացման արդյունք է գիտությունը, որ անհրաժեշտ է տեղեկության մեջ գործող ույժերն ու նորա օրենքները ուսումնասիրելու և ճշմարտությունները երևան հանելու համար: Սակայն նույնքան անհրաժեշտ է նաև հատուկ ուշադրություն դարձնել մարդկային հոգու դաստիարակության վերա՝ ձգտելով նորա հոգու մեջ իշխող դարձնել սիրո, մարդասիրության և եղբայրության զգացմունքները, որպեսզի գիտության ստեղծագործությունները մարդկությունը օգտագործեն մարդկային կյանքը բարելավելու և երջանկությունը կյանքում դարձնելու համար:

Այսօր գիտությունը այն աստիճանի է հասել, որ կարող է աշխարհը կործանել, բայց կարող է նաև շինել ու վայելել, իսկ աշխարհը շինելու և վայելելու համար՝ նա կարողում է զարգացած բարոյական նորմաների:

Բարոյական բարձր նորմաների զարգացման ապարատը մարդու խիղճն է. նա որոշում է բարին և չարը, լավն ու վատը, արդարն ու անարդարը, ճշմարիտն ու սուտը: Եվ որպեսզի խղճի թելադրանքները անշեղ գործադրվեն՝ կարևոր է դորացնել նաև կամքը: Երբ մարդու խիղճն ու կամքը դաստիարակվեն՝ մարդու հոգու մեջ կտիրապետեն մարդասիրության և եղբայրության զգացմունքները, և ահա այն ժամանակ կյանքը հարատև խաղաղ կընթանա և մարդը երջանիկ կապրի աշխարհում:

Մեր բոլոր վերոհիշյալ ասածներից հետևում է, որ մենք պիտի ձգտենք, որպեսզի աշխարհի բոլոր եկեղեցիներն ու բոլոր կրոնները միանան ու պայքար մղեն հոգուտ խաղաղության և նոր պատերազմի սպառնալիքի դեմ:


Ինչ կվերաբերի բոլոր եկեղեցիներին և կրոններին պետքի վարչական համագործակցության ձևերին՝ Մեզ թվում է թե՛ յուրաքանչյուր կրոն և եկեղեցի ազատ պիտի լինի անկախորեն տնօրինելու իր ներքին եկեղեցական և կրոնական խնդիրները. իսկ բարոյական բարձր գաղափարների դաստիարակության նկատմամբ, որոնց մասին վերևում խոսեցինք, հնարավոր կլինի համագործակցության այնպիսի ձևեր ու մեթոդներ մշակել, որ ընդունելի լինի բոլոր կրոնների և եկեղեցիների պետերին:

* *

Հայ ժողովրդի համար ևս Սրբալույս Մեռոնը, որպես նվիրական և խորհրդավոր սրբություն, սերտորեն կապված է քրիստոնեական պաշտամունքի հետ, ուստի և ամեն մի իր և անձն ա՛յն ժամանակ է միայն սրբազան ույժ ստանում նորա աչքին, երբ Սրբալույս Մեռոնի դրոշմը կա վերան: Նա խաչ է հանում երեսը՝ Եկեղեցու, Ս. Սեղանի, Ս. Ավագանի և սրբոց պատկերների առաջ, որովհետև Սրբալույս Մեռոնով սրբազորված են, համբուրում է եկեղեցու պաշտոնյայի աջը, որովհետև օծյալ է:

Հայ Եկեղեցին մի ազգային գեղեցիկ ավանդություն ունի, այն՝ որ Սրբալույս Մեռոնի օրհնությունը սկիզբ է առել Ս. Լուսավորչից և ամեն անգամ՝ նոր Մեռոն օրհնելիս՝ հին Մեռոն են խառնում հետը, Գրով Ս. Լուսավորչի օրհնած Մեռոնի խմորը անցնում է նորին, և այսպես Սրբալույս Մեռոնը կապում է հայի ներկան հեռավոր անցյալի հետ:

Սրբալույս Մեռոնը հանդիսանում է նաև ամենասերտ և անխզելի զոդը, որով՝ ի սփյուռս աշխարհի տարածված հայությունը կապվում է իր քրիստոնեության ծագման վայրի՝ Մայր Աթոռ Ս. Էջմիածնի հետ: Այս կապն է պատճառը, որ երբ Սրբալույս Մեռոնի կաթսան դրվում է Երկնավոր Ճարտարապետի ցուցմամբ հիմնված Միածնաէջ Տաճարի Ս. Սեղանի առաջ, բեմի վերա, և Ս. Լուսավորչի հաջորդ՝ Ամենայն Հայոց Ընդհանրական Հովվապետի օրհնության կոնդակը հրավիրում է իր հավատացյալ հոտին՝ դեպի հանուրց Հայաստանյայց Մայր Աթոռը՝ հանդիսատես և տոնակից լինելու Սրբալույս Մեռոնի մեծագույն և խորհրդավոր հանդեսի կատարմանը՝ արտասահմանից և հայրենի երկրի հեռավոր և մերձավոր վայրերից գալիս ու համախմբվում է հայ ժողովուրդը Մայր Աթոռի շուրջը, ուր տեղի է ունենում այնպիսի մեծաշուք և հոգեպարար հանդես, որի նմանը չկա հայ մարդու համար ո՛չ մի տեղ և ո՛չ մի առթիվ:





ԱՄԿ



ԳԱՐԵԳԻՆ ԿԱԹՈՂԻԿՈՍ

ԷԶՄԻԱԾՆԻ ԵՎ ԿԻԼԻԿԻՈ ԱԹՈՌՆԵՐԸ

Ա.

«Հասկ»-ի նախընթաց համարի մեջ տպվեցավ Նորին Սրբութիւն Տ. Տ. Գևորգ Ամենայն Հայոց շնորհազարդ Կաթողիկոսի անդրանիկ կոնդակը: Վեհապետների գահակալական ճառերը, առաջին հրովարտականները, կոնդակներն ու գրութիւնները սովորաբար հանրային բնույթ են կրում, մի տեսակ հայտարարներ իրենց լավագույն իղձերի և ծրագիրների, բնորոշող նրանց ուղղութիւն, գործելակերպի: Մի ամբողջ տարի անցավ Նորին Սրբութեան ընտրութեան և օծման օրերից, մինչև անդրանիկ կոնդակի ստացումը. այդ հապաղումը, որքան տեխնիկական պատճառներ ունեցած լինի, կամենում ենք և մի բնորոշող գիծ համարել Նորին Սրբութեան գործելակերպի: Մի քիչ ուշ, բայց մտածված, հիմնավոր. ոչ արագ, բայց կատարյալ: Ուշացավ Աղգային-եկեղեցական ժողովի գումարումը, բայց նախապատրաստվեցավ և կատարվեցավ ավելի լավ, քան մեր ականալուծութիւններն էին:

Այդպես էլ ուշացավ կոնդակը, բայց եկավ մեզ գեղարվեստական հանդերձանքով, և հմտալից, բազմաբովանդակ ձևակերպու-

թյամբ. ճակատը զարդարված հայ մանրանկարչական արվեստի ոճով, խորանով և լուսանցքի զարդերով, ինչպես մեր նախկին հայրապետների սովորութիւնն էր. տպագրութիւնն էլ կապույտ, երկնագույն մելանով, մաքուր և ճաշակով, իսկ բովանդակութիւնը չափված և ձևված, գիտակցական և կարգավորյալ ծրագրով:

Բ.

Մեզ անհուն ուրախութիւն է պատճառում կոնդակի ընդհանուր մտայնութիւնը, որ սիրո և միութեան գաղափարն է, և որ արտափայլում է ամեն պարբերութեան մեջ, բայց հատկապես, սրտագին հարաբերութիւնը բոլոր Աթոռների հետ և ջանք այդ հարաբերութիւնը դարձնել ավելի սերտ, իրար լրացնող և դեպի նույն նպատակն ուղղված, որ Հայաստանյայց Եկեղեցու միասնականութիւնն է, համերաշխութիւնը և բարերար ազդեցութիւնը հոտի ամբողջութեան վրա:

Սուրբ Հայրապետը անցած ժողովը համարում է իրավամբ բացառիկ երևույթ մեր պատմութեան մեջ, յուր լրիվ կազմով և ներկայացուցչութեամբ բոլոր Աթոռների և եպիսկոպոսութիւնների, հոգևոր և աշխարհիկ

պատգամավորներով, շեշտելով, մանավանդ, մեծ Աթոռների գահակալների անձամբ մասնակցությունը:

«Յայտնեմք զուրախութիւն Մեր և զգոհունակութիւն հոգևոր Եղբօր Մերում Տ. Գարեգնի շնորհազարդ Կաթողիկոսի Տաճն Կիլիկիոյ, որ ընդ եկեղեցական և աշխարհական պատգամաւորք իւրովք նպաստաւոր եղև յոյժ միասնականութեան Հայաստանեայց Եկեղեցւոյ և բարձր տրամադրութեան ժողովականաց և առհասարակ յաջող վերջաւորութեան ժողովոյս ըստ ամենայն մասանց: Զնոյն յայտնեմք և Ամենապատիւ Պատրիարքին Երուսաղեմի Տ. Կիրղի և Տեղապահի Պատրիարքութեան Կոստանդնուպոլսոյ Տ. Գեորգայ արքեպիսկոպոսի Արսլանեան:»

Այս խոսքերն ընդունելով որպէս առհավատչա եղբայրական սրտագին հարաբերութեան, պատասխանում ենք, թե պարտականութիւն ենք համարում Մեր բոլոր ուժերը, գրիւը, խոսքը, փորձառութիւնն ու պաշտոնի հեղինակութիւնը ի սպաս դնել բոլորանվեր ընդհանուր Հայաստանյայց Եկեղեցու փառքի, պայծառութեան և բարոյական ազդեցութեան զորացման համար:

Ընդունելով Ամենայն Հայոց Կաթողիկոսի գերագահ դիրքը, կկամենայինք, որ ըստ ամենայնի պահպանվեր նրանց պատշաճ հարաբերությունը ըստ պաշտոնի և կոչման, ինչպէս այդ դժվեցավ Սահմանադրութեան մեջ: Միասնականութիւնը չպետք է շփոթել միապետութեան հետ և ոչ ընդհակառակը: Միասնականութիւնը կամենում ենք իրականացած տեսնել գիտակցական փոխադարձ հասկացողութեամբ և հարգանքով կատարված պարտքերի, նպատակների և ձգտումների միութեան մեջ, իրար զորավիգ և նեցուկ լինելու և Աթոռների սերտ գործակցութեան մեջ, յուրաքանչյուրը յուր պարտքի և իրավունքի շրջանում: Մենք, իբրև Կիլիկիոյ Հայրապետական Աթոռի Գահակալ, պատրաստ ենք Մեր կարելին բերել, հավերժացնելու ավելի սերտ, ավելի գիտակցական և միեւնոյն ժամանակ ավելի շրջահայաց հարաբերություն Մայր Աթոռի հետ, առաջնորդվելով միշտ առաքելի խոսքով, թե «գիրն սպանանէ, այլ հոգին կեցուցանէ»: Կյանք բերող հոգին է Եկեղեցու համար ամենից կարևորը, որ պիտի զորաց-

նենք և հավերժացնենք փոխադարձ համերաշխութեամբ և գործակցութեամբ:

Երուսաղեմի Պատրիարքութիւնը ժողովրդական բազմութեան տեսակետով համեմատաբար սահմանափակ էր մինչև նախընթաց պատերազմ, մինչև մեր գլխին եկած մեծ աղետը, բայց իբրև հինավուրց և պատմական Աթոռ Ս. Երկրի մեջ, ներկայացնում է նա Հայաստանյայց Եկեղեցին՝ միջազգային տարողութեամբ: Պատրիարքութիւնը յուր միաբանութեամբ ոչ միայն մեր սեփականութիւնների և իրավունքների պաշտպանն է եղել, այլև յուր բաժինն է բերել և պիտի բերե մեր հայագիտական և եկեղեցական գրականութեան մեջ: Մեր երկու Աթոռների մերձավորութիւնը տարածութեամբ, հնարավորութիւն է տալիս նաև բարոյական մերձավորութեան, ի շահ և ի բարգավաճումն Հայաստանյայց ընդհանուր Եկեղեցւոյ և Մայր Աթոռի հեղինակութեան: Պետք է ի նկատի ունենալ, թե ձեռքերը որքան էլ երկար լինեն, ամեն տեղ հասնել չեն կարող:

Զմտնանք սրտի ճմլումով հիշել և Կոստանդնուպոլսի Պատրիարքութիւնը՝ յուր հոտի և գործունեութեան սեղմված վիճակով:

Գ

Վերջին տասնյակ տարիներում Աթոռների ավելի սերտ և համերաշխ գործակցութեան զաղափարը էջմիածնում զբաղեցրել է մտքերը, և Կիլիկիոյ Աթոռի կողմից առանց պատասխանի չէ մնացել: Դուրս հետևանքն էր, որ Ամենայն Հայոց Կաթողիկոսի ընտրութեան կանոնադրութեան մեջ մտաւ և Կիլիկիոյ Կաթողիկոսութեան մասնակցութիւնը: Ուրախ ենք, որ այդ մեծ բախտը Մեզ վիճակվեցավ իրագործված տեսնել, անձամբ մասնակցելով և նախագահելով ընտրական ժողովին:

Միասնականութեան և միութեան այդպիսի հասկացողութեամբ էր, որ առաջարկեցինք Հայաստանյայց բոլոր եկեղեցիներում Ամենայն Հայոց Կաթողիկոսի անվան հետ հիշել և մյուս աթոռականների անունները, որ ժողովի կողմից միաձայնութեամբ ընդունվեցավ: Սպասում ենք Ամենայն Հայոց Կաթողիկոսի պաշտոնական հայտարարութեան, շփոթութեանների և բազմաձևութեան այս երևույթը մեջտեղից վերացնելու:

Այս մտքով էր, որ Աթոռի Սսից էջմիածին փոխադրվելու հինգհարյուրամյակը տոնախմբելու առաջարկին ընդառաջ զնացինք, ավելացնելով, որ շեշտվի նաև Կիլիկիոս և մյուս Աթոռների կատարած դերը ազգապահպանության մեջ, որպեսզի այդ տոնախմբությունը որպես հակադրություն շահակացվի:

Այս մտքով էր, որ Մեր աղքատության մեջ, իբրև տեղափոխված և յուր հարստությունից զրկված հաստատության ներկայացուցիչ, Մեր լուսման ձգեցինք Մայր Աթոռի պահպանության փանծարանի մեջ, իբրև նվեր մեր թեմերի, վերան ավելացնելով եկեղեցական պատգամավորների ճանապարհածախսից մնացած գումարը, որի մասին առիթ կունենանք ընդհանրության տեղեկացնելու:


Վերջին և նորագույն ապացույցը երկու Աթոռների համերաշխ գործակցության գալիս

է էջմիածնից՝ Տ. Տ. Գևորգ Կաթողիկոսի կողմից, առաջարկելով Մեզ՝ ձեռնհրեց լինել Հինգհարյուրամյակի տարեդարձին նվիրվելիք գիտական ժողովածուի կազմության¹: Չնայելով Մեր սլաքտավորություններով ծանրաբեռնված վիճակին, հանձն ենք առել սիրով, որպեսզի կրկին և կրկին շեշտենք երկու Աթոռների հղբայրական գործակցությունը:

Աստված օրհնե համերաշխության և փոխադարձ հասկացողության այս ոգին, որպեսզի մեր մեծ կործանումից հետո, վերածնության և վերակազմության մղվելու ռեզոնանսային Եկեղեցու և հայրենիքի համար:

(Անթիլիաս, «Հասկ» ամսագիր, 1946 թ.,
№ № 7—8, էջ 197—199):

¹ Տե՛ս «Հասկ», 1946 թ., № № 7—8:





ՊԱՐԳԵՎ ԵՊԻՍԿՈՊՈՍ ԳԵՎՈՐԳՅԱՆ

(Հոգևոր հովիվ Մոսկվայի հայոց)

ԱՆՄՈՌԱՆԱԼԻ ՎԵՀԱՓԱՌԸ

Գեղեցիկ է արևի մայրամուտը Մայր Աթոռում, մանավանդ աշնանային ջինջ և պայծառ երեկոներին, երբ խորհրդավոր լուսթյան մեջ, Ս. էջմիածնի Մայր Տաճարի դեմուղեմ կանգնած, դիտում ես ծիրանավառ ճառագայթների գմբեթն ի վեր սահբքը, վերջին շողբը...

Այդպիսի երեկոներից մեկն էր, 1950 թվականի աշնանը: Երջանկահիշատակ Գևորգ Զ Կաթողիկոսը մեզ՝ սարկավազներին, իր հոգևոր զավակներին, հրավիրել էր Վեհարան՝ խոսք ու զրույցի: Հայրական խրատներ և հորդորներ տալուց հետո, երբ պատրաստվում էինք հրաժեշտ առնելու, հոգեւույս Հայրապետը հուզված ձայնով ասաց. «Սիրելի սարկավազներ, ոչինչ չկա հավիտենական կյանքն էլ անցավոր է. վաղը, մյուս օրը ես էլ կմեռնեմ: Դուք եք, որ պիտի պահեք իմ հիշատակը. ձեզանով է, որ պիտի ապրեմ. դուք եք, որ իմ գերեզմանի մոտով անցնելիս, «Հոգևոր» պիտի ասեք»:

Այդ օրվանից տարիներ են անցել: Ոչ ևս է երջանկահիշատակ Կաթողիկոսը: Մայիսի 9-ին լրանում է նրա մահվան 10-րդ տարեկիցը: Ես, որպես նրա ձեռքի տակ դաստիարակված և մեծացած հոգևորական, իմ որդիական պարտքն եմ համարում հուշերի կարգով վեր հանել իմ հոգևոր ծնողի, Հայ Եկեղեցու անկրկնելի մեծություններից մեկի, մեծ հայրենասերի արժանիքները, որպես Ամեն-

նայն Հայոց Կաթողիկոսի, որպես հայ եկեղեցականի և հայ մարդու:

Այսօր էլ, տարիների մշուշի միջից, իմ հիշողության մեջ երջանկահիշատակ Կաթողիկոսը պատկերվում է հին Վեհարանի ընդունելության դահլիճում, առանց վեղարի նստած, ուշադիր, քիչ խիստ դեմքով, դիմացինին լսելու դիրքով:

Բարձրահասակ, քաջալանջ, լայն ճակատով, երկար, նոսր մորուքով, նեղ, բայց սուր և արտահայտիչ աչքերով, փառահեղ ծերունի էր: Առանձնապես ազդեցիկ էր, երբ հայրապետական լրիվ զգեստավորման մեջ, միաբանների ուղեկցությամբ, հանդիսաբալլ Մայր Տաճար էր առաջնորդվում կամ Վեհարանի դահլիճն էր մտնում, հյուրերին ընդունելու:

Բնավորությամբ ծանրախոհ էր, խորաթափանց, հաղորդական և պայծառատես: Յուրաքանչյուր խոսքը կշռութավոր էր և տրամաբանված: Արտահայտություններն ինքնատիպ էին, պարզ, խոր և մտածված: Այդ է պատճառը, որ նրա հետ մեկ անգամ խոսողներն իսկ միշտ հիացմունքով են հիշում իրենց հանդիպման մասին:

Իմ հուշերը, կապված Գևորգ Զ Կաթողիկոսի հետ, սկսվում են ճամարանական տարիներից:

1945 թվականի հունիս ամսին ավարտվեցին նորաբաց Ճեմարանի ուսումնական



Երջանկահիշատակ Գևորգ Զ Կաթողիկոսի վերջին լուսանկարը

(Գործ՝ նկարիչ Ստեփան Մինասյանի)

«Վարդանանց պատերազմը,—ասաց Վեհափառը,— հայ ժողովրդի ազնվություն, հերոսություն, ազատատենչ ոգու, ազատ հայրենիք ունենալու մեծագույն վկայարանությունն է: Յուրաքանչյուր ժողովրդի պատմության մեջ կա անկյունաքարձային մի կետ, որով տվյալ ժողովրդի կամ պատմությունն է սկսվում, կամ էլ այդ րոպեից սկսած՝ նրա աստիճանաբար անկումն ու իսպառ անհետացումը պատմության բնմիջ:

Վարդանանց հերոսամարտը հայ ժողովրդի պատմության կրիտիկական անկյունաքարն էր, հայ ժողովրդի հավիտենականության և անմահության խորհրդանշանը: Ահա թե ինչու՞ Վարդանանց հիշատակը ընդմիշտ դրոշմվել է մեր ժողովրդի սրտում և դարձել ազգային ամենաբարձր և ամենանվիրական պաշտամունքը»:

Խոսում էր Վեհափառը... Դարերի հնության գաղտնարաններից վեր էին ելնում և կանգնում մեր հոգեկան աշխարհի մշուշապատ հորիզոնում Վարդանանք, իրենց անմեռ սխրագործություններով:

Վեհափառի սրտահույզ և հայրենաշունչ խոսքերն այն աստիճանի ոգևորիչ էին, որ հյուրերից մեկը, չկարենալով զսպել իրեն ալիկոծող զգացումը, բացականչեց. «Յավդ տանեմ, Վեհափառ ջան, վառեցիր մեզ»:

Խոսելով Հայ Եկեղեցու մասին, Գևորգ Զ Կաթողիկոսն իր կոնգակում գրում է. «Հայաստանյայց Ազգային Սուրբ Եկեղեցին ոչ միայն հոգևոր կրոնական հաստատություն է, այլև միաժամանակ ազգային հայրենական»: Ազգային կրոնական այս երկակի բնությունը նա շաղկապում էր իրավ հայրենասիրության և եկեղեցասիրության գաղափարով և պահանջում էր յուրաքանչյուր հոգևորականից հասկանալ այդ հանգամանքը և գործի կարևորությունը գիտակցությամբ ծառայել Հայ Եկեղեցուն:

Այդ տեսակետից ուշագրավ է հետևյալ միջադեպը: Ծննդարանի սաներից երկուսը սարկավազ ձեռնադրվելուց հետո, ըստ սովորության, ձեռնադրող եպիսկոպոսի հետ միասին ներկայանում են Վեհափառին՝ նրա օրհնությունն և ստանալու նպատակով: Վեհափառը սիրով է ընդունում նրանց, այնուհետև տալով իր հայրական հորդորները, հարցնում է սարկավազներից մեկին, թե ինչո՞ւ համար է հոգևոր կոչում ստացել: Վերջինս անակրկալի է գալիս, թերևս շփոթվում է Վեհափառի պատկառազու անձնավորությունից, և քթի տակ ինչ-որ անհասկանալի խոսքեր է կմկմում: Վեհափառն իսկույն մթազնում է. «Եթե չգիտես, թե ինչո՞ւ համար ես սարկավազ դառնում, ինչո՞ւ ձեռնադրվեցիր»: Մյուս սարկավազը տեսնելով, որ գործը լուրջ

բնույթ է ստանում, մոտենում է ընկերոջը և ականջին փսփսում. «Մի՞թե Վեհափառին չես ճանաչում, ասա, որ Եկեղեցու միջոցով նաև Մայր Հայրենիքին ծառայելու նպատակով եմ սարկավազ ձեռնադրվել»: Վերջապես շփոթված սարկավազը ուշքի է գալիս և կրկնում ընկերոջ թեկադրած խոսքերը: «Ապրես,— ասում է Վեհափառը մեղմացած,— այդպես ասա, Ես էլ հենց այդպես եմ ուզում»:

Այս փոքրիկ դեպքը Վեհափառի հայրենասիրական զգացման բնորոշ կողմերից մեկն էր: Որքան էլ անտրամադիր լինեիր, ընթացիկ գործերով ծանրաբեռնված, հենց որ խոսքը դառնում էր հայրենիքի և հայ ժողովրդի մասին, իսկույն նա փոխվում էր, խանդավառվում, և, հոգնածությունը մոռացած, քաղցր և սիրալիր շեշտով խոսում էր իր սրտին մոտ և հարազատ նյութի շուրջ:

Գևորգ Զ Վեհափառի կաթողիկոսության շրջանին Հայ և Ռուս եկեղեցիների միջև իսկական բարեկամական հարաբերություններ ստեղծվեցին, որոնք դարձան սրտագին ավանդություններ:

«Անցյալներում,—ասում էր Վեհափառը,— ցարական Ռուսաստանը, ղեկավարվելով «բաժանիր և տիրիր» սկզբունքով, դրանով իսկ արգելք է հանդիսացել եկեղեցիների միջև սերտ կապեր ստեղծվելուն: Մեր օրերում, երբ օրավուր ամրապնդվում է բարեկամությունը մեր մեծ հայրենիքի բազմազգ ժողովուրդների միջև, Հայ և Ռուս քույր եկեղեցիները, որոնք հիմնված են քրիստոնեական սիրո, եղբայրության և բարեկամության զաղափարների վրա, չեն կարող իրար նկատմամբ օտարներ մնալ:

Ինչ վերաբերում է ընդհանրապես եկեղեցիների միություն խնդրին, ապա դա հեռավոր պատգալի հարց է, երբ նախադրյալներ կստեղծվեն այդպիսի մի մեծ գործի համար: Կոնկրետ խոսելով մեր Եկեղեցին ուրիշ եկեղեցու հետ միացնելու մասին, ուղղակի պետք է ասենք, որ մեր Եկեղեցին դրա կարիքը չի զգում: Մեր Եկեղեցին պարտականություն ունի իր ժողովրդի հանդեպ. նա, ինչպես անցյալում, այսուհետև ևս պետք է ծառայի ազգապահպանման և ազդեցական սուրբ գործին»:

Գևորգ Զ երջանկահիշատակ Կաթողիկոսի երազանքներից մեկն էր երիտասարդ, բարձր կրթություն ունեցող վեղարավորներ տեսնել Մայր Աթոռում: Այդ նպատակին հասնելու համար, նա մեծ հույսեր էր կապել նորաբաց Ծննդարանի սաների հետ: Երբ 1948 թվականին Ծննդարանի սաներից հինգ հոգի սարկավազ ձեռնադրվեցին և հետո նրանց թիվը հասավ ութի, Վեհափառը բոլորին իր հոգեզավակները համարելով, հատուկ ուշադրու-

թյուն դարձրեց նրանց ուսուցման և դաստիարակության գործի վրա: Նրան չէին բավարարում սարկավազների ձեմարանում ստացած գիտելիքները, միտք ուներ նրանց աստվածաբանական և հայագիտական համալսարաններ ուղարկել: «Մայր Աթոռի միաբանները թող քիչ լինեն, բայց կրթված. ինձ տիրացու հոգևորականների պետք չեն,— հաճախ ասում էր հոգեւույս Հայրապետը և ավելացնում.— Դուք եք իմ միակ հույսը: Դրա համար էլ աղոթում եմ առ Աստված, որ պեսդի ձեզ վեղարներով շտեմած, գերեզման չմտնեմ»:

Մեր ուսման պակասը լրացնելու նպատակով, Վեհափառը երկու շաբաթը մեկ անգամ մեզ Վեհարան էր հրավիրում և ժամեր շարունակ խոսում Հայ Եկեղեցու պատմության, աստվածաբանության և հայագիտության թեմաների շուրջ:

Տարիներն անցնում էին, Գևորգ Զ Կաթողիկոսի սերն ու գուրգուրանքը մեր նկատմամբ ավելանում էր, վերածվելով ծնողական ջերմ զգացման: Բանը հասել էր այնտեղ, որ միաբանական հանդիսավոր ճաշկերույթներին, նախքան ճաշասրահ մտնելը, հարցնում էր շաթիրին. «Գրիգոր, մի տես, սարկավազներս եկե՞լ են»: Բացի դրանից, թույլ էր տվել, առանց իր հրավերին, երբ ինքը զբաղված չի լինի, խմբով կամ առանձին գնալ իր մոտ Այգայիսի օրերին Վեհափառին գտնում էինք Վեհարանին կից պարտեզի փոքրիկ տաղավարում նստած, մտածկոտ, և երբեմն էլ հագվի լսելի, ժերունական ձայնով Կոմիտասյան հանրածանոթ երգի հետևյալ բառյակը երգելիս.

Հով արեք, սարե՛ր ջան, հո՛վ արեք,

Իմ դարդին դարման արեք:

— Սարերը հով չեն անում,

Իմ դարդին դարման անում:

Մոտենում էինք Վեհափառին: Մեզ տեսնելուն պես, հայրական քաղցր, անուշ ժպիտով

ասում էր. «Հը՛, ի՞նչ կա, աղնե՛րդ է պակաս, թե՛ մաղներդ»: Հետո սկսվում էր մտերմական զրույցը ուսման մեջ ցուցաբերած մեր առաջադիմության, ապագա անելիքների և այլ հարցերի մասին: Վերջում, հրաժեշտի ժամանակ, եթե որևէ խնդրանք չունենայինք, հարցնում էր. «Որևէ բանի կարիք չունե՞ք, լինի՞ հարստացել եք»:

Գևորգ Զ Վեհափառը հմուտ էր եկեղեցագիտության և հայագիտության բոլոր ճյուղերի մեջ: Հմտություն ուներ նաև արտաքին գիտությունների մեջ: Ազատ կերպով խոսում էր գերմաներեն: Ռուսերեն լեզուն գիտեր կատարելապես:

Զինված լինելով հոգևորական անհրաժեշտ բարձր գիտելիքներով, ունենալով խորաթափանց միտք, հոգևոր գործեր ղեկավարելու բազմամյա տարիների փորձ, եկեղեցական ընթացիկ բարդ խնդիրները ճշգրտորեն վճռելու և կարգավորելու արտակարգ կարողություն, երջանկահիշատակ Գևորգ Զ Կաթողիկոսը վայելում էր հայ և օտար եկեղեցիների հոգևորականության անկեղծ սերն ու հարգանքը: Մինչև այսօր էլ, Մոսկվայի և համայն Ռուսաստանի Պատրիարք Նորին Սրբություն Ալեքսիս հարգանքով և ականածանքով է արտահայտվում հոգեւույս Վեհափառի մասին: «Լավագույն տպավորություններով եմ հիշում երանելի Գևորգ Զ Կաթողիկոսին,— ասում է Սրբազան Պատրիարքը,— չափազանց խելացի և իմաստուն հոգևորական էր»:

Գևորգ Զ Վեհափառը Մայր Աթոռ Ս. Էջմիածնի նախկին միաբանության վերջին մեծ «Քյոթուկ»-ն էր, հին սերնդի վերջին և պատկառելի ներկայացուցիչը: Նրա հիշատակը, որպես Ամենայն Հայոց Կաթողիկոսի, որպես հայրենասեր մարդու և Հայ Եկեղեցու անբաժանելի միասնականության անխոնջ պաշտպանի, երկար կապրի սերունդների սրտում և իր արժանի տեղը կգրավի Հայ Եկեղեցու նորագույն շրջանի պատմության մեջ:





ՎԱՀԱՆ ՎԱՐԴԱՊԵՏ ՏԵՐՅԱՆ

(Փոխանորդ Աւարտոյան քնմի)

ՄԵԾԱԳՈՐԾ ԵՎ ՀԱՅՐԵՆԱՍԵՐ ՀԱՅՐԱՊԵՏԸ

Մայիսի 9-ին լրանում է երջանկահիշատակ Գևորգ Զ Աթողիկոսի մահւման 10-րդ տարեւոյցը։ Որպէս մեկը նրա զահակալութեան օրերին բացված Հոգեւոր Ծեմարանի սաներից, 1946 թվականից սկսած վայելել եմ նրա հայրական խնամքն ու հոգատարութիւնը նախ որպէս աշակերտի, և ապա որպէս սարկավագի և միաբանի։

Այսօր հուշումով եմ հիշում Հոգեւոր Ծեմարանում մեր անցկացրած տարիները և փորձում եմ նրա հիշատակին մեկ-երկու տող նվիրել, որպէս որդիական երախտագիտութիւն։

Ինձ նման շատեր իրենց ուսման, դաստիարակութեան և կրթութեան համար պարտական են հայրենասեր, մեծագործ և իրավամբ աղնվական այն մարդուն, որը մոտ 60 տարիներ նվիրումով և աննահանջ սիրով ծառայել է հայ ժողովրդին, Նկեղեցուն և հայրենիքին։

Գևորգ Զ-ը Մայր Աթոռի վերջին շրջանի հոգեւորականութեան ինքնատիպ և պայծառ դեմքերից մեկն է, որպէս մարուր հայրենասեր, պատրաստված և իր կոշման բարձրութեան վրա գտնվող հոգեւորական։ Իմ աչքերի առաջ է այսօր էլ նրա պարթևական հասակը, առույգ, պայծառ կերպարը, իմաստութեամբ լի նրա խոհուն և բարի աչքերը և լայն ճակատը։ Նրա շարժումների և խոսվածքի մեջ կար տպավորիչ մի վեհութիւն, որը չէր ձնշում, բայց գրավում էր քեզ, իրեն ենթարկում և հմայում։

Ձի կարելի նրան չհիշել և խորապէս չսիրել ճանաչելուց հետո։ Հուշումով եմ հիշում այն օրերն ու ժամերը, երբ բոլորված նրա շուրջը, լսում էինք նրա խոսքերը, պատգամները, ոգևորվում էինք և խոստանում մեր համեստ ուժերով թեթևացնել նրա ուսերին դրված ծանր պարտականութիւնները։

Սիրում էր մեզ, հետաքրքրվում մեր կյանքով, մեր դաստիարակութեամբ, ուրախանում էր մեր հաջողութիւններով և մերթ տխրում մեր սայթաքումներով։

Սակայն նրա բարի ժպիտը, ներողամիտ հայացքը քաջալերում և ոգևորում էին մեզ։

Այդ աղնվական մարդը իրապէս նստել էր մեր մտածմունքների, մեր զգացմունքների և մեր կյանքի մեջ։

Տասը տարի է անցել նրա մահւմանից, և երբ այսօր, մեր սիրելի Վաղգեն Ա Հայրապետի զահակալութեան օրերին, ծաղկում է Մայր Աթոռի կյանքը շատ բնագավառներում, իմ մտածմունքը գնում է այդ բարի ծերունուն, որ մահւման անկողնում իր վերջին խրատն էր ուղղում մեզ, աչքերը համարտան փակելուց մի քանի րոպեներ առաջ. «Սիրեցիք Ս. էջմիածինը...»։

Մահւման անկողնում նրա վերջին խոսքն էր ուղղված մեզ, երբ շրջապատել էինք նրա սնարը. «Հիշեցեք... Ինձ...»։ Ու մենք միշտ հիշում ենք ու կհիշենք նրա պայծառ անունը և մեծ գործը։

Հանգուցյալ Գևորգ Զ Հայրապետը ծնվել է 1869 թվականի նոյեմբերի 2-ին, Նոր-Նա-

խիջեան քաղաքում, հավատալով, հայրենասեր և բարեպաշտ արհեստավորի ընտանիքում¹։ Վեհափառի ծնողները և պապերը եղել են արհեստավորներ, իրենց օրվա հացը ձարել են աշխատանքով։ Հայրն էր խաշատուրը, Մայրը՝ Կատարինեն, բարի, առաքինի, աղքատասեր և ավանդապահ մի կին, որ իր երեխայի վրա թողել է խոր ազդեցություն, երեխայի վրա թողել է խոր ազդեցություն, որպես նրա առաջին դաստիարակը։ «Մոր ժողովրդականությունը, կարոտյալներին օգնելու ամենօրյա ջանքերը, եկեղեցասիրությունը և անսահման հավատը խորը տպավորություն թողել է մանկան հոգում», — գրում է նրա կենսագիրներից մեկը (տե՛ս «Էջմիածին» ամսագիր, 1950 թ., № 1, էջ 14)։

Մանուկ Գևորգը իր նախնական կրթությունն ստանում է Նոր-Նախիջևանի Ս. Աստվածածին ծխական դպրոցում, Մինաս քահանա Բախալյանի տեսչության օրոք։

Միական դպրոցի եռամյա դասընթացը հաջողությամբ ավարտելուց հետո, նա շարունակում է իր կրթությունը տեղական հոգևոր դպրանոցում։

1879 թվականին, ուսումնասինել և խոստումնալից պատանին, իր ուսումը շարունակելու համար, ընդունվում է Գևորգյան ձեմարան, որի դասընթացը փայլուն կերպով ավարտում է 1886 թվականին։ Այնուհետև նա կատարելագործվում է ձեմարանի լսարանական բաժնում, տեսուչ Արշակ Նահապետյանի օրով, և 1889 թվականին, մի խումբ ընկերների հետ, հաջողությամբ ավարտում է ձեմարանի լսարանական բաժինը։ Ձեմարանական ուսանողական տարիներում Գևորգ Զ-ի վրա խոր տպավորություն է թողնում Մաղաթիա արքեպիսկոպոս Օրմանյանը։ Հանգուցյալն ասում էր, թե ինքը եղել է Օրմանյանի հետևողական աշակերտը։

Ձեմարանը ավարտելուց հետո, հանգուցյալ Հայրապետը որոշում է նվիրվել հոգևոր ասպարեզին և այս ճանապարհով ծառայել իր ժողովրդին, Ս. Եկեղեցուն։ Այս հաստատ որոշումով, 1889 թվականի հունվարի 17-ին, մի խումբ ընկերներով, որոնց թվում Ա. Նահապետյան, Կարապետ Տեր-Մկրտչյան, Գարեգին Հովսեփյանց, ընդունում է սարկավագություն լուծը։

Մայր Աթոռում կատարված սարկավագության այս ձեռնադրությունը իրապես հատկանշական երևույթ էր, որովհետև Գևորգյան ձեմարանը միայն 1889 թվականին, իր հիմնադրումից 15 տարի հետո, տալիս էր իր

առաջին հոգևորական երախայրիքը՝ Մայր Աթոռին ծառայելու։ Այդ ուրախ առիթով «Արարատ» ամսագիրը, 1889 թվականի 353-րդ էջում գրում է. «Ամսույս 17-ը և 18-ը հունիս (1889 թ.) նշանավոր օրեր էին։ Այդ օրերը կատարվեցին ի վաղուց ցանկալի ձեռնակատարվեցին Ս. Գայանեի վանքում՝ սրբազորությունը գերաշնորհ Ներսես եպիսկոպոսի ժուխմար ձեմարանը հինգետասնամյա Ս. Էջմիածնի ձեմարանը հինգետասնամյա երկունքից ետքը ի վերջո տվեց երախայրիքը Հայ Եկեղեցուն և ազգին։ 17-ին առավոտյան սարկավագության աստիճան ստացան ձեմարանի տեսուչ մեծահարգ Արշակ Նահապետյան և ձեմարանի ուսումնավարտ պ. պ. Կարապետ Տեր-Մկրտչյան և Գևորգ Զորեքչյան և 3-րդ լսարանի ուսանող Գարեգին Հովսեփյան»։

Օրմանյան սրբազան Կոստանդնուպոլսից իր անկեղծ, խանդավառ գոհունակությունն էր հայտնում իր աշակերտներին՝ Գևորգին, Գարեգինին և Կարապետին այս վճռական քայլի համար և օրհնում նրանց սարկավագության ուրարը։

Ուրախ էր նաև օրվա կաթողիկոսը՝ Մակար Ա, որը մեծ հույսեր էր կապել ձեմարանի գոյության և նպատակների հետ, պատրաստված և հավատալով հոգևորականներ ունենալու համար Մայր Աթոռում։

Մակար կաթողիկոսի պատշաճ կարգադրությամբ երեք սարկավագները՝ Գևորգ, Գարեգին և Կարապետ, ուղարկվում են Գերմանիա 1889 թվականին՝ շարունակելու իրենց ուսումը։

Գևորգ սարկավագը, որ ի բնի օժտված էր նաև ձայնական տվյալներով, ընդունվում է Լայպցիգի երաժշտանոցում, ինչպես նաև նույն քաղաքի համալսարանի աստվածաբանության և փիլիսոփայության ֆակուլտետներում։

1893 թվականին, Գևորգ սարկավագը ավարտում է Լայպցիգի երաժշտանոցն ու համալսարանը և, բազմակողմանի զարգացած, աշխատելու մեծ եռանդով, վերադառնում Մայր Աթոռ։

1894 թվականին Գևորգ սարկավագը նշանակվում է ձեմարանում ուսուցիչ եկեղեցական և աշխարհիկ երաժշտության։ Այնուհետև նա պաշտոնի է կոչվում իր հայրենի Նոր-Նախիջևան քաղաքի Ս. Գրիգոր Լուսավորիչ եկեղեցում, որպես խմբավար, միաժամանակ Բեսարաբիայի թեմի թեմական դպրոցի ուսուցիչ։

Երիտասարդ սարկավագը շուտով իր շուրջը ստեղծում է հետաքրքրություն և հեղինակություն։ Նա սիրվում է նաև իր աշակերտներից և համայնքից։

¹ Հանգուցյալ Հայրապետի ճգրիտ կենսագրությունը կազմելիս լայնորեն օգտվել ենք 1955 թվականին Մայր Աթոռի հրատարակած «Երջանկաբերական Ս. Ս. Գևորգ Կարապետի կյանքը և գործունեությունը» հատորից։

Մինչև 1915 թվականը նա Նոր-Նախիջևանում ծավալում է բեղմնավոր գործունեություն: Բոլորը նրան անվանում էին «Հայր սարկավազ»: Բնասարքիայի թեմը դիմում է էջմիածին, խնդրելով Գևորգ սարկավազին վարդապետ ձեռնադրել իր հայրենի քաղաքի՝ Նոր-Նախիջևանի համար, որպես առաջնորդական փոխանորդ:

1913 թվականի հունիսի 20-ին Գևորգ Ե կաթողիկոսը նրան կուսակրոն քահանա է ձեռնադրում և նշանակում Նոր-Նախիջևանի առաջնորդական փոխանորդ:

Առաջնորդական փոխանորդի պաշտոնավարման տարիներին, Գևորգ վարդապետ Չորեքչյանը հանդես է բերում իր վարչական ընդունակությունները և ղեկավարելու շնորհիվ:

1894—1915 թվականներին, իր հայրենի քաղաքում, Չորեքչյան վարդապետը եկեղեցական, վարչական, քարտզական և մանկավարժական գործունեություն է ծավալում, արժանանալով բոլորի երախտագիտության:

1916 թվականին, Ամենայն Հայոց կաթողիկոսի հրամանով, Գևորգ վարդապետը կանչվում է Մայր Աթոռ ծառայելու համար: Գևորգ վարդապետը 1916 թվականին տեղափոխվելով էջմիածին, որպես փորձառու և պատրաստված հոգևորական, արժանանում է Վեհափառ Հայրապետի ուղարկումը նրա և նշանակվում է Մինոքի անդամ:

«Գևորգ վարդապետը էջմիածնում մեծ աշխատանք է տանում նաև Մայր Աթոռի մատենադարանը կազմակերպելու և նոր ձեռագրերով հարստացնելու ուղղությամբ: Նրա նախաձեռնությամբ են ցուցակագրվում Արևմտյան Հայաստանի դանազան վանքերից բերված հայկական ձեռագրերը»:

1917 թվականի ապրիլի 15-ին, Ս. Նոյսիսի մեկ վանքում, ավագերիցություն Ս. Խորենի վարդապետ Լազարյանի, Գևորգ վարդապետին տրվում է ծայրագույն վարդապետության աստիճան:

Այնուհետև Մայր Աթոռում Գևորգ վարդապետը նշանակվում է Եղբայրական օգնության կենտրոնական կոմիտեի նախագահ:

Նրա անձնդիր և օգտաշատ աշխատանքը պատշաճ ձևով գնահատում է Գևորգ Ե Կաթողիկոսը և 1917 թվականին ձեռնադրում նրան եպիսկոպոս:

1918 թվականին վանքի միաբանությունը Գևորգ եպիսկոպոսին ընտրում է տնտեսական խորհրդի նախագահ:

«1921 թվականին Գևորգ սրբազանին է հանձնվում Մայր Տաճարի լուսարապետության պատասխանատու պաշտոնը»:

Նույն թվականի աշնանը Գևորգ սրբազանը նշանակվում է Թբիլիսիի թեմի առաջնորդա-

կան փոխանորդ, իսկ հաջորդ՝ 1922 թվականին թեմական-պատգամավորական ժողովը նրան միաձայնությամբ ընտրում է թեմական առաջնորդ: Երեք տարվա շրջանը լրանալուց հետո, 1925 թվականին, նա նորից վերընտրվում է Թբիլիսիի թեմական առաջնորդի պաշտոնում և շարունակում իր պաշտոնավարությունը:

1925 թվականին, Գևորգ Ե Կաթողիկոսը շնորհում է նրան արքություն:

1927 թվականին Գևորգ սրբազանը վերադառնում է էջմիածին և նշանակվում Գերագույն Հոգևոր Խորհրդի անդամ:

«Խորեն Կաթողիկոսի օրով Գևորգ սրբազանը հանդիսանում է նրա մոտիկ աջակիցը: Ազգային-եկեղեցական բոլոր կարևոր հարցերի լուծման ժամանակ Կաթողիկոսի ամենամոտիկ խորհրդատուն դառնում է Գևորգ սրբազանը»:

1936 թվականի ապրիլ 18-ի № 220 կոնգակով, Խորեն Կաթողիկոսը նրան նշանակում է հայրապետական տեղակալ:

Այնուհետև Մայր Աթոռում Գևորգ սրբազանի գործունեությունը ընթանում է երկու ուղղություններով.

1.— Որպես տեղակալ Ամենայն Հայոց Կաթողիկոսության (1938—1943) և

2.— Որպես Ամենայն Հայոց Կաթողիկոս (1945—1954):

1941 թվականի ապրիլի 10-ին Ս. էջմիածնում հրավիրվում է Ազգային-եկեղեցական ժողով, որը Գևորգ արքեպիսկոպոս Չորեքչյանին միաձայնությամբ ընտրում է ազգընտիր տեղակալ Ամենայն Հայոց Հայրապետության:

«Գևորգ արքեպիսկոպոսը, հայրենիքին ու եկեղեցուն ծառայելու մեծագույն պատրաստակամությամբ և խանդավառ հույսերով, ձեռնարկում է Մայր Աթոռը պահպանելու, բարեկարգելու և բարեդարձելու պատմական մեծ գործին»:

Ազգային-եկեղեցական ժողովը հազիվ էր վերջացրել իր աշխատանքները, երբ սկսվում է Հայրենական պատերազմը:

1943 թվականի փետրվարի 2-ին ազգընտիր տեղակալը գրեց իր հայտնի հայրենասիրական կոչը ուղղված հայ հավատացյալ ժողովրդին՝ «Սասունցի Դավիթ» անունով տանկային շարասյուն կառուցելու նպատակով միջոցներ հանգանակելու մասին:

«1944 թվականի հունվարի 29-ին, հանդիսավոր պարագաներում, սովետական քաջարի զորամասերին հանձնվեցին հայ հոգևորականության և հայ հավատացյալների միջոցներով կառուցված «Սասունցի Դավիթ» շարասյան տանկերը, որոնք շուտով մեկնեցին ռազմաճակատ»:



1916 թվականին Պետերբուրգում կայացած ալգալին-էկեկեցական համագումարին մասնակցող հոգևորականները
 Գևորգ վարդապետ Չորեքչյանի (կենտրոնում) գլխավորությամբ:

Սովետական կառավարությունը գնահատեց անձնվեր ու անխոնջ շովվի հայրենասիրական եռանդուն գործունեությունը. Տեղակալ Գևորգ սրբազանը արժանացավ «Կովկասի պաշտպանության համար» մեդալին:

1945 թվականի ապրիլի 19-ին ամենապատիվ Տեղակալը իր պատմական հանդիպումը ունեցավ ՍՍՄԽ Ժողկոմսովետի նախագահ Ի. Վ. Ստալինի հետ՝ «Հայ Եկեղեցու գործերի մասին»: Ամենապատիվ Տեղակալին հաջողվեց լուծել Մայր Աթոռին վերաբերող մի շարք կարևոր հարցեր և խնդիրներ:

1945 թվականի հունիսի 16-ին, Մայր Աթոռ Ս. Էջմիածնում, գումարվում է Ազգային-եկեղեցական ժողովը, զբաղվելու կաթողիկոսական ընտրությունների և Հայաստանյայց Առաքելական Եկեղեցուն վերաբերյալ մի շարք այլափոխական և հրատապ հարցերով:

1945 թվականի հունիսի 22-ին, Մայր Տաճարում, ժամը 3.30-ին բացվեց Ազգային-եկեղեցական սրբազումար ժողովի ընտրական նիստը՝ նոր Կաթողիկոսի ընտրությամբ զբաղվելու համար:

Ժողովի նախագահ Մեծի Տանն Կիլիկիայի Կենսափառ Գարեգին Ա Կաթողիկոսը ընտրությունից առաջ խոսում է իր հետևյալ պատմական գեղեցիկ ճառը.

«Ցանկալի պայմանների մեջ մենք հավաքված ենք այստեղ մեր Կաթողիկոսին ընտրելու: Առաջին անգամն է մեր ամբողջ պատմության ընթացքում, որ Տանն Կիլիկիո Կաթողիկոսը ներկա է գտնվում կաթողիկոսական ընտրությանը: Այսպիսի ժողովի գումարումը մեր պատմության մեջ հազվագյուտ է. շատ քիչ է պատահել, որ այսպիսի ներկայացուցչություն հավաքված լինի: Ազգային-եկեղեցական ժողովին են ներկայացել հեռավոր Ամերիկայի հայության ներկայացուցիչները, Եգիպտոսի, Անգլիայի, Ֆրանսիայի, Բալկանյան երկրների հայերի պատգամավորները և խորհրդային երկրների ու թեմերի առաջնորդներն ու ժողովրդական ընտրյալները: Որոշ տեղեկություններ կան, որ Հարավային Ամերիկայի պատգամավորները նույնպես ճամբար ելած են:

Արտաքո կարգի նշանակություն ունի այս համագումարը, որովհետև թե՛ մեր երկրամասի և թե՛ գաղութների այս ներկայացուցչությունը հանդես է բերում մեր Եկեղեցու միասնությունը:

Երդամար սկսեցինք այս ժողովը ազգի և Եկեղեցու անունով, կկամենայի, որ ժողովը նվիրական և սրբազան մնար իր պարտականությունների հանդեպ, կկամենայի այնպիսի ընտրություն կատարվեր, որ ընտրյալը լիներ ազգի ընտրյալը: Կաղոթեմ այս դարավոր Եկեղեցու սրբազան կամարների տակ, որ Տե-

րը առաջնորդե մեզ և մենք պատասխանատու լինեմք մեր խղճի և ժողովրդի առաջ» («Էջմիածին», 1945 թ., № 6—7, էջ 37):

Ազգային-եկեղեցական սրբազումար ժողովին ներկա եղող 111 պատգամավորների 110 քվեով, միաձայն, Կաթողիկոս է ընտրվում Գևորգ արքեպիսկոպոս Չորեքշաբու:

Վերջում հանդես է գալիս ընտրյալ Կենսափառ փակման հետևյալ հուզիչ, սրտազբալ ճառով.

«Շնորհակալություն բոլոր ճառ ասողներին:

Պատգամավոր Մեր դավաններն իրենց խոհական գործերով և իմաստուն խոսքերով հմայեցին Մեզ: Ժողովը ցույց տվեց շատ ընդգծելի կողմեր:

Տեսնում եմ հայ ժողովրդի դեպի Ս. Էջմիածինն ունեցած անհուն սերը. այդ սերն է, որ ձեզ հեռավոր վայրերից առաջնորդել է մինչև այստեղ, առ ոչինչ դարձնելով ճանապարհորդական նեղություններն ու դժվարությունները:

Հայ Եկեղեցին ցարդ բարոյական տեսակետով միասնական էր, բայց իրավական տեսակետով ոչ: Տանն Կիլիկիո Կենսափառ Կաթողիկոսը, նկատի չառնելով երկար ճամբորդության հետ կապված դժվարությունները, անձամբ եկավ իբրև ուխտավոր և ճշմարիտ ու դրական միասնականության հիմքը դրավ:

Այսօր տեսա համերաշխության ոգին վերադարձած մեր մեջ, որի համար պիտի աղոթեմ, որ այն մշտնջենական դառնա:

Տեսա ձեր բուռն զգացմունքը դեպի Ս. Էջմիածինը և դեպի մեր սիրելի Հայրենիքը, որ բարձր վերելքներով փառավորվում է: Պիտի աղոթեմ հայրենիքի և պետության զորացման համար»:

1945 թվականի հունիսի 24-ին, ավանդական և մեծահանդես շքով, կատարվեց նորընտիր Կաթողիկոսի հայրապետական օծումը:

«1945 թվականի Ազգային-եկեղեցական մեծ ժողովում քննարկվեցին Հայաստանյայց Առաքելական Եկեղեցու համար չափազանց կարևոր մի շարք խնդիրներ և որոշումներ կայացվեցին նրանց նկատմամբ, որոնց կենսագործումը զրվեց նորընտիր Հայրապետի ուսերի վրա: Այս խնդիրներից ամենահրատապը և առաջնահերթը հանդիսանում էր Հոգևոր Ճեմարանի բացումը»:

Մայր Աթոռի Հոգևոր Ճեմարանը բացվեց 1945 թվականի նոյեմբերին:

Գևորգ Զ Կաթողիկոսի գահակալության օրերին, Մայր Աթոռի հոգևոր, կանոնական և գործարար կապը նվիրապետական Աթոռների, Սփյուռքի մեր թեմերի հետ ավելի բան ամրապնդվեց, սերտացավ: Թեմերի կազմակերպումը և նրանց կանոնական կապը Մայր

Աթոռի հետ, Գևորգ Զ Կաթողիկոսի ուշադրության կենտրոնումն է եղել միշտ:

Գևորգ Զ Կաթողիկոսի ամենօրյա և հոգատար ղեկավարության շնորհիվ կազմակերպվում են նաև ներքին թեմերը:

1944 թվականի սկզբին, Նրա նախաձեռնությամբ, իրագործվեց «Էջմիածին» ամսագրի հրատարակությունը, որպես պաշտոնաթերթ Ամենայն Հայոց Հայրապետության:

«Էջմիածին» ամսագիրը, իրականում, հանդիսացավ նախկինում հրատարակվող «Արարատ» ամսագրի շարունակությունը, որի խնդիրն էր հոգևոր սնունդ տալ հայ հավատացյալներին, կապ պահպանել Մայր Աթոռի և մեր ազգային-եկեղեցական թեմերի միջև, զարգացնել ու խորացնել Հայաստանյայց Առաքելական Եկեղեցու աստվածաբանական-եկեղեցագիտական գիտությունը, արձագանքել հայ և միջազգային կյանքում Հայ Եկեղեցու և ժողովրդի համար կարևորություն ունեցող իրադարձություններին և ոսկեղեն կամուրջ հանդիսանալ Սփյուռքի և Մայր Հայրենիքի հայության միջև:

1946 թվականի ապրիլի 1-ին Գևորգ Զ Կաթողիկոսը գրում էր իր հայրապետական անդրանիկ կոնդակը, որը փաստորեն նախագիծ-ծրագիրն էր մեծանուն Հայրապետի ապագա գործունեության (տե՛ս «Էջմիածին», 1946 թ., № № IV—V, էջ 6—10):

1946 թվականին նա օրհնեց Սփյուռքի տարագիր իր զավակների հայրենադարձությունը ղեկավարելով Սովետական Հայաստան: Նա հայրենադարձության մեջ էր «տեսնում տարագիր իր զավակների փրկությունը և հայրենիքի բարգավաճման և հայ ժողովրդի պայծառ ապագայի հեռանկարը» (տե՛ս «Էջմիածին», 1946, № 1, էջ 12—13):

1950 թվականի հունիսին, Նա գրեց իր հույակապ հայրենաշունչ կոնդակը Վարդանանց հերոսամարտի 1500-ամյակի առիթով. «Ավարայրի հերոսամարտը եղել է, կա և կմնա առհավետ ազգապանծ էջը հայոց պատմության»:

Նորին Ս. Օծուխյուն Ս. Ս. Գևորգ Զ-ի անունն ու գործունեությունը սերտորեն կապված են եղել խաղաղության համաշխարհային շարժման հետ:

Հայաստանյայց Առաքելական Եկեղեցին, խաղաղության շարժման ստեղծման առաջին իսկ օրերից, ձրի գիտակից և դրական վերաբերմունքն է արտահայտել հօգուտ այդ շարժման, որովհետև Հայաստանյայց Առաքելական Եկեղեցին միշտ էլ խաղաղության կողմնակից է եղել, իր պատմության ողջ ընթացքում:

1949 թվականին, խաղաղության պաշտպանության ի նպաստ, հնչեց հոգեւորւյ Ս. Ս.

Գևորգ Զ Կաթողիկոսի ձայնը Մայր Աթոռ Ս. Էջմիածնից. «Մենք այսօր իրավունք չունենք լռելու, երբ համայն մարդկության ապագա անվտանգությունն ու խաղաղ կյանքի խոստումը ենթակա է վտանգի և տևական պատերազմից հոգնած մարդկությունը կանգնած է նոր պատերազմի, նոր թշվառությանց առաջ: Մենք այսօր իրավունք չունենք լռելու, այլ պարտավոր ենք հանդես գալու և ուժգնապես բողոքելու պատերազմի դեմ, որը հասնում է համարյա ամբողջ մարդկության դավանած կրոնների սիրո և եղբայրության գաղափարին, մարդկության դավանած բարոյական սկզբունքներին և շահերին»:

Նույն թվականի ապրիլի կեսերին, Վեհափառ Հայրապետը հատուկ գրությամբ դիմեց Հայ Եկեղեցու նվիրապետական Աթոռներին՝ Մեծի Տանն Կիլիկիոյ Կաթողիկոս Գարեգին Վեհափառին, Նրուսաղեմի և Կոստանդնուպոլսի Պատրիարքական Աթոռներին, Սփյուռքի բոլոր թեմակալ առաջնորդներին, և կոչ արեց նրանց ըստ ամենայնի զորավիգ լինել խաղաղության համաշխարհային խորհրդին, հնչեցնել իրենց ձայնը բոլոր նրանց դեմ, որոնք ձգտում են նոր պատերազմ հրահրել և միացնել իրենց ձայնը բոլոր նրանց ձայներին, որոնք իրենց աստվածո գործողություններով ձգտում են կասեցնել մարդկության գլխին կախված նոր արհավիրքը»:

Վեհափառ Հայրապետի ցանկությամբ, 1950 թվականի ապրիլի 12-ին, Հայ Եկեղեցու անունից, Ս. Էջմիածնի Գերագույն Հոգևոր Խորհուրդը իր գնահատական խոսքն ասաց խաղաղության համաշխարհային խորհրդի մշտական կոմիտեի Ստոկհոլմի նստաշրջանի բանաձևերի մասին:

1950 թվականի օգոստոսի 5-ին Թբիլիսիում հրապարակվեց Սովետական Միության երեք եկեղեցիների Պետերի՝ Մոսկվայի և Համայն Ռուսաստանի Պատրիարք Նորին Սրբություն Ալեքսիի, Համայն Վրաց Պատրիարք-Կաթողիկոս Նորին Սրբություն Կալիստրատի և Ամենայն Հայոց Սայրազույն Պատրիարք և Կաթողիկոս Նորին Ս. Օծուխյուն Գևորգ Զ-ի միաձայն դիմումը քրիստոնյա աշխարհին: Մայր Աթոռի պաշտոնական օրգան «Էջմիածին» ամսագիրը մի հատուկ համար նվիրեց եկեղեցիների խաղաղության համար մղած պայքարի այդ կարևոր իրադարձությանը:

1950 թվականի հոկտեմբերի 12-ին Մոսկվայում գումարվելիք խաղաղության կողմնակիցների համամիութենական ժողովի պատգամավոր ընտրվեց նաև Նորին Ս. Օծուխյուն Ս. Ս. Գևորգ Զ-ը, Սովետական Հայաստանի իր ժողովրդի կողմից: Իսկ ժողովում նա րնտովեց խաղաղության պաշտպանության

սովետական կոմիտեի անդամ: Ժողովում
իր ունեցած պատմական ելույթում Վեհա-
փառ Հայրապետը շարադրեց խաղաղության
նկատմամբ քրիստոնեական սկզբունքը՝ դա-
տապարտելով պատերազմը:

1951 թվականի նոյեմբերի 26—28-ին
Մոսկվայում գումարված հաղաղության
կողմնակիցների համամիութենական ժողո-
վում Վեհափառը նորից ընտրվեց պատգա-
մավոր: Ժողովում իր ունեցած շահեկան ե-
լույթում Վեհափառը առաջ բաշեց պատե-
րազմի դեմ քրիստոնեական եկեղեցիների
համատեղ հանգես գալու հարցը:

1952 թվականի մայիսի 9—12-ը, Մոսկվա-
յից 75 կմ. հեռավորության վրա գտնվող
Ռուսական Եկեղեցու հոգևոր կենտրոն ու
սրբավայր Զագորսկ բաղնիքում, տեղի ունե-
ցավ Սովետական Միության քրիստոնեական
եկեղեցիների և կրոնական այլ կազմակեր-
պությունների ներկայացուցիչների ժողով՝
նվիրված խաղաղության պաշտպանության
հարցերին: Այդ կարևոր համագումարին
մասնակցում էին 18 ազգությունների և 34
կրոնական տարբեր համոզմունքների տե-
ղահայրների ներկայացուցիչներ: Հայաս-
տանյայց Առաքելական Եկեղեցու պատգա-
մավորությանը գլխավորում էր նորին Ս. Օ-
ծոթյուն Տ. Տ. Գևորգ Զ-ը, որն ընտրվեց հա-
մագումարի նախագահության կազմում:

«Այսօր ավելի քան երբևիցե, — խորհրդա-
ծում է Վեհափառը, — եկել է ժամանակը, որ
Եկեղեցին հանգես դա որպես միասնական
անկախ հաստատություն, կենսագործն քրիս-
տոնեական կրոնի հիմնական վարդապետու-
թյունը»: Ապա քրիստոնեական լավատեսու-
թյամբ Վեհափառը եզրակացնում է. — «Կա
ժամանակ, երբ պատերազմի միտքն ու ծրա-
գիրը կմեռնեն ու կանխանան և մարդկություն-
ը կազատվի նոցա մղձավանջից ու կհան-
գրատանա» («Էջմիածին», 1952 թ., № 5,
էջ 44):

Մայր Տաճարի վերանորոգության հարցը
Գևորգ Զ Կաթողիկոսի սրտի մեծամոտիկ
հարցն է եղել: Վեհափառ Հայրապետի նվի-
րական իղձն է եղել «ներքնապես ու արտաք-
նապես հիմնովին վերանորոգված» տեսնել
հայ ճարտարապետության հնադարյան կո-
թող Ս. Էջմիածնի Մայր Տաճարը:

Վեհափառ Հայրապետի միշտ ուշադրու-
թյան կենտրոնում եղած և ամենամեծ մտա-
հոգության առարկա դարձած այդ հարցը
քննվել է 1945 թվականի Ազգային-եկեղեցա-
կան ժողովում, որ ազդեցություն էր Հայրապետը
հայտարարել է. «1642 տարվա պատմական
այս կոթողի կյանքի ու հարատևության և
նրան վայելուչ վիճակում պահելու գործը հայ
ժողովրդի պատվի գործն է»:

Վեհափառ Հայրապետը իր անդրանիկ կոն-
զակում գրում է նաև հետևյալը. «Սարսուռ եմ
զգում հիշելով ծանր պարտականությունները
և բազմապիսի հոգսերը, որ Ամենայն Հայոց
Հայրապետի ուսերին է բարձած, և խորհում
եմ՝ պիտի կարողանամ արդյոք, ծերությանս
հասակում, խղճի մտքը կատարել պարտքս.
պիտի հաջողվի՞ արդյոք ինձ՝ ներքնապես ու
արտաքնապես հիմնովին վերանորոգել հայ
հնադարյան թանկարժեք կոթողը՝ Ս. Էջ-
միածնի Մայր Տաճարը»:

Նորընտիր Հայրապետը իր ընտրությունից
մի քանի ամիս հետո ձեռնամուխ է լինում
Մայր Տաճարի վերանորոգության նախա-
պատրաստական աշխատանքներին: Վեհա-
փառ Հայրապետի կողմից հրավիրվում է
ականավոր մասնագետներից և հայ ժողովրդի
նշանավոր մշակույթի բազմաթիվ անձնա-
վորություններից բաղկացած մի հեղինակա-
վոր հանձնաժողով, որի մեջ են մտնում
Վարպետը՝ Ավետիք Իսահակյանը, ժողո-
վրդական նկարիչներ Մարտիրոս Սարյանը,
Հակոբ Կոջոյանը, Սովետական Միության
կերպարվեստի ակադեմիայի իսկական ան-
դամ Ս. Սաֆարյանը, արվեստի վաստակա-
վոր գործիչ, ճարտարապետ Մարկ Գրիգոր-
յանը, ճարտարապետության թեկնածուներ
Վ. Հարությունյանը, Ռ. Իսրայելյանը, ուրիշ
ճարտարապետներ և մանրանկարիչներ:

«Վեհափառը երիտասարդական խանդա-
վառությամբ թափ ու մղում էր տալիս նախ-
նական աշխատանքներին:

Հակառակ բոլոր բարի ցանկություններին,
սակայն, կամքից անկախ պատճառներով,
ձգձգվեց վերանորոգման հրատապ հարցը:

Բայց ծերունազարդ և հայրենասեր Հայ-
րապետի համար սպասում էր մի մեծ ուրա-
խություն: 1954 թվականին հայրենի հարա-
զատ պետությունը հանձն առավ հոգալ դա-
րերի բովից անցած պատմական այս հույա-
կապ ու անկրկնելի հուշարձանի ներքին նկա-
րազարդման և վերանորոգության ծախսը, որ-
պես ճարտարապետական ու պատմական
կարևոր հուշարձանի»:

Բայց անողորմ մահը շտապեց կտրել մեծա-
նուն Հայրապետի արդյունաշատ կյանքի թե-
լը. նա աչքերը փակեց Տաճարի նորոգումը
շտեսած...:

1954 թվականի մայիսի 9-ին, երկարատև
և ծանր հիվանդությունից հետո, վախճանվեց
հայրենասեր և մեծագործ Գևորգ Զ Կաթողի-
կոսը:

Վշտի ու տրտմության այդ օրերին մի ան-
գամ ևս դրսևորվեց հայ ժողովրդի անսահ-
ման երախտագիտությունն ու որդիական
հարգանքը դեպի Մայր Աթոռ Ս. Էջմիածին
ու նրա արժանավոր Գահակալը:

Սփյուռքի և Մայր Հայրենիքի բոլոր թեմերից Մայր Աթոռ ժամանեցին սգակիր պատգամավորներ, խոնարհվելու համար մեծ և անմոռանալի հանգուցյալի դազադի առաջ, իրենց հետ բերելով թեմերի անսահման կսկիծն ու հավատարմությունը:

Մայիսի 25-ին, մեծ հանդիսավորությամբ և եկեղեցական թափոցով, Վեհափառի աճյուռնը Վեհարանից իջեցվեց Մայր Տաճար:

Մայիսի 27-ին, հնադարյան Մայր Տաճարում, հանդիսավորությամբ կատարվեց նորին Ս. Օծուխյուն Տ. Տ. Գևորգ Զ հանգուցյալ Կաթողիկոսի վերջին օծումը:

Հայրենյաց պաշտպան ներսես Աշտարակեցու և Հայոց խրիմյան Հայրիկի շիրիմների առնթեր բացվել է նրա գերեզմանը, որի կողքին բարձրանում է գեղեցիկ մեծ զանգակատունը:

Ոչ ևս է Վեհափառը...: Բայց նա չի մեռել, ինչպես չեն մահացել մեր մեծ մեռելները: Գևորգ Զ-ը ապրում է իր գործերով և պատգամներով հայ ժողովրդի երախտագետ հոգում:

Պատմության գիրկն է անցնում այսպես Գևորգ Զ Կաթողիկոսը, որպես հայրենասեր և մեծագործ Կաթողիկոս, որն իր կյանքը, Գևորգյան Ճեմարանի գրասենյակներից սկսած, նվիրել է Հայ Եկեղեցու և հայ ժողովրդի ծառայության:

Դժվար է սույն թուուցիկ ակնարկի մեջ խտացնել մեծագործ Կաթողիկոսի ազգաշեն և եկեղեցանվեր գործունեությունը:


Նրա մահվան 10-րդ տարելիցի առթիվ, երբ ազգովին մեր հարգանքի և երախտագիտու-


թյան տուրքն ենք բերում նրա հիշատակին, խորապես մխթիարվում ենք, որ Գևորգ Զ Կաթողիկոսի գործը ապրում և բարգավաճում է նրա արժանի հաջորդ՝ Ն. Ս. Օծուխյուն Տ. Տ. Վազգեն Ա Հայրապետի օրոք: Ինչ երևի, Գևորգ Զ Կաթողիկոսի համար և նրա օրոք ծրագիր էր, երազ, այսօր կյանք է դարձել, մարմին է առել: Հրճվում է իր հավիտենական կայքում հոգին մեծ Հայրապետի, որովհետև շարունակվում է իր գործը, կենդանի է իր հիշատակը:

Ուխտենք հավատարիմ մնալ հանգուցյալ լուսաբնակ Գևորգ Զ Կաթողիկոսի ծառայության, նվիրման ոգուն, Հայ Եկեղեցու միության և հայ ժողովրդի միասնականության նրա գաղափարներին, նրա հայրենասիրական ավանդություններին:

Ուխտենք ծառայել Մայր Աթոռին այնպես, ինչպես նա էր ծառայում: Սիրենք մեր վերածնված Մայր Հայրենիքը ինչպես նա էր սիրում, հիշելով նրա սրբազան պատգամը. «Հայը, բացի Սուվետական Հայաստանից, չունի այլ Հայրենիք: Հայը Հայաստանից դուրս չունի այլ հաստատուն վրկան, բայց եթե Մայր Հայրենիքը, Հայ Եկեղեցին և նրան գլխավորող Ամենայն Հայոց Հայրապետությունը՝ Ս. էջմիածնի Հայրապետական Աթոռով»:

Մեզանից հեռացավ մեր սիրելի Հայրն ու Հայրապետը, ավանդ թողնելով մեզ իր ոգին, հավատը, հայրենասիրությունը, գործը: Պահենք այդ սրբությունները և մի անգամ ևս խոնարհվենք նրա սուրբ և խնկի հիշատակի առաջ:





ՌՈՒԲԵՆ ՔԱՀԱՆԱ ՄԱՐՏԻՐՈՍՅԱՆ

ԳԵՎՈՐԳ Զ ԿԱԹՈՂԻԿՈՍԸ ԵՎ ՍՈՒՐԲ ԷԶՄԻԱԾՆԻ ՀՈԳԵՎՈՐ ՃԵՄԱՐԱՆԻ ՎԵՐԱԲԱՅՈՒՄԸ

Այսօր, անցած տասը տարիների միջից, երբ մեզ է նախում երջանկահիշատակ Գևորգ Զ Հայրապետը, մենք նրա կերպարը տեսնում ենք առավել ամբողջական և համադրված: Տարիները կարծես զտել են, տարել երկրորդականը, անկարևորը, թողնելով նրա կերպարի մեջ այն, ինչ մնալուն է:

Այսօր մեր մտածման առջև կանգնում է մեծ հոգևորականի պայծառ կերպարը:

1945 թվականի նոյեմբեր ամսին վերաբացվեց Հոգևոր Ճեմարանը Գևորգ Զ Կաթողիկոսի նախաձեռնությամբ:

Ես այսօրվա պես հիշում եմ 1945 թվականի նոյեմբեր ամիսը: 35—40 երիտասարդներ, զանազան գավառներից և քաղաքներից, եկել, հավաքվել էինք Մայր Աթոռ: Ընդունելության քննությունները արդեն վերջացել էին: Բոլորս, երկյուղած մթնոլորտում, լուռ, ներկա էինք Ճեմարանի բացման հանդիսության: Լսվում էին աղոթքի մրմունջները, մինչ հանգուցյալ Կարապետ արքեպիսկոպոս Թումանյանը օրհնած ջրով ցողում էր ուսանողների երեսը, իսկ Վեհափառ Հայրապետը, արցունքոտ աչքերով, օրհնում էր բոլորիս, օրհնում էր նորաբաց Հոգևոր Ճեմարանը:

Հոգևոր Ճեմարանը առաջին օրվանից դարձավ երջանկահիշատակ Հայրապետի մտահոգության և գուրգուրանքի առարկան: Հեշտ է ասել Ճեմարանը վերաբացվեց: Ծանր և դժվարին տարիներ էին, պատերազմը նոր էր

վերջացել, ամբողջ երկիրը ծանր տնտեսական դրության մեջ էր, թշնամին ոչնչացրել էր ամեն ինչ, բայց մնացել էր մեր ժողովրդի պրկված, հերոսական ոգին, որը նոր-նոր բուռնում էր իր վերքերը և վերաշինում իր ավերված բույնը:

Հոգևոր Ճեմարանի առաջին վերատեսուչն էր Մինաս Մինասյանը, որին Վեհափառ Հայրապետը միշտ թելադրում էր. «Ճեմարանի համար ոչինչ միջ խնայի, ինչ որ կարելի է և հնարավոր՝ պետք է անել»:

Հոգևոր Ճեմարանը, իր բացման առաջին իսկ օրից, ապահովված էր ուսուցչական որակյալ անձնակազմով: Ուսանողության մեջ կար խանդավառ զգացում, սովորելու տենչ:

Եվ այսպես, առաջին տարին անցավ լարված աշխատանքով:

Ուսումնական տարվա վերջն էր, քննությունները սկսվել էին: Լուր էր տարածվել արդեն, թե Վեհափառ պետք է գա և լսի աշակերտների պատասխանները: Առաջին անգամ պիտի տեսնեինք Վեհափառ Հայրապետին:

Ճեմարանի պատշգամբից դիտում էինք հանդիսավոր թափորը, որ Կաթողիկոսին առաջնորդում էր Ճեմարան: Ուսանողներս երգեցինք «Հայր մեր», իսկ Վեհափառ Հայրապետը, պատկառազգու, աղոթեց. «Զգործս ձեռաց մերոց ուղիղ արա ի մեզ Տէր, և զգործս ձեռաց մերոց յաջողեա մեզ»: Մենք

համարվել էինք: Քննություններն սկսվեցին Վեհափառ Հայրապետի ներկայությամբ: Ուսանողներս մի տեսակ կարկամել էինք: Ուսուցիչները բերբերում էին մեր հիշողությունները: Ուսումնական ստուգատեսի ընթացքներ էին: Վեհը լսում էր գոհունակ և մերթ միջամտում: «Բավ է, նորա լավ յուրացրել են դասը, բավարար գիտենք»: Եվ իր մանրիկ ու բարի աչքերը ժպիտով ուղղում էր այս կամ այն ամաչկոտ պատանուն, խրախուսում և մրմնջում: «Ապրես»: Մեր պատանեկան երկշտոնությունը վերացել էր, և դրանից հետո մենք սրտանց ցանկանում էինք, որ Վեհը գար և մեր բոլոր քննություններին ներկա լիներ: Քննությունները մեզ համար սարսափելի չէին այլևս, որովհետև ուսուցիչների խիստ աչքերի դիմաց կային մի զույգ խրախուսող, ժպտացող, բարի աչքեր:

Եվ այսպես, տարիները անցնում էին, մենք հասունանում էինք, լցվում գիտելիքներով, իմաստանում: Մի րոպե էինք Կաթողիկոսին, նա մեր կուռքն էր: Կամաց-կամաց նա մեզ ավելի էր հասկանալի դառնում: Նա զարգացած, լուսամիտ անձնավորություն էր, զարմանալիորեն նորի զգացողություն ուներ, հենուկ էր ֆանատիկ լինելուց, իրերի և երևույթների խորքն էր թափանցում միշտ և իսկույն զատորոշում կարևորը անկարևորից:

Այդ օրերին ձմեռաբանում կային նաև վեհեր, սկզբունքային այս կամ այն հարցի վերաբերյալ: Վիճում էին իրար հետ բոլորը, վիճում էին դասախոսների հետ: Այդ աղմկոտ վեճերը է՛լ ավելի ամրացնում էին մեր գիտելիքները, մեր հավատը: Նույնիսկ Վեհափառ Հայրապետի մոտ մեր հավաքված ժամանակ, տալիս էինք բավական համարձակ հարցեր: Նա ներողամտաբար նայում էր մեզ, ժպտում և հաճախ իրավունք տալիս:

1949 թվականին առաջին հնգյակը ձեռնարկեց սարկավազ, հետո երկրորդ խումբը և երրորդը: Հանգուցյալ Հայրապետի գուրգուրանքը կրկնապատկվեց ձմեռաբանի հանդեպ: Մենք, որպես սարկավազների, ավելի հաճախ էինք լինում Վեհափառ Հայրապետի մոտ, մանավանդ երեկոները: Ա՛խ, այդ երեկոները, երբեք չեն մոռացվի: Անջնջելի են մնացել նրանք իմ հիշողության մեջ: Սկսվում էր սրտաբաց զրույց, և ինչի մասին սաք չէինք զրուցում: Կրոն, բարոյականություն, հայրենիք, Հայ Եկեղեցի, Սփյուռք, ազգապահպանում, մշակույթ, գրականություն, արվեստ: Առաջին անգամ անգլիացի Մմալլսի մասին ես Վեհափառից լսեցի: Նա խորհուրդ էր տալիս կարգալ նրա Քրիստոսությունը և Քրիստոսությունը: Հաճախ գերմանացի փիլիսոփա Վոլդեման էր վկայակոչում: Երբեմն դասախոսարանի պատմություններ էր պատ-

մում նա իր կյանքից, իր ուսանողության տարիների Գերմանիան էր հիշում:

Ուշ գիշերին դուրս էինք գալիս Վեհափառի մոտից լիցքավորված, կայունացած...

Վեհափառը կապված էր իր նորընծա սարկավազներին:

Եվ երբ այդ հսկա կաղնին տապալվեց 1954 թվականի մայիսին, մենք, որ նրան էինք հենվել, անսահմանորեն մեզ որք զգացինք և անպաշտպան:

Հոգևոր ձմեռաբանն ավարտելուց հետո, Վեհափառը չէր էլ մտածում ավագ սարկավազներին վարդապետ ձեռնադրելու մասին: Նա ձմեռաբանական գիտելիքները բավական չէր համարում արդի պայմաններում և մի անգամ ասաց մեզ.

— Կրթված վարդապետներ եմ ուզում. ես ձեզ դեռ պիտի ուղարկեմ աստվածաբանություն սովորելու, ինձ Եկեղեցու սյուներ են պետք...

Ձմեռաբանը այդ տարիներին բավական թվով ուսանողություն ուներ և ոչ բոլորն էին, որ հոգևորական դառնալու ցանկություն էին հայտնում: Շատերը, ավարտելով ձմեռաբանը, հեռանում էին: Վանքում շատերը ահազանգում էին, որ Հոգևոր ձմեռաբանը իր դերում չէ, որ հոգևորական դարձողների թիվը քիչ է և այլն: Բայց Վեհը մի անգամ խորիմաստ կերպով պատասխանել էր.

— Հոգևորական դառնալու խնդիրը կոչում ունենալու հարց է: Հոգևոր ձմեռաբանը ոչ միայն հոգևորական է պատրաստում, այլև լավ հայ մարդիկ, որոնք կյանքում ո՛ւր էլ լինեն, ի՛նչ գործով էլ զբաղվեն, չեն մոռանա Ս. Էջմիածինը և հայ մշակույթի, արվեստի, դպրության և ոգու տարածողները կլինեն:

Հոգևոր ձմեռաբանի սաների և սարկավազների ամենափոքր հայրություններն անգամ անշափ ուրախություններով էին լցնում Վեհափառ Հայրապետի սիրտը:

Մեկ անգամ, Օշականի ուխտագնացության տոնին էր: Սուրբ պատարագը վերջացել էր: Վեհափառը, շրջապատված Գերագույն Հոգեվոր Խորհրդի անդամներով (Երվանդ Շահազիզ, Կամսարական, Մինաս Մինասյան և ուրիշներ), նստել էր Օշականի եկեղեցու բակի հարավային մասում, ծառերի զով շվաքում, և լուռ ունկնդրում էր Հոգևոր ձմեռաբանի սաների արտասանությունները, երգերը: Տողերիս գրողը բնասացության պես մի բան էր պատրաստել՝ ձմեռաբանի սաների հանդիսավոր խոսքը անմահ Մաշտոցի գերեզմանի առջև, նրա հիշատակին նվիրված գրական մի առաջին նախափորձ: Ես, սեղանի վրա բարձրացած, ոգևորությամբ կարդացի գրածս: Վեհը խանդավառ հուզման մեջ էր: Մյուս օրը նա ինձ կանչեց և հանձնարարեց,

որ իմ շարադրանքը պարզ, ընթերցանելի արտագրեմ և հանձնեմ «էջմիածին» ամսագրի խմբագրությանը: Այդ ինձ համար անսպասելի և հաճելի էր միանգամայն: Իմ շարադրությունը տպվեց: Համոզված եմ, որ ինձնից ավելի Վեհն էր ուրախանում նման դեպքերում: Նրա ուրախությունը նման էր այն պարտիզանի ուրախությանը, որը գուրգուրանքով դողում է իր տնկած նորատունի այգու յուրաքանչյուր մատղաշ շիվի համար:

Հիշում եմ, Ս. էջմիածնի տոնի օրն էր: Հավաքվել էինք Վեհարանում: Ներկա էին միաբանները, կային հյուրեր, Գերագույն Հոգևոր հորհրդի անդամներ, Մեծանուն բանաստեղծ Ավետիսյանը և ուրիշներ: Շատերն էին ճառեր խոսում, բարեմաղթություններ անում: Մենք, սարկավազներս, հոգևոր երգեր էինք երգում, պայծառացնում սեղանը:

Շատերը մեր վրա ուշադրություն անգամ չէին դարձնում, բայց մենք գիտեինք, զգում էինք, տեսնում էինք Վեհի ամեն ինչ ասող հայացքը: Նա վեր կացավ հուզված, և սկսեց Ավետարանից. «Եթե ոչ հատն ցորենոյ անկեալ յերկիր մեռանիցի, ինքն միայն կայ. ապա թէ մեռանիցի՝ բազում արդիւնս առնէ»: Ապա շարունակեց. «Այսօր, ուրախության այս սեղանի շուրջը, տեսնում ենք սքեմավորների մի նոր շարան: Նոցա դեմքերը զվարթ են, երիտասարդ են նոքա և առույգ, համոզմունքով ոտք դրած Հայ Եկեղեցու սեմին: Նոր շնչով, նոր զգացմունքներով սոքա պիտի շարունակեն մեր մեծ գործը և պայծառացնեն Ս. էջմիածինը: Տարիներ առաջ նա երազում էի այս պահը, երբ համարյա միայնակ, մի քանի միաբանների հետ սկսեցի մեծ գործի այս մեծ սկիզբը: Այսօր նա հոգեպես մխիթարված եմ, տեսնելով վերածնված Հայ Եկեղեցու այս նոր պատկերը»:

Վեհափառ Հայրապետը միշտ լավատես էր, վհատություն կամ հոռետեսություն մենք չենք նկատել Նրա մոտ: Զարմանում էինք, թե որտեղից էր այդքան կենսախնդրություն 80-ամյա այդ ծերունու մոտ: Նա վարակում էր բոլորիս իր այդ առույգ կենսախնդրությամբ: Մեկ անգամ միայն նա հանգուցյալ Ս. Նիկողոս քահանային ցույց էր տվել Ս. Գայանեի վանքում երջանկահիշատակ հորեն Ա Կաթողիկոսի գերեզմանի կողքի աղատ տարածությունը ասելով. «Ս. Նիկող, այդ աղատ տեղը ինձ համար է, լավ միտքդ պահիր...»: Ս. Նիկողը մեզ պատմում էր և մեր հավատալը չէր գալիս, որ այդ մարդը երբևիցե իր մահվան մասին մտածել է:

Ընդհանրապես, երբ երկար ապրելու մասին Նրա մոտ խոսք էր լինում և իրեն ցանկանում էինք երկար տարիներ, նա ասում էր. «Դուք աղոթեցեք, որ նա ապրեմ, մենք միասին դեռ շատ ճամբա պիտի անցնենք»: Եվ հետո ավելացնում էր. «Նա չեմ ուզենա ապրել գիտե՞ք երբ. երբոր իմ բանականությունն սկսի ճիշտ չգործել, այն ժամնակ ոչ մեկին պետք չալ չեմ կարող, Աստուծուց իմ կյանքի համար խնդրածս այս է. Տե՛ր Աստված, ավելացրու իմ կյանքի օրերի վրա այնքան, որքան որ նա պետք պիտի գամ իմ ազգին, իմ ժողովրդին և Հայրենի Եկեղեցուն. ավելին ինձ պետք չէ, և նա հավատում եմ, որ Աստված ավելացնում է այն մարդկանց կյանքը, որոնք պետք են իրենց ժողովրդին»:


Մի վերին աստիճանի փայտաված տենչ ուներ երջանկահիշատակ Հայրապետը և միշտ կրկնում էր. «Հայ ժողովրդին մի տեղ հավաքված տեսնեմ, աչքերս նոր փակեմ»: Եվ հաշվումներ կատարելով, հայերի թիվը կլորացնում էր և ասում, թե մի տասը տարի հետո այսքան կլինի: Ապա ուրախությամբ ժպտում էր ավելացնելով. «Մեր հույսը, մեր վերջին հավաքատեղին Երևանն է, Երևանը եթե վերանա, հայությունը կորած է»:

Եվ այսօր, մեր սիրեցյալ Հայրապետի մահվանից տասը տարի հետո, ինձ բախտ է վիճակվել, որպես ականատես աշակերտի, ոգեկոչել Նրա հիշատակը, որը նվիրական է յուրաքանչյուր ճեմարանականի համար:

Նա երջանիկ եմ զգում ինձ այս պահին ոչ թե նրա համար, որ անցած հուշերս եմ մոտրում, այլ Նրա համար, որ ամբողջ էությունս համակվել է մեծ երախտագիտության անխառն մի զգացումով դեպի այն մարդը, որն այնքան ջանքեր և աշխատանք թափեց Մայր Աթոռում, Հայ Եկեղեցու պայծառության համար և բոլորիս կաղապարելու և հայրենասիրական շնչով խսկական մարդիկ դարձնելու գործում: Իսկ երախտագիտությունը մեծ զգացում է, որը երջանկացնում է մարդուն:

Այսօր, երջանկահիշատակ Հայրապետի պայծառ հիշատակի առջև, այդպիսի երջանկացնող երախտագիտությամբ իրենց ղուլաներն են խոնարհում Նրա բոլոր սաները, որոնք իրենց ամբողջ կյանքում իրենց սրտի մի անկյունում հավատարմորեն ու գուրգուրանքով կպահեն Գևորգ Զ Կաթողիկոսից ստացած կրոնական ու հայրենասիրական շունչը, Նրա հայրական բարի հորդորները:

«Յիշատակն արդարոց օրհնութեամբ եղիցի»:



Վ. ՀՈՎՀԱՆՆԻՍՅԱՆ

Խ Ո Ս Զ Ե Ր Ա Խ Տ Ի Զ Ի

(Երանաշնորհ Ս. Տ. Գևորգ Զ Կաթողիկոսի հիշատակին)

Դու դարեդի խորքից եկած մեր հավատի
Մեծ սյուներից մեկը եղար.
Մայր Աթոռի համար բացիր ճամբան փառքի՝
Ճեմարանը լուսո կաճառ:

Ու մեր նախնյաց մաքրամաքուր սիրով անշեջ,
Եղար հոգու մեծ սերմնացան,
Սերմերը քո աննյութական՝ մեր հոգու մեջ
Մշտադալար ծառեր դարձան:

Ու քո ոգին ազգանվեր, ոգին քո մեծ,
Շաղված ոգով Վարդանանքի,
Սաներիս էլ ճեմարանիդ սիրով այրեց,
Կամարի տակ Մայրավանքի:

Ոգին էլ քո մի կաճառ էր անձեռակերտ,
Ճամբի վրա մեր՝ լույս-փարոս,
Եվ անբաժան ճամբորդում է մեր մեջ, մեզ հետ,
Հայոց լեզվով հավերժախոս:

Ո՛վ մեծագործ Դու Հայրապետ ազգիս հայոց,
Պատգամը քո մեր սրտերում
Պահում ենք սուրբ, որպես անմար կրակ ու բոց,
Որպես անմեծ երգ ու երդում:

Դու վառագի պահին ինչպես հովիվը քաջ՝
Արծվահայաց խոյացար վեր,
Եվ գունդն անվամբ Սասնա Դավթի մղվեց առաջ
Դուրցազնաքայլ ու անվեհեր:

Դու դարավոր մեր հավատի սուրբ տաճարից,
Սրտի ծայնով քո հայրական,
Տուն կանչեցիր հողագնդի ամեն ծայրից
Որդիներիդ աստանդական:

Ու սուրբ սերը Էջմիածնի դարձած արյուն
Երակներում հայ պանդուխտի՝
Վերջին անգամ գտան նրանք հայրենի տուն,
Էջմիածին եկան ուխտի:

Աշխարհով մեկ, խաղաղության համար անխոց,
Զայնն առաջին եղար ազատ,
Խաղաղություն, որ պետք էր քո ազգին հայոց
Ազգերի մեջ՝ ամենաշատ:

Անթառամ է սաներիդ մեջ պատգամը քո,
Բարձր սարի ձյան պես անհաս,
Պատգամը սուրբ կպահեն միշտ կրծքիս ներքո,
Թեև սքեմ չունեմ վրաս:



Մ Ա Յ Ր Ա Թ Ո Ռ Ո Ւ Մ

Ապրիլի 1-ին, շոբֆշաբթի, զատական արձակուրդներից հետո, Հոգևոր Ճեմարանում վերսկսվեցին դասավանդությունները:

Դասավանդությունները կշարունակվեն մինչև մայիսի 20-ը, իսկ տարեվերջի քննությունները կսկսվեն հունիսի 1-ին:

* *

Ապրիլի 4-ին, շաբաթ, երեկոյան ժամը 7-ին, Հոգևոր Ճեմարանի հանդիսությունից սրահում, Վեհափառ Հայրապետը դասախոսեց «Բուլղարահայ գաղութը այսօր» թեմայի շուրջ, Մայր Աթոռի միաբանության և Հոգևոր Ճեմարանի ուսանողության համար: Դասախոսությունը լսվեց հետաքրքրությամբ:

* *

Ապրիլի 5-ին, Կրկնագատիկ (Նոր Կիրակի), Մայր Տաճարում պատարագեց արժանապատիվ Տ. Մկրտիչ ավագ քահանա Մկրտչյանը, բարողեց հոգեշնորհ Տ. Արսեն վարդապետ Բերբերյանը «Զի լոնսցին պատերազմունք, դադարեսցին յարձակմունք թշնամեաց, տնկեսցի սէր և արդարութիւն ի յերկրի» քնարանով:

Հավարտ սուրբ պատարագի, Վեհափառ Հայրապետի բարձր նախագահությամբ, կատարվեց հանդիսավոր հոգեհանգստյան պաշտոն՝ համաշխարհային առաջին և երկրորդ պատերազմների ընթացքում նահատակվածների համար:

* *

Ապրիլի 7-ին, երեքշաբթի, «Աւետումն Ս. Աստուածածնի»: Օրվա տոնի առթիվ, Մայր Տաճարում սուրբ պատարագ մատուցեց հոգեշնորհ Տ. Նարեկ վարդապետ Շաքարյանը:

* *

Ապրիլի 12-ին, կիրակի (Աշխարհամառան, Կանաչ Կիրակի), Մայր Տաճարում պատարագեց զերաշնորհ Տ. Հայկադուն արքեպիսկոպոս Աբրահամյանը և սուրբ պատարագի ընթացքում կուսակրոն քահանա ձեռնադրեց Հոգևոր Ճեմարանի 1962 թվականի շրջակավարտ բարեշնորհ Կարպիս սարկավագ Սերայդարյանին, որը վերանվանվեց Տ. Գևորգ արքեպ:

Խորտավիճակության պաշտոնը կատարեց հոգեշնորհ Տ. Մեսրոպ վարդապետ Պալյանը: Շարաթ երեկոյան կատարվել էր ընծայացուի քահանայական կոչման կարգը:

Ձեռնադրիչ սրբազանը օծումից հետո խոսեց բովանդակալից խրատական:

Ձեռնադրության ներկա էր Վեհափառ Հայրապետը:

Երեկոյան ժամերգությունից առաջ կատարվեց վեղարի տվչության կարգը:

Հոգեշնորհ Տ. Գևորգ արքեպ Սերայդարյանը ծնվել է 1938 թվականին Բուխարեստում, ծնողների հետ հայրենիք է ներգաղթել 1948 թվականին, 1956 թվականին ընդունվել է Հոգևոր Ճեմարան, 1962 թվականին ավարտել լսարանական բաժինը և 1963 թվականին ձեռնադրվել սարկավագ:

Հոգեշնորհ Տ. Գևորգ արքեպան հավատավոր, աղնիվ, իր կոչման նվիրված երիտասարդ հոգևորական է:

Նորընծան այժմ վարում է Մայր Տաճարի դասապետի և Մայր Աթոռի գանձապահի պաշտոնները:

* *

Ապրիլի 18-ին, շաբաթ, Վեհափառ Հայրապետը Երևանում ենթարկվեց վիրաբուժական թեթև գործողության, որն անցավ շատ բարձրաշող կերպով:

Նորին Ս. Օծուխյունը, կատարելապես ապաքինված, հիվանդանոցից Մայր Աթոռ վերադարձավ ապրիլի 30-ին:

* *

Ապրիլի 19-ին, կիրակի (Կարմիր Կիրակի), Մայր Տաճարում պատարագեց հոգեշնորհ Տ. Մուշեղ վարդապետ Պետիկյանը:

* *

Ապրիլի 26-ին, կիրակի, «Տօն երևման Սրբոյ Խաչի»: Մայր Տաճարում պատարագեց հոգեշնորհ Տ. Մեսրոպ վարդապետ Պալյանը և քարոզեց «Այսօր նշան սուրբ խաչին ի յերկնից երևեալ, եկալք նոր ժողովուրդք միաբանութեամբ զՏէր օրհնեցէք» բնաբանով: Հավարտ սուրբ պատարագի, կատարվեց հոգեհանգստյան հատուկ պաշտոն 1915 թվա-

կանի ապրիլյան մեծ եղեռնի նահատակներին հիշատակին:

* *

Ապրիլի 27-ին, երկուշաբթի, Վեհափառ Հայրապետի բարեհաճ կարգադրությամբ, Հնդկաստան մեկնեց Գերագույն Հոգևոր Խորհրդի անդամ և Հոգևոր Ճեմարանի վերատեսուչ գերաշնորհ Տ. Հայկազուն արքեպիսկոպոս Աբրահամյանը:

Սրբազանը, հանուն Ամենայն Հայոց Վեհափառ Հայրապետի, մայիսի 20-ին Քոտայում և ներկա կլինի Հնդիկ Մալաբար Եկեղեցու նորընտիր Կաթողիկոս Նորին Սրբություն Տիմոթեոսի զահակալության հանդեսին:

Այնուհետև գերաշնորհ սրբազան հայրը կայցելի Հնդկաստանի և Ավստրալիայի հայկական գաղութներին, տանելով նրանց Վեհափառ Հայրապետի ողջուններն ու օրհնությունները:





2. Ճ. ՍԻՐՈՒՆԻ

ՊՈԼԻՍ ԵՎ ԻՐ ԴԵՐԸ*

Ե

ԴԱՐ ՄԸ ԻՐ ԵՐԿՈՒՆՔԻՆ ՄԵՋ

1. ԴԱՎԱՆԱԿԱՆ ՎԵՃԵՐԸ ԿՐԱՆԱՆ ԴԱՐԸ

Ամոթով էինք դադաղը դրեր տազնալի դա-
րը. դայն փակեր էինք դժբախտ պահու մը,
երբ դավանական վեճերը իրենց ամենեն
ամենի փուլն էին մտեր, շատ մը սև էջեր
ավելցնելու համար հայոց պատմութեան ար-
դեն մոռալ շրջանին մեջ:

Մարդ կամչնա երբոր կրանա հիմա նաև
այս դարը: Հոգերը, զորս իր նախորդեն ժա-
ռանդած է ան, կշարունակեն դեռ խռովել
Պոլիսը, և միշտ դավանական վեճերն են
անոնց կորիզը: Հոռմն ու իր գործակալները
աշխույժ են առավել քան երբեք. եթե չհաջո-
ղեցան Հայ Եկեղեցին ծունկի բերել անցյալ
դարուն, հիմա դայն ճեղքելու փորձը կընեն,
իրենց բովանդակ ուժերը լարած:

Դարը, զոր կթևակոխենք, սփոփիչ պահեր
ալ բազմիցս արձանագրած է անշուշտ: Հա-
կառակ ալեկոծութեանց, որոնք անպակաս
եղած են իր ծոցեն, հայ ժողովուրդը բացա-
ռիկ ճիգեր ալ փորձած է այս դարուն և իրեն
համար երկունքի դար մը եղած է ան: Եվ
այնուամենայնիվ դավանական վեճերը եկած

են ամլացնել այդ ճիգերեն շատերը և անդա-
դար խռոված երկունքի այդ դարը: Շատ ավե-
լի արգասաբեր կըլլար հայ ժողովուրդի փոր-
ձած վերելքը, եթե ան ստիպված չըլլար սե-
րունդներ մսխել ունայն վեճերու համար, և
անոնց աչքերուն ու մտքին լույսը չբամէր
սնոտի մարդանքներու սիրուն:

Այնպես որ դավանական կռիվներով ստիպ-
ված ենք բանալ նաև այս դարը: Կաթոլիկ
բարոզչութեան ամենեն հանդուգն փորձերուն
շրջանն ենք հասած, երբ կաթոլիկ գործակա-
լները այլևս սկսած են խտիր չղնել միջոցնե-
րու միջև: Անցնող դարուն անոնց բովանդակ
ճիգը կայացեր էր հայ հոգևորականութունը
որսալու և Հայ Եկեղեցին ներսեն պառակտե-
լու իրենց փորձերուն մեջ: Հիմա արդեն
դանդաղածներու մեջ թափանցելու, հայ ժողո-
վուրդը ներսեն ճեղքելու շրջանն է: Նախորդ
դարու փորձերը աղետ բերին հայ ժողովուր-
դին: Բարիք չէին կրնար խոստանալ նորերը
ևս:

Մեր կսկիծը ավելի խոր կդառնա, քանի
մոտենանք մեր իսկ օրերուն: Կիրքն ու ատե-
լուցիչունը շարունակված կգտնենք ավելի նոր
սերունդներու օրով ալ, երբ հայ ժողովուրդի
շատ ավելի գերագույն շահերը պետք է վա-
ղուց լոկացուցած ըլլային զանոնք ամբողջ հո-
գիններուն մեջ: Ոչինչ ավելի տառապեցուցած

* Շարունակված «էջմիածին» ամսագրի 1962 թվա-
կանի № № Թ-ից, ԺԲ-ից, 1963 թվականի № № Ա-ից,
Բ-ից, Գ-ից, Դ-ից, Ե-ից, Զ-ից, Է-Ը-ից, Ք-Ժ-ից,
ժԱ-ից, ԺԲ-ից և 1964 թվականի № № Ա-ից և Դ-ից:

է հայ ժողովուրդը քան դավանական պայթաբեր: Շատ ավելի պտղաբեր կըլլար երկունքի դարը առանց այդ կոիվներուն:

Դավանական վեճերը ավելի բուռն թափ պիտի ստանային սակայն Ղափանցիին հետ: Վավերաթուղթերուն մեջ, զորս թուրք պատմագիր Ահմեդ Ռեֆիկ լույս ընծայեց հին դարերու Պոլսո կյանքին պատկերը տալու համար, կա սուլթան Մուստաֆա Բ-ի ուշագրավ մեկ ֆերմանը, որ, Ֆերիդի Պոլիս ժամանակին քիչ առաջ տրված, կպարզե, թե ինչ համեմատություններ ստացած էր կաթոլիկ միսիոնարներու գործունեությունը Պոլսո և դավաններու մեջ, և ի՞նչքան գրգռություն ստեղծած էին կաթոլիկության հարողները լատին եկեղեցիները հաճախել ստիպելու անոնց փորձերը:

1697 մայիս 22—31 (1108 Զիլեադե 1—10) թվախիր այդ ֆերմանին մեջ սուլթանը կըսե. «Հրաման կարձակվի Պոլսո քայմաքամին և դատավորին, թե՛

Մայրաքաղաքս բնակող հայերը կայսերական բանակատեղիս դիմելով ըսին, թե մի՞շտ իրենք հին օրերի ի վեր իրենց սովոր եղած կրոնական ծեսին համեմատ կընթանան, մայրաքաղաքս բնակիչներին Շեշթեմուր-օղլու Արիկը, Թուրք-օղլու Արիթոն և Միհալիմ-օղլու Կարապետ անուն անձերը, իրենց հին ծեսը թողած, պապին ազգության կպատկանին և այդ բանին կդրդեն ուրիշներ ևս, ամուսնական և այլ ծեսերու հակառակ կշարժին, և այսպիսով խռովության պատճառ կդառնան:

Ասկե առաջ հայտարարված էր, որ պապին պատկանող ֆրենկները Քիոս կղզիին մեջ այլազան դավաճանությանց և գրգռությանց տեղի կուտան, իսկ պապին կողմն զրկված ինչ-ինչ հոգեւորականներ, հանդերձանք փոխած, կթափառին նահանգն նահանգ, հույն, հայ և ուրիշ քրիստոնյաներ կդրդեն իրենց հին դավանանքը լքել և հարկ ֆրենկ դավանանքին, և այս կերպով պատճառ կդառնան ոչ-խալամ տարրերու մեջ խռովությանց և ըմբոստությանց, ինչ որ հակառակ ըլլալով արքայական կամքիս, հրովարտակ ուղղված էր Դամասկոսի կուսակալին և դատավորին, նույն նահանգին մեջ գտնվող դատավորներուն, գլուխներու սպաններուն, նահանգին երեւելիներուն (այսին) և գործի մարդոց (իշ էրլերի), որպեսզի եթե իրենց նահանգին մեջ կան ոչ-խալամներ, որոնք գրգռությանց հետեւանքով իրենց դավանանքն ելած և պապին կրոնքին հարած են, խստով պատվիրվի այդպիսիներուն իրենց հին ծեսին դառնալ, ախուհետեւ նման գրգռությանց հանդեպները ձեռքաւարկվին, որոնք նկատմամբ տնօրինվի նվիրական օրենքին նախատեսված

պատիժը և այսպիսով վերջ տրվի անոնց գրգռությանց, միևնույն ժամանակ զգուշութիւն ըլլա, որպեսզի խաղաղ ապրողները ոտնձգությանց և կեղծքումի չենթարկվին:

Ինձմե խնդրված ըլլալով այժմ որպեսզի հրովարտակ մը ևս տամ հիշյալ նահանգին ուղղված ձևով և արձանագրությանց դիմված և հաստատված ըլլալով այդ հրովարտակին բովանդակությունը, ձեզ ևս կգրվի, որպեսզի շարժիք միևնույն կերպով:

Հոգեբանական այսպիսի պահու մըն էր, որ կրացվեր դարը:

2. «ԵՐԿԱԹՅՈՒՆ ԴԻՄԱԿՈՎ ՄԱՐԴԸ»

Ընթերցողը թող մեզի ներե, եթե Շնորհաց 1964 թվականին ալ այս խորագիրը կուտանք հատվածի մը, որ պիտի բանա Պոլսո հայոց պատրիարք Ավետիք Եվդոկիացիին նվիրված մեր բանի մը էջերը, այսինքն մարդու մը, որ բնմին վրա հայտնված դավանական վեճերու ամենեն ավելի կրթութ մեկ պահուն, երբ կաթոլիկ բարոգությունը հայ ժողովուրդի ծոցն էր մխրճեր իր ամենի թափը, կուգար հայ ավանդությանց պաշտպան կանգնելու, և իր այդ նախանձախնդրության մեջ, պահ մը կրթով կվարակվեր և ինքը, բավական նոխազ դառնալու համար ի վերջ ճիշդվիտներու մոլեգնություն:

«Երկաթե դիմակով մարդը» տիտղոսը տվին այս մարդուն, երբ կաթոլիկ հավատաքնությունը հաջողեր էր զայն խել իր ժողովուրդի ծոցն, և տանջարանն տանջարան անցնելն հետո զայն, հասցուցեր էր Բաստիլլ, ուր արքայական մենամուտությունն ու կրոնական անհանդուրժողությունը կհամախմբեն այն ժամանակ զահուն և կրոնքին թշնամիները, անոնց կապը խզելով այլևս դուրսի աշխարհին հետ:

Ավանդությունը կըսե, թե երկաթե դիմակ մը կանցնեն անոնք իրենց զոհերուն երեսը, որպեսզի անձանաչելի դարձնեն զանոնք իրենց շուրջիներուն ալ, և թե այն օրերուն, երբ հայոց պատրիարքը Բաստիլլ էին նետած իր թշնամիները, բռնապետության ալս սե որջին մեջ երկաթե դիմակով մարդ մը արդարեւ կար: Ավանդությունը երկաթե այդ դիմակին տակ հայոց պատրիարքը ենթադրեց պահ մը:

Եվ այդ օրեն ասդին ամբողջ գրականություն մը ստեղծվեցավ երկաթե դիմակով մարդուն շուրջ, ավելի քան հիսուն հատոր: Բոլորը կփորձեն խորհրդավոր առեղծվածք լուծել. տվ է ծածկված այդ դիմակին տակ: Եվ միայն զայն իրենց նյութ ըրին վիպասանները ինչպես Ալեքսանդր Դյուման, այլ լուրջ պատմաբաններ ալ, ինչպես էր Միշլեն, պ-

մենն վարպետ ճիզվիտներեն սկսյալ, որպիսին էր Հ. Գրիֆն, մինչև լրջալուրջն Վոլտեր: Ոմանք պարզապես հերքեցին առասպելը, չկարենալով բուն դիմակավորը երևան հանել, ուրիշներ մոլորեցան ենթադրությանց և երևակայությանց բավիղին մեջ:

Ամենավերջին գրությունը, որ մեզ ծանոթ է, ֆրանսացի ակադեմիական իրավաբան Հանրի Ռոբերի ընդարձակ մեկ հատվածն է, պատմության մեծ դատերուն նվիրած իր հատորներեն մեկուն մեջ⁵²⁰: Հեղինակը կթվի բանի մը տասնյակ դեմքեր, որոնք նույնացված են առեղծվածային երկաթե դիմակով մարդուն հետ: Երկաթե դիմակով մարդն ըլլալ կարծված են, օրինակ, Լուի ԺԴ-ի եղբայրը Ֆրիսկո, նույն թագավորին ենթադրյալ երկվորյակ մեկ եղբայրը, ինչպես և Դը Վերմանդուա կոմսը, որ թագավորին ապօրեն մեկ զավակն էր, դեմքեր, զորս Լուի ԺԴ իբր թիշ շահ ուներ Բաստիլի մեջ չբացնելու անհետ: Իբրև երկաթե դիմակով մարդը կասկածված են նաև Բոֆորի դուքսը, Մոնմուլթի դուքսը, համբավվոր Ֆուգեն, Ավստրիո Աննա թագուհին ապօրեն մեկ զավակը, զոր ունեցած էր Բուլինգամեն, հայոց Ավետիք պատրիարքը, կարգինալ Մազարենի մեկ զավակը, երիտասարդ տղա մը, որ 13 տարեկանին հանդգնած էր երգիծական երկու ոտանավորներ ձոնել ճիզվիտներուն, նույնիսկ Մոլիերո, որուն ճիզվիտները չէին ներած Տարտյուֆը գրած ըլլալուն համար, անգլիացի միլորդ մը, Բուլոնդ անուն ֆրանսացի զորավար մը, Լուի դը Օլբենգորֆ և Ռուստաշ Դան-ժե անուն ուրիշ երկու անձեր, Մանդուի Շարլ Դ դուքսին նախարար Ռեզո Մատթիոլին, Շահաբասի ապօրեն զավակը Ջաֆեր, և վերջապես Մարիիոլի անուն մեկը, որ հակառակ հանվանե կերևա. բանտային արձանագրությանց մեջ:

Ըստ ֆրանսացի ակադեմիականին, ճիշտ է որ Բաստիլի բանտին մեջ արգելափակված են անձեր, որոնք թավիշն դիմակներ կրած են, բայց բոլորովին շինծու կգտնե երկաթե դիմակով մարդու մը շուրջ հյուսված առասպելը, որուն հեղինակը կսեպե նույնինքն Վոլտերը, որ իբրև թիշ ինքն իսկ հերյուրած է դայն, ավելի ևս մոռալ ցույց տալու համար արքայական ռեժիմը և անոր զոհները՝ ավելի դժբախտ:

Եթե այնուամենայնիվ «Երկաթե դիմակով մարդը» խորագիրը տվինք մեր այս հատվածին, անոր համար էր, որ այդ խորագիրը մարդոց մտքին մեջ միշտ պիտի հիշեցնե Բաստիլը և հավատաքննության օրերը, զորս

ան կխորհրդանշե և որոնց զոհն եղավ պատրիարք մը, իր ունեցած և շունեցած մեղքերը քավելու համար անոր մոռալ պատերեն ներս՝ Արև-Արբային հովանիին տակ:

Բացի ժամանակակից աղբյուրներու մեջ մեզ ավանդվածն, մեր պատմությունը շատ քիչ բան գիտեր այն դժնդակ շրջանին մասին, որ Ֆերիոլի դեսպանության օրերն եղան Պոլսո մեջ: Եվ ինչ որ գիտեր, լեցուն էր խեղաթյուրումներով, ինչպես որ առհասարակ բոլոր տեղեկությունները, որոնք կաթոլիկ խողովակով հասած են մեզի այդ օրերուն մասին, և, ավա՜ղ, դեռ ուրիշ շատ օրերու մասին, երբ կաթոլիկ պրոպագանդը եկած է հայկյանքը խողովել՝ պատմության առջև սրբանալու համար այդ պատմությունը խեղաթյուրելով:

ԺԼ՝ դարու առաջին տասնամյակներու Պոլսո անցքերուն մասին ցանցառ են ժամանակակից հայ աղբյուրները: Պետք է գոհանանք ձեռագիրներու հիշատակարաններով և տեղեկությանց այն փշրանքներով, զորս ժամանակ առ ժամանակ մեզ կհրամցնեն Վենետիկի Մխիթարյանները, անոնց աղբյուրն անգամ հաճախ մեզմե ծածուկ պահելով կա՛մ պարագային համեմատ անխնա կտրատելով իրենց կատարած մեղքերումները:

Թուրք աղբյուրներեն շատ բան սպասել պետք չէ. այսուհանդերձ այդ օրերն կարգ մը ֆերմաններ հասած են մեզի, որոնք պաշտոնական շրջանակներու շահագրգռությունը կլուսաբանեն դեթ. իսկ թուրք պատմիչները արևելյան երեակայությունը միշտ խառնած են իրենց արձանագրած փաստերուն:

Օտար ճամբորդներ այդ օրերուն շատ չկան, և եղածներն ալ շատ ժլատ են մեր մասին. բացառություն է անոնցմե մեկը, որ ավելի առատաձեռն է տված իր տեղեկությանց մեջ⁵²¹:

Ճիշտ է, որ Ավետիք պատրիարքի շրջանը մեզ լուսաբանելու համար մեզ օգնության հասավ նաև իր իսկ ձգած ինքնակենսագրությունը: Այս ինքնակենսագրությունը շատ մը դեպքեր և թվականներ կճշտե անշուշտ և մեզ կպարզե «Ճանապարհ խաչի»-ն, ուրկն անցավ Ավետիք Եվդոկիացին իր առևանգումն մինչև իր անփառունակ վախճանը: Բայց մարդ ստիպված է հաճախ կասկածիլ այդ ինքնակենսագրության մեջ պատմված դեպքերուն վրա: Դրված պահու մը, երբ իր հոգեկան տրամադրությունները արդեն լրիվ քայքայված էին կաթոլիկ հավատաքննության թաթին տակ և երբ ամեն զոհողության ստիպված էր հանձնառու ըլլալ արևու լույսին

⁵²⁰ Henri Robert, „Des grands procès de l'histoire“, Paris, 1925, p. 87—122,

⁵²¹ La Matraye, „Voyage en Europe, Asie et Afrique“, La Haye, 1727.

եկեղեցու համար, գոնե կյանքին վերջին օրերուն, կարելի չէ հավատալ անկեղծութիւնը ոչ իր դարձին, ոչ ալ իր ինքնակենսագրութեան մեջ տեղ-տեղ սպրդած բռնազրոսիկ արտահայտութիւններուն:

Ավետիքի ինքնակենսագրութիւնն ու հիշատակարանը հատուկ զննութեան նյութ դարձուց Մ. Բրոսե Պետերբուրգի պատմական գիտութեան ընկերութեան առջև 1873-ին ներկայացուցած իր զույգ մը զեկուցումներով⁵²², ուր ֆրանսերէնի վերածած էր Ավետիքի գրութիւնները: Անոնք նյութ եղան և այդ շրջանով զբաղող հայ բանասերներուն, շատ բան փոխելով արդեն գիտցվածներին:

Նույն այդ տարիներուն էր, որ լույս տեսան երեք կարևոր գրքեր, որոնք եկան լուսաբանելու շրջան մը, զոր կաթողիկոս աղբյուրները կճանչնայինք լոկ: Նախ լույս տեսավ 1870-ին Մարիուս Տոպինի գիրքը «Երկաթե դիմակով մարդը»-ուն մասին⁵²³ և նույն տարին Վարենբերգ լույս ընծայեց Ֆերիոլի թղթակցութիւնները⁵²⁴: Տասնյակ մը տարի հետո էր, որ Ռավասոն պիտի հրատարակեր Բաստիլլի արխիվը⁵²⁵, Երեք երկեր, որոնք զիրար կլրացնեն, փաստերու հեղեղին տակ լուսաբանելու համար Հայ Եկեղեցւոյ դժնդակ մեկ պահը:

Մարիուս Տոպինի գիրքը մանավանդ կտշտած էր Ավետիքի պատրիարքի ապրած բովանդակ ողբերգութիւնը պատմութեան հանձնելու և ան թարգմանվեցավ իսկույն հայերէնի⁵²⁶, այնուհետև առաջ՝ դառնալու համար բոլոր անոնց, որոնք զբաղեցան ԺԼ դարու առաջին երկու տասնամյակներու դեպքերով:

Տոպինի մեզի տված փաստերը բարեբախտաբար ուժ ստացան ուրիշ աղբյուրներէ ալ, և Հայ Եկեղեցւոյ մեծ պատմագիրը Օրմանյան, առավելապես այդ փաստերուն կկոթնի, քայլ առ քայլ հետեւելու համար Ավետիքի պատրիարքի ալեկոծ կյանքին և Ֆերիոլի գործած շահատակութեանց, չենք գիտեր ինչու մատչելի եղած չլրլալով իրեն այն քանի մը մյուս աղբյուրները, զորս հիշեցինք:

Տոպին իր գրքով, զոր «Երկաթե դիմակով մարդը» տիտղոսած է, այնուամենայնիվ

թանկագին ուղեցուց մըն է բոլորիս համար, որպեսզի ճանչնանք խաշի այն դժնդակ ճամբան, ուրկեք քալեց Ավետիք Գողգոթա հասնելու համար:

Ավետիք Եկեղեցւոյ Հայ Եկեղեցւոյ պատմութեան մեջ այլևս սոսկ դեմք մը չէ: Ան կխորհրդանշե ամբողջ շրջան մը՝ շրջանը քրիստոնյա եկեղեցւոյ մը արշավանքին ուրիշ եկեղեցւոյ մը սեմին ներս, և փոքր ժողովուրդի մը խոլ մաքառումին՝ իր պապերուն հավատքը պահելու համար: Պատմութիւնը թերեւս օր մը բնավ չհիշե մեղքերը, զորս ժամանակակիցները կվերագրեն Եկեղեցւոյ, և հանձին անոր, սերունդներուն փոխանցե դեմք մը լոկ, զոր կաթողիկոս հավատաբանութիւնը խլեց Հայ Եկեղեցւոյ ծոցէն, զայն դիակի վերածելու և այդ դիակը շահագործելու համար օր մը:

3. ՀԱՅ ԵԿԵՂԵՑԻՆ ԿԱԹՈՒԼԻԿ ԳՐՈՇԻՆ ԱՌՋԵՎ

ԺԼ դարուն բոլորովին նոր կերպարանք ստացեր էր կաթողիկոս գրոհը: Նախորդ դարուն հաջողած կողիւզ մը կազմել հայ ժողովուրդի ծոցին մեջ, հիմա կփորձեր ամրացնել շահված դիրքերը:

Ճիւղիկներն էին, որոնք այս դարուն ևս կղեկավարեին կաթողիկոս գրոհը, այժմ տարբեր գործելու եղանակ ողորդած քան նախորդ դարուն: Դեմ էին անոնք, առանց այլևայի, որնէ հասկացողութեան հերձվածող հայերուն հետ: Կոթնած Հռոմէն ստացած իրենց հրահանգներուն, անդիդող մնացին միշտ անոնք, և խափանեցին հասկացողութեան ամեն փորձ:

Ճիւղիկներն էին հետեւաբար, որ ամեն միջոց փորձեցին արգիլելու համար հայ կաթողիկոսներուն Հայ Եկեղեցի հաճախել: Անոնք դեմ եղան նաև, որ հայ կաթողիկոսները իրենց սեփական ազդեցութիւններն ունենան: Ըստ անոնց, ջերմեռանդ կաթողիկոս մը կատին Եկեղեցին միայն պետք էր հաճախել և անդրովի մնացին իրենց այդ տեսակետին մեջ:

Կաթողիկոս գրոհին նոր շրջանը այն տարիներն են, երբ Պոլիսը խռովեցին հայ կաթողիկոսներու ծիսակատարութեանց շուրջ հարուցված վեճերը, որոնք նվազ բուռն չեղան մարդորսներու փորձերին հայ ժողովուրդի ծոցը թափանցելու համար:

Բեկին ԺԼ դարուն Պոլիս գործող ճիւղիկներուն մեջ կմատնանշե մասնավորապես հայր Ժակ Կաշո անունով մեկը, որ «հայոց հայր» տիտղոսին հետ մեկտեղ կկրեր նաև «ստրուկներու հայր» մակդիրը: «Ան էր, որ Աստուծոյ բացառիկ տաղանդ ստացած էր հայոց ազգի փրկելու: Միմիայն 1712 տարվան մեջ մոտ 400 հերձվածողներ փրկեց և միայն ինքը 3 000 հոգի խոստովանեցուց: Հաջորդ տարին, 1713-ին, դավանափոխ եղող հերձվածողներ

⁵²² M. Brosset, I, «Le prétendu Masque de fere arménien, ou autobiographie d'Avétik, patriarche de Constantinople, avec pièces justificatives officielles, II „Histoire diplomatique du patriarche arménien Avétik de Constantinople..»

⁵²³ M. Topin, „L'homme en masque de fer", Paris, 1870.

⁵²⁴ Varenberg, „Correspondance du marquis de Ferriol", Anvers, 1870.

⁵²⁵ Ravasson, „Archive de la Bastille", 1886.

⁵²⁶ Մարիուս Տոպին, «Երկաթե դիմակով մարդը», Բրզմ. Կարապետ Ութույան, Կ. Պոլիս, 1890:

րուն թիվը կրկինը եղավ: Նույն այս հայր Կաշուն էր, որ ներշնչեց Մխիթարի և ուրիշներուն՝ համախմբվել միակ կազմակերպության մը մեջ, միակ կանոնադրության մը տակ, որ իր հեղինակությունն էր գտնե մեծ մասամբ, և նպաստեց այս կերպով Մխիթարյան միաբանության հիմնարկմանը⁵²⁷:

Կաթողիկ գրոհին դիմագրավելու համար Հայ Եկեղեցին անպատրաստ էր եղեր ժեղաբուն: Դեռ անկարող թափանցելու վտանգին, որ այդ գրոհը հայ ժողովուրդին կսպանար, հայ հոգևորականությունը չէր կրցած թուփ կանգնել գրոհին առջև և թողուցեր էր, որ կաթողիկ քարոզությունը տակավ հող շահի հայ ժողովուրդի ծոցին մեջ: Ավելին. այդ քարոզությունը խաչծերով էր եկեր և պատրանքներով օրորեր հայ հոգևորականության ու հայ ժողովուրդի միամտությունը: Մարդորսները հայ ժողովուրդին կուգային Ավելի երկրի բոլոր բարիքները խոստանալով, և չկա ավելի զորավոր հուռութե տառապող ժողովուրդներուն համար, քան սպեղանի խոստանալ անոր ցավերուն: Ճիշտ այդ սպեղանին էր, որ խոստացեր էին Հոռմի գործակալները:

Բոլորովին տարբեր էր արդեն ժԸ դարը: Հայ հոգևորականությունը սթափած ըլլալ կթիւր երբեմնի իր պատրանքներին: Խաչծերը պտուղ չէին տվեր և ոչ ալ հայ ժողովուրդի դատը շահեր էր բան մը: Ասկի զատ, Հոռմի գործակալներուն նոր ուղղամարտությունը ամեն զնով զգեստներու համար հայ ժողովուրդը իր հավատքին մեջ, ինքնապաշտպանության տեսակ մը բնաղդ ծավալեր էր հայ հոգևորականության շարքերեն ներս: Հայ հոգևորականությունը կսկսեր իր կոշումին դիտակցել և ավելի ջերմորեն գուրգուրալ անկախությանը վրա, որոնց պաշտպանության հոգը կըզար ալլես որ իրեն է միայն հանձնրված: Այնպես որ ժԸ դարուն Հայ Եկեղեցին ավելի ամուր մնաց կաթողիկ գրոհին առջև: Անշուշտ տատամսումներ ունեցավ նաև այս դարը և կաթողիկ քարոզությունը որսեր քաղեց հայ հոգևորականության շարքերեն:

Մայր Աթոռը այս դարուն ավելի անհողող մնաց կաթողիկ պրոպագանդին առջև, քան եղեր էր դար մը առաջ: Եվ արդեն ան շատ ալ թիրախ չդարձավ լատին քարոզիչներու գրոհին: Այնպես որ այլևս չենք հանդիպիր այնպիսի կաթողիկոսներու, որոնք ընդառաջ դացած ըլլան պապական աթոռին, ինչպես որ եղան նախորդ դարերուն, երբ դեռ այն միամտությունը կար, թե հայ ժողովուրդին բարիք կրնար գալ Հոռմի հետ մերձեցումն մը:

Այս դարուն ավելի ամուր մնաց նաև Պոլսո Աթոռը: Ճիշտ է, որ դարուն սկիզբը քանի մը դժգույն դեմքեր նստեցան այդ Աթոռին վրա, ինչպես էին, օրինակ, Մելքիսեդեկ Սուրհին և Մխիթար Քուրդիստանցին, որոնք հաճոյակատար վարմունք ունեցան դեպի կաթողիկները, անոնց առջև նույնիսկ բանալով Հայ Եկեղեցւո բեմը: Բայց անոնք հեռու են դարը հատկանշելու: Իրենց սիրալիք վերաբերումը կաթողիկներուն հանդեպ անշուշտ որ զանոնք պահ մը հույսերով օրորեց և նույնիսկ հանդուգն ալ դարձուց, բայց անոնք չկրցան ավանդություն ստեղծել: Հայ Եկեղեցւո բեմը դարձալ խլվեցալ դասալիքներեն և անոնք չհաջողեցան ալլես Հայ Եկեղեցին հարվածել իր իսկ խորանին վրա:

Այս «բարյացակամ» պատրիարքներու կողքին, Պոլսո Աթոռը խստաբարո դեմքեր ալ տվալ, որոնք կաթողիկ գրոհին դեմ Հայ Եկեղեցին պաշտպանելու իրենց մտահոգությունը ծայրահեղությանց ալ տարին: Եփրեմ Դափանցին և Ավետիք Եվդոկիացին աղոնցմե եղան:

Ավետիքի առևանգումն հետո, ցնծության պահ մը ապրեցալ կաթողիկ պրոպագանդը: Այնպես հուսաց ան, որ բերդը կբալբայվի տակալ: Այս անգամ ևս հաշվի չէր առած ան հայ ժողովուրդը: Ինչ ալ եղած ըլլային Ավետիքի մեղքերը, հայ զանգվածները, հանձին անոր, նահատակ մը ողբացին իսկույն: Իր թշնամիները դայն խլած էին, անոր հետ Հայ Եկեղեցին ևս խորտակած ըլլալու հաճույքին համար: Ավետիք Բաստիլ տարված էր, բայց ասդին կշարունակեին շնչել հայ ավանդությունները: Կաթողիկ պրոպագանդը անգամ մը ևս ձախողած էր:

Եվ այնուամենայնիվ շխաղաղեցալ Պոլսու, Ավետիքի չբացումն հետո ալ:

Հինգ պատրիարքները, որ տասնամյակի մը ընթացքին Ավետիքի հաջորդեցին Պոլսո Աթոռին վրա, — Մարտիրոս Երզնկացի (1706), Միքայել Խարբերդցի (1706—1707), Մահակ Արուշեխցի (1707 և 1708—1714), Հովհաննես Զմյուռնացի (1707—1708) և Հովհաննես Գանձակեցի (1714—1715), — առավել կամ նվազ դժգույն տիպարներ եղան, բացի մեկին:

Անոնցմե Հովհաննես Զմյուռնացին է՝ միայն, որ իր կարճ պատրիարքության միջոցին տեր կանգնեցալ Եփրեմ Դափանցի և Ավետիք Եվդոկիացի պատրիարքներու ավանդություններուն:

Կոմիտաս քահանայի նահատակությունը ամենեն ողբերգականն եղալ այդ բոլորին մեջ, ան զոհն եղալ պարզապես դժբախտ մթնոլորտին, զոր ստեղծեր էր կաթողիկ արշավանքը Պոլսո հայության ծոցին մեջ:

⁵²⁷ Bellin, „Histoire de latinité de Constantino-ple“, Paris, 1894, p. 267.

անմահացուց մազադաթներուն վրա ու ծաղկեց զանոնք, այնպիսի ղմայելի ճաշակով մը, որ հազիվ կսանձեր իր քմայքները: Հայ վարպետները հայ ոճն էին տվեր վանքին, հայ վանականը ի՛րը տվալ գույներուն և մեղեդիներուն:

Ու նույն այդ վանքերուն մեջ, մութ ու մոռյալ խուցերուն ծոցը, հայ հոգին հորիզոն բացավ իրեն: Հայ վանականը հաճախ ձերբադատուց իր հոգին իր կապանքներեն ու փորձեց թափանցել բնության գաղտնիքներուն: Աշխարհի խորհրդավոր երևույթներուն մերձենալ համարձակեցավ ան, առաջուր ընելով հաճախ ավանդույթներուն, որ զինք կկաշկանդէին: Գործը առաքելոցին հետ Արիստոտելն ալ սերտեց, ու չվախցավ մեկնելու Մենդոց գիրքը: Մարգարեները վերլուծած ժամանակ Պյութագորն ալ շմոռցավ, և Ավետարանի պատգամները մեկնաբանելու միջոցին, ճգնեցավ աստղերու գաղտնիքն ալ լուծել: Զայն չգոհացուցին Դավիթն ու Սողոմոնը իրենց անհուն իմաստութեամբ, ու փորձեց ինք ևս մազադաթին հանձնել ինչ որ իր միտքը կկորզեր իր ճախրանքներեն: Սաղմոս ու աղոթք չփսփսաց միայն իր խուցը քաշված, այլ խոսքի և վեճի նստավ իր Արարչին հետ, Աստուծո Մայրը իր խուցը կանչեց և անոր բացավ իր հոգին, ու հորինեց տաղեր ալ, որոնց մեջ հոգեկան խոհերու աղբնթեր, կրքաբախեր և սիրտը:

Եվ այդ վանքերեն եկան հայ ժողովուրդին իր եկեղեցիով գրեթե բոլոր կարկառուն ղեկավարները: Մարգած իրենց միտքը անոնց շորս պատերեն ներս, և թրծված այնտեղ հայ ավանդույթանց բովին մեջ, գացին բազմիչ զանազան Աթոռներու վրա, այդ ավանդութեանց պատենը փորձելով դարձնել զանոնք ալ: Հոգևորականներու հսկա թիվին քով, որոնք փոքրավորութենէ հասան գիրքերու, միշտ փոքրավոր, հոգով միշտ բոբիլ մնացած, եղան ալ, որ հմտութուն և հետեւաբար պատկառանք բերին վանքերեն: Սքեմ կրող անթիվ մարդոց քով, որոնք կկակազեն կաթոլիկ քարոզիչներուն առջև, վանքերը դեմքեր ալ տվին, որոնք Բարսեղն ու Կյուրեղը սերտած, բայց և ծծած Տաթևացին և Շնորհալին, կհաջողեն ճակատիլ լատին աստվածաբաններեն մուրացված փաստերուն դիմաց: Թվով թեև դուլզն, բայց այդպիսի մարդիկ տվին վանքերը:

Պոլիս դժբախտաբար շատ հեռու էր վանքերեն և շատ երկար ժամանակ վանքեր չունեցավ շուրջը: Արմաշը մտավոր բույն մը չեղավ ի սկզբան, և անցյալ դարու սկիզբներէն էր, որ անկեղծեմք սկսան գալ Պոլսո Աթոռին, իսկ մեր օրերուն էր միայն, որ ան լծվեցավ նոր առաքելութեան մը, որ հազիվ

քառորդ դար մը պիտի տևեր: Պոլսը, հետեւաբար, ամբողջ շորս դար, կարոտ եղավ վանքերուն, որոնք միշտ չէ որ օգնութեան կուգային իրեն: Պոլսո Աթոռը, ինչպես տեսանք, ասպարեզ ծառայեց հաճախ հասարակ բախտախնդիրներու, որոնք սեցուցին տաշնապի դարը: Յանցառ եղավ, այդ դարուն, իրենց կոշման գիտակից հայ հոգևորականներու թիվը, և անոնցմէ շատ քիչերը միայն եկան բազմիչ Պատրիարքական Աթոռի վրա:

Պոլսը այսպես գտավ, ավա՛ղ, նաև ԺԸ դարը: Կաթոլիկ արշավանքին դիմագրավելու ընդունակ հոգևորականներու սովը միշտ կար, իսկ Պատրիարքական Աթոռի վրա եղողները կա՛մ տկարացան, կա՛մ շփոթեցան այդ արշավանքին առջև, այսինքն բոլորն ալ ձախողեցան: Ոմանք ձախողեցան, որովհետև շատ հանդուրժող եղեր էին, ինչպես Մելքիսեդեկ և Մխիթար, ոմանք իրենց թույլ կեցվածքին համար, ինչպես Գալուստ և Ներսես, ոմանք ալ զո՛հ գացած ըլլալով իրենց խստութեան, ինչպես եղեր էին Եփրեմ, Ավետիք և Հովհաննես Զմյուռնացի պատրիարքները: Եվ այս ձախողութեանց պատճառով, դավանական վեճերը կշարունակեին հրահրված մնալ ու կազմալուծված պահել հայ կյանքը:

Ավելի բախտավոր չէր անդին Երուսաղեմը: Դարավոր վանք մըն էր նաև ան, իր բազմաթիվ տասնյակ միաբաններով: Բայց միշտ հոգ մը կշարունակեր մնալ ան հայ ժողովուրդին համար: Մեկ կողմէն ներքին վեճերը միաբանութեան ծոցին մեջ, մյուս կողմէն պայքարները Աթոռը իրարու ձեռքէ խլելու համար՝ վրդով կպահեն կյանքը Ս. Հակոբյան վանքեն ներս: Այս դժնդակ կացութիւնը ավելի ևս վատթար կդառնար այն հավակնութեանց պատճառով, զորս Պոլսո պատրիարքները կսնուցանէին Երուսաղեմը իրենց ազդեցութեան տակ պահելու և երկու Աթոռներու հավասարապես պատրիարք դառնալու համար: Իրերու այս վիճակը չէր կրնար տաշնապ շտեղծել վանքին մեջ և ասպարեզ չբանալ նաև աշխարհական բախտախնդիրներու շահատակութեանց, որոնք ժամանակ առ ժամանակ ձեռք կառնէին վանքին ղեկը պապա կամ վեֆիլ անուններուն տակ: Տազնապին բնական հետեւանքն այն էր եղեր, որ Ս. Հակոբ կհեծեր պարտքերու տակ, իր սրբավայրերը աճուրդի հանվելու անմիջական վտանգին տակ:

Եվ ահա գավառի հեռավոր մեկ անկյունը կծկտած համեստ վանք մը օգնութեան հասավ զույգ Աթոռներուն, զույգ մը փրկարար զրկելով անոնց: Եվ արդարեւ, նախախնամական դեր մը եկան կատարել, երկու Աթոռներուն մեջ հավասարապես, ռուստակ ամբողջի հեռու, ինչպես կանվանե Բարգեն վարդապետ

Կյուլեմսերյան Ամրդուլի վանքին այն զույգ մը հոգևորականները, որոնք տաճնապաններով լեցուն պահու մը հայտնվեցան հանկարծ Հայ Եկեղեցիով ծոցին մեջ, սփոփանքի քանի մը տասնյակ տարիներ պարգևելով անոր: Զուխտակ այդ ամրդուլցիներն էին Հովհաննես Կոլոտ և Գրիգոր Շղթայակիր:

Ո՛ր էր Ամրդուլ:

«Բաղեշի Արևմտյան անկյունը, խոցեհովդեփ գրեթե ափին վրա, կրթարանա Ամրդուլովն անվան նվիրված փողերի վանքը, իր գեղեցիկ տաճարով», — կգրե Բաբգեն վարդապետ, որոշելով Ամրդուլի տեղը, Կոլոտի նվիրված իր ուսումնասիրության մեջ⁵³⁰:

Ու զավառի համեստ մեկ անկյունը ծվարած այդ համեստ վանքը նշանավոր պիտի դառնար Հայ Եկեղեցիով պատմության մեջ:

Ամրդուլի այդ վանքը կար վաղուց, իբրև հին դասատուն մը, բայց զայն ծաղկեցուց, ԺԶ դարու վերջերը Բարսեղ վարդապետ, որ, սերած Սյունյաց դպրոցեն, սնած էր Տաթևացիի հաջորդներուն շունչին տակ:

«Յորում ժամանակի էր յաջորդ և առաջնորդ, պետ և գլուխ վարդապետաց տեղույն այնմիկ ոմն վարդապետ Բարսեղ անուն, — կպատմե Դավրիժեցին, — որ էր այդ երևելի մեծանուն, և յուրով աշակերտաց տէր. և նոյն վանքն. Ամրդուլու յառաջագոյն խրթին և յոռի շինեալ էր և այն ևս խարխալեալ էր ի հնութենէ. սա զամենայն շինուածսն միահաղոյն քակեաց, և ինքն վերստին հիմնադրեալ շինեաց և կատարեաց զբովանդակն, զԵկեղեցին և զտներն և զայլն, որ ի նոսա:

... Արդ՝ այս Բարսեղ վարդապետ յինքնէ՛ իսկ գիտակ էր թէ՛ գիտութիւն արտաքին իմաստից և քերականութեան ո՛չ գոյ ի մէջ վարդապետացն Հայոց, և ինքն մեծաւ տարփանօք ըզձայր թերև հասանել այնմ գիտութեան, ոչ միայն վասն իւր, այլ մանաւանդ վասն ազգին, որպէսդի ամենեքեան հասցեն այնմ շնորհաց և գիտութեան»⁵³¹:

Դավրիժեցին կպատմե հետո, թե Բարսեղ ինչպէս տքնեցավ գրքերու վրա՝ ծուծը քամելու համար հիներու ավանդած իմաստութեանց, պաշար հավաքեց իրեն և իր շուրջիններուն համար, և աչքերը փակելն առաջ նույն կտակն ըրավ իր հաջորդներուն, որպէսդի անոնք ևս պատվիրեն իրենց կարգին իրենց «աշակերտելոցն՝ զի այսմ օրինակի արասցեն, և այսպէս յորդոց որդիս»:

Սերմը ցանած էր ան Ամրդուլու մեջ, երբ 1615-ին բաժնվեցավ աշխարհէն, բայց իր

ցանած այդ սերմը ապարդիւն չէր անցած: Ու կես դար հետո իրմե, Ամրդուլու մեջ պիտի հայտնվեր պատկառելի դեմք մը, Վարդան Բաղիշեցին, որուն շունչին տակ էր, որ պիտի հասունանային Հովհաննես Կոլոտ ու Գրիգոր Շղթայակիր:

Լեռ, խոսելով այն մեծ ճիգին մասին, զոր Բարսեղ վարդապետ ըրավ «արտաքին գիտութեանց» ուսումնասիրության համար, և թափանցելու համար հունաց փիլիսոփաներու երկերուն, կըսե, թե «այսպիսով հաստատում էր Բաղիշի ինքնուրույն դպրոցը իբրև անհրաժեշտ լրացում հայ վերանորոգված դաստիարակության, որ մտցնում էր նրա մեջ գիտնականության ոգին: Այս լուսավոր գործը հրաշալի մի երևույթ է դառնում, երբ նկատի ենք առնում այն միջավայրը, ուր նա ծնվեց և զարգացավ: Բավական է հիշել, որ հայերը, նույն այդ Բարսեղ վարդապետը և նրա դպրոցը գտնվում էին քրդական մի սանձարձակ թագավորության մեջ: Տիրապետողները ցեղային կյանքով անպրոք վայրենի վաշկատուններ էին, զուրկ գրից և գրականությունից, իսկ նրանց ձեռքի տակ ճնշված ուսանողները ժամանակ և հնարավորություն էին գտնում թե՛ իրենց ստրկական պարտականությունները կատարելու և թե՛ մինչև Արիստոտել, Պլատոն, մինչև դասական հելլենության բարձունքները, ձգտելու: Բաղիշի դպրոցը հենց այս պատճառով ներկայանում է հայ ժողովրդի կուլտուրական հանձարի մի շատ թանկագին հուշարձան»⁵³²:

Ոչ ոք պիտի կարենար, Կոլոտեն ավելի, այնքան կենդանի գույներով նկարագրել Ամրդուլու այդ վանքը այնպես, ինչպես ան կներկայանա ԺԶ դարու սկիզբը, և դերը, զոր Վարդան Բաղիշեցին ունեցեր էր անոր վերածաղկման մեջ: Կոլոտ 1719-ին գրված հիշատակարանի մը մեջ, պատմելն առաջ պարագաները, որոնց մեջ ինք և իր լծակից Գրիգոր վարդապետը, որ Երուսաղեմի՝ Շղթայակիր մեծ պատրիարքը պիտի դառնար հետագային, պիտի ստիպվեին Ամրդուլու վանքը թողուլ 1706-ին, մահեն քիչ հետո իրենց ականավոր ուսուցիչ Վարդանի, որ վախճաններ էր տարի մը առաջ, կգրե. «Գթութեամբն Աստուծոյ մեք նուստ ծառայես նորա՝ Գրիգոր և Յովհաննէս սպասաւորք Սուրբ Աւետարանին՝ զկնի վախճանեցման երջանկազարդի, ճգնազգեցի, առաքինասիրի և առաքելաշաղկի հօր մերոյ Տեառն Վարդանայ՝ աստուածաբանութեան բարունապետի և տիեզերալուր վարդապետի, հոգմավարմամբ իբրու եղեալ տարաքեցիկ՝ ի բնիկ գեղեցկազարդ, արփիասարաս, նշանաւոր, բարձրահամբաւ, մեծէ հա-

⁵³⁰ Բաբգեն ծայրագոյն վարդապետ Կյուլեմսերյան, «Կոլոտ Հովհաննես Պատրիարք», Վիեննա, 1904, էջ 1:

⁵³¹ Առաջիկա Դավրիժեցի, Վաղարշապատ, 1895, էջ 390—391:

⁵³² Լեռ, «Հայոց պատմություն», Գ, էջ 276:

մալսարանէ մերմէ, որ է ի Զորորդ մասին Հայոց ի գաւառին տողձ, ի տեղին Սալնոյ ձոր, կերտեալ ի բղեշխացն Արծրունեաց, որ ամանցեալ կոչի Բաղէշ:

Ի սոյն աստուածապահ քաղաքին շինեալ ի վիմաձիլ բլրոյ գագաթնա՝ աստուածաբնակ ուխտ, երկնաքատակ առագաստ, խորհրդաբան խորան և շնորհաբաշխ տաճար՝ յանուն հիւսնաշ Սրբոյն Յովհաննու Կարապետին, սահմանաւորեալ արեգակնածագ կողմամբն զարմանահաշ աղբերակօք կարկաշտոյն և ծաղկապաճոյճ փոքր պարտիզիւ Իսկ յարեմուտն՝ ծիծաղածաւալ, երկարաշու, վիմաբուղի յորդրեթացի գետով և թիկնէթիկ հեղաքալլ առուի՝ ոլորտախաղացեալ առ հարաւով, գեղաւորեալ ծառատնկօք պտղաւտիւք: Իսկ ի հիւսիսոյ առ մուտն արևու և բարձրաբերձ տամբք քրիստոնէից՝ հպաւորեալ շիրմիւք հաւատացեալ ննջեցեցոց:

Ջսոյն սուրբ վանքս մեծանուն, ի հիմանէ նորակերտեալ կրկին՝ սրբատաշ, կրամած, խաշակառ կաթողիկէի և թախառնս բնակարանիւք, աշակերտական գոլփ և ճոխ զարմանալի վարդապետական պէսպէս մատենիւք, եկեղեցական դեռստիւք զարդարեալ պսակեաց Տէր Վարդապետ, գերընտիր հայրս մեր վերոգրեալ:

Եւ զի թէպէտ զո՛ն յայսմ տիրախնամ քաղաքին այլ վանորայք չբնաղք և եկեղեցիք հոյակապք և զմբէթունիւք ծաղկեցեալք ի ձեռն բարեպաշտութեան միարանից և կարգաւորաց, որք ի մերոյս վերոյիշեցեալ վարժապետէն և որք յայլոց: ... Քանզի սա՛ է երևելի, գերազանց դասատուն և դամբարան մեծաքանշ թարունապետաց:

Որ և մեծաւ շնորհատութեամբ սրբոյ տաճարիս այսորիկ՝ սուրբ վարդապետն Բասիլ լուսահոգին Աղբակցի՝ եգիպտոսիւ արտաճեց զշափղ, և հաւաքեաց զաշակերտս յոլովս՝ ուսուցանելով զեին կորուսեալ և զնուգտեալ զգնաղն իմաստութիւն, և նոքօք զսոյն լուսահոգ գիտութիւնս ի մէջ ամենայն ազգի մերոյ առսփռեաց, որպէս և վիպարանէ քաջաջան պատմիչն մեր Առաքել վարդապետն:

Իսկ ի թուարեութեանս մերում, ՌՃԾԴ (1705) ամին՝ ելից տէր և ուսուցիչ հայրս մեջ քաղցրաբարոյ և համեղաբան զիւրոյ պանդրխտութեան ժամանակն: ... Ուստի և հանգեալ ի յոգնավիշտ աշխատութեանց, եթէ յայլասեռից և թէ ի մերայնոց ամբարտաւանից և գոռգակութեան ինքնաճանից: Որք նախանձէին ընդ բարեհոշակ, աշխարհալուր անուն նորին և ընդ քաջանշոյլ, լուսակրօն վարս նորա: Եւ մանաւանդ ընդ աղբիւրասարաս, աստուածատու բեմբասացութիւն, որպէս և է՝ սովորութիւն բնականապէս և յայտնի բարձրաջօնից մերոց:

Եւ յետ որոյ՝ վեհազն հովիւս մերոյ առ Տէր զնալոյ, ցրեալ ցրեցան գաղինք ողջամիտք...⁵³³:

Ինչպես Բարսեղի, նույնպես և Վարդանի օրով Ամրդոլ մեկը հանդիսացաւ հաղվաղեւոյ մտքի օջախներէն, որոնք դեռ կհամենային այդ դարուն, և ավելորդ է ըսել, որ ան ևս, մեր ուրիշ շատ մը վանքերուն պես, իր ծոցը կպատասպարեն հարուստ մատենադարան մը: Ամրդոլը շենցնող զուլգ դեմքերը՝ Բարսեղ և Վարդան, չէին կրնար ամբարած չլլալ հոն մաս մը հայ ժողովուրդի հոգեկան դանձն և զարկ տված չլլալ նոր երկերու ստեղծման: Նալյան կհիշէ, թե Կոստ, Պոլսո մեջ՝ իր ստեղծած մտքի օջախ օժտելու համար անհրաժեշտ գրքերով, բերել տվաւ իր պատրիարքութեան օրով Ամրդոլի հարուստ մատենադարանին կարեւորագոյն ձեռագիրներէն անոնք, որոնք Պոլսո մեջ չէին գտնվեր, և ընդօրինակել տալն հետո, ետ վերադարձուց զանոնք⁵³⁴:

Ավելցնենք, որ Ամրդոլի հոգեկան դանձն կորիզ մը հասաւ մինչև մեր օրերուն: Բարդեն վարդապետ, Մուշի իր առաջնորդութեան շրջանին, առիթը ունեցած է աչքն անցնելու դանոնք. «Ժամանակի հետ, տգիտութեան և շարաշահութեան հառաջ բերած վնասներէն աղաւթած հոշակալուր մատենադարանի մը մնացորդները, զորս մեկիկ-մեկիկ աչքն և ձեռքն անցուցի, կցուցնեն ու կշեշտեն, թե ինչ ոգիով հոգնած, քրտնած և ծախսած է Բաղիշեցիին Վարդան, ա՛յն Քաղցրաբարոյ և համեղաբան» վարդապետը, որուն շնչովը սնած ու մեծցած են Կոլոտ և Շղթայակիր»⁵³⁵:

Բաղիշեցիի մահը ճակատագրական պիտի ըլլար սակայն Ամրդոլի համար:

«Վարդանին մահովը մահացաւ Ամրդոլու դասատունն ալ, — կըրէ Բարդեն վարդապետ: — Չարաշունչ, նախանձաբեկ կրօնավորներ կշշեշէին արդեն և սրտի ցաւ մը կզգային Վարդանի պես լուսամիտ և առատ բեմբասացի մը ներկայութենէն: Կոլոտ և Շղթայակիր, երիտասարդ վարդապետներ, անհուն մորմոքումով թողուցին «բարեհամբաւ և մեծ համալսարան», ուրիշ տեղ գտնելու իրենց համար ասպնջական բույն մը, երբ արդեն մտքի և սրտի ընտիր պաշարով օժտված էին և վարդապետական կոչման հաջող կերպով պատրաստված: «Ուժգին» արցունքով թիկունք դարձուցին (1705-ին) Ամրդոլին Կոլոտ և Շղթայակիր, հոգեկից և

⁵³³ Բարդեն ծայրագոյն վարդապետ, հիշված աշխատութեանը, էջ 142—148:

⁵³⁴ Նալյան, «Դանձարան հատուցման», Գ, էջ 272:

⁵³⁵ Բարդեն ծայրագոյն վարդապետ, հիշված աշխատութեանը, էջ 3:

հոգեկցորդ վարդապետները և ուրիշ վանքերու ու մենաստաններու այցելելի ետքը՝ իրենց շունչն առին Մշու Ս. Կարապետ՝ «Սրբոյն Գլակայ լուսաշեն» վանքը»⁵³⁶։

Ամրոլի տարագրելները կուգային ծառայելու Մշո Սուլթան Ս. Կարապետին։ Շուտ պիտի չքանար սակայն զայն նոր Ամրոլ մը դարձնելու իրենց երազը։ Ահավոր երկրաշարժ մը, որ 1709-ին քարոքանդ ըրեր էր Հայոց աշխարհը, ավերեց նաև Ս. Կարապետը։ Անհրաժեշտ էր զայն նորոգել, և այդ հոգը ստանձնեցին երկու Ամրոլցիները՝ Գրիգոր վարդապետը, որ այդ պահուն վանքը կվարեր իբր առաջնորդ, և Կոլոտ Հովհաննես վարդապետը, որ կգործակցեր անոր։ Նորոգութիւնը ահավոր պարտքերու ենթարկեց վանքը, և ստիպեց Գրիգոր վարդապետը, որպէսզի Պոլսի զրկէ Կոլոտը 1712-ին՝ հանգանակութիւն կատարելու համար ի նպաստ Ս. Կարապետի։

Կոլոտի ներկայութիւնը Պոլսո մեջ ճակատագրական դեր ունեցավ Հայ Եկեղեցւոյ պատմութեան համար։ Երկուստեք վարդապետը, որ հազիվ 34 տարեկան էր այն ժամանակ, հմայեց Պոլսը առաջին իսկ պահէն։ Իր խոհական կեցիւածքը և իր խոսքին դուրսնը զինքը սիրելի դարձուցին մեկն բոլոր խավերուն, և երբ Երուսաղեմի մեջ այդ պահուն տիրող տագնապը և գայթակղութիւնները հարթելու համար անհրաժեշտ եղավ մեկը զրկել Ս. Հակոբ, օրվան պատրիարքը, որ Սարգիս Ապուլեխցին էր, և Պոլսո հայ երեւելիները, ստիպեցին Կոլոտը, որ իսկույն Երուսաղեմ մեկնի իբր «աթոռակալ և վեբիլ»։

Կոլոտ 1713-ին Երուսաղեմ հասավ և նախախնամական դեր կատարեց հոն։ Աճուրդի դրված սրբավայրերն ազատեց և միջոցներ տնօրինեց պարտքերու հատուցման համար։ Վանքն ազատված էր այլևս բախտախնդիրներէն։ Սուլթան Մահմուդ, Երուսաղեմի փաշային տեղեկագրին վրա, «խիլայեց» երիտասարդ հայ վարդապետը։

Երբ Կոլոտ Պոլս դարձավ 1714-ին, ուրիշ անակնկալ մը կսպասեր իրեն։ Ազգը պահանջեց, որ ան Երուսաղեմը իր ուղածին թողու, և ինքն ստանձնէ Պոլսո պատրիարքութիւնը։

Կոլոտի մերժումը օգուտ չունեցավ։ Պոլսո հայ մահտեսիներն ու բոլոր երեւելիները միշտ կպնդէին, ամեն խոստում ընելով։

Հովհաննէս Կոլոտ զիջանեցավ ի վերջո, և 1715 սեպտեմբեր 9-ին, դեռ 37 տարեկան վարդապետ, նստավ Պոլսո Պատրիարքական Աթոռը։

Նորընտիր պատրիարքին առաջին գործն եղավ հաջորդ օրն իսկ պատարագ մատուցանել տալ Պոլսո եկեղեցիներուն մեջ, իբրև Երուսաղեմի պատրիարք հիշատակել տալով Գրիգոր վարդապետը, որ Ս. Կարապետ նստած, լուր իսկ չունէր բոլոր այս եղածններէն։

Սուլթանական հրովարտակով հաստատուելէ հետո երկու պատրիարքներու պաշտոնը և վավերացվելէ հետո նաև Աստվածատուր կաթողիկոսն, պաշտոնապես հաղորդվեցավ իրեն ալ։ Դժվարութեամբ ընդունեց ան իր վրա դրված այս բեռը և համակերպեցավ առաջնական Կոլոտի թախանձանքներուն վրա։ 1717 օգոստոս 18-ին ան Պոլս կմտնէր խանդավառ ցույցերու մեջ։

Ուշագրավ պահեր էին ադոնք Հայ Եկեղեցւո պատմութեան համար։

Ամրոլ կնստեր Պոլսո և Երուսաղեմի զույգ Աթոռներուն վրա։ Ու նոր թվական մը կրացվէր երկու Աթոռներուն համար ալ։

Վարդէ Աթոռներ չէին որ ժառանգեցին երկու ամրոցիները։

Դավանական վեճերու պատճառով ալիկոծված և քաոսի վերածված Պատրիարքութիւն մըն էր որ կստանձնէր Կոլոտ։

Գրիգոր վարդապետ պարտքերու բեռն տակ հյուծող և շահատակութեանց ասպարեղ դարձած պատմական վանքի մը գլուխը կուգար ու շղթա մը կանցներ վզին, ուխտելով զայն հանել այն ժամանակ միայն, երբ Ս. Հակոբ ազատած ըլլար իր պատքերէն ու հոգերէն։

Երկու պատրիարքները, ձեռք-ձեռքի տված, մեյմեկ նախախնամութիւն դարձան իրենց վստահված Աթոռներուն համար։

Հայ Եկեղեցւո պատմութիւնը պարծանքով արձանագրեց իր մեկ էջին մեջ «չուխտակ ամրոցիները»։

⁵³⁶ Քարգէն ծայրագոյն վարդապետ, հիշված աշխատութիւնը, էջ 3—4։



Մ Ա Յ Ր Հ Ա Յ Ր Ե Ն Ի Գ Ո Ւ Մ

ԼՈՒՐԵՐ ՄԱՅՐ ՀԱՅՐԵՆԻՔԻՑ

Թորոս Թորամանյանի ծննդյան 100-ամյակը.— Մարտի վերջերին Հայաստանի գիտական հասարակայնությունը շատ ջերմորեն նշեց հայ անվանի ճարտարապետ Թորոս Թորամանյանի ծննդյան 100-ամյակը։ Այդ առթիվ տեղի ունեցավ Հայաստանի գիտությունների ակադեմիայի արվեստի ինստիտուտի և Հայաստանի ճարտարապետների միության գիտական սեսիա։ Գիտությունների ակադեմիայի մեծ դահլիճում կայացավ պաշտոնական հոբելյանական հանդիսավոր մեծաթանքի երեկո, ներկայությամբ անվանի գիտնականների, արվեստագետների և պետական գործիչների։ Հոբելյանի կապակցությամբ հրատարակվելու է Թ. Թորամանյանի նամակահին։

Հուշարձանների պահպանության հայկական ընկերություն.— Փետրվարի վերջերին Երևանում տեղի ունեցավ պատմական հուշարձանների պահպանության կամավոր ընկերության համահայաստանյան հիմնադիր համագումարը, որին մասնակցեցին ականավոր պատմաբաններ, հնագետներ, գրողներ, արվեստագետներ, գիտության և մշակույթի գործիչներ։

Համագումարը քննարկեց երեք հարց. ա) Հայաստանում պատմական հուշարձանների պահպանության արդի վիճակը, բ) նոր ստեղծվող ընկերության կանոնադրությունը և գ) ընկերության ղեկավար մարմինների կազմերի ընտրությունը։

Հայաստանի սահմաններում այժմ կան մոտ 2 500 պատմական վանապան հուշարձաններ, որոնք պահպանվում են պետության կողմից։ Հուշարձանների պահպանության գործը ավելի լավ հիմքերի վրա դնելու համար, անհրաժեշտ է որ այդ գործին իրենց աջակցությունը բերեն ժողովրդական վանգովանները։ Ահա այս նպատակով է, որ հիմնված է այդ ընկերությունը։ Համագումարում բոլոր ելույթ ունեցողները միահամուռ ողջունեցին նոր ընկերության հիմնադրման գաղափարը գտնելով, որ այն մեծ դեր ունի կատարելու մեր պատմական հուշարձանների պահպանության գործում։

Համագումարը քննարկեց ու հաստատեց ընկերության կանոնադրությունը։ Համաձայն կանոնադրության, հուշարձանների պահպանության կամավոր ընկերության անդամ կարող են լինել ինչպես առանձին քաղաքացիներ, այնպես էլ հասարակական, պետական և մշակութային հաստատություններ ու կազմակերպություններ։ Ընկերության միջոցները գոյանալու են մուտքի վճարից, տարեկան անդամավճարներից և ընկերության հրատարակությունների իրացումից։ Ընկերությունն աջակցելու է ինչպես Հայաստանում, այնպես էլ նրա սահմաններից դուրս գտնվող հայ մշակույթի հետ կապված ճարտարապետական ու պատմական հուշարձանների պահպանության, վերանորոգման ու գիտական ուսումնասիրության գործին։

Համագումարում ընտրվեց կամավոր ընկերության խորհուրդ, բաղկացած 68 հոգուց և վերստուգիչ հանձնաժողով։ Ընկերության նախագահ ընտրվեց ժողովրդական նկարիչ Մարտիրոս Սարյանը։

Հակոբ Պարոնյանի երկերը 10 հատորով.— Հայ մեծանուն գրող-երգիծաբան Հակոբ Պարոնյանի ծննդյան 120-ամյակի կապակցությամբ, Հայաստանի գիտությունների ակադեմիայի գրականության ինստիտուտը տպագրության է պատրաստում տաղանդավոր գրողի երկերի ակադեմիական հրատարակությունը 10 հատորով։ Վեջերս լույս տեսավ այս հրատարակության երկրորդ հատորը, որի նյութերը և ծանոթագրությունները պատրաստել է գրականագետ Գ. Ստեփանյանը։ Հատորը խմբագրել է Ա. Ինճիկյանը։ Նկարչական ձևավորումը կատարել է նկարիչ Կ. Տիրատուրյանը։ Հատորում Վեռնիկովի է Հ. Պարոնյանի «Ապգային ջոջեր»-ը։ Երկերի երրորդ հատորը լույս կտեսնի հոբելյանի օրերին։

Վաստակավոր գործիչ.— Երևանի Վալերի Բրյուսովի անվան ռուսաց և օտար լեզուների պետական մանկավարժական ինստիտուտում ջերմորեն նշվեց ինստիտուտի դասախոս, արվեստի վաստակավոր գործիչ, գրականագետ

և մանկավարժ Տիգրան Հախումյանի ծննդյան 70 և գրական-մանկավարժական գործունեության 50-ամյակը: Տիգրան Հախումյանը հեղինակ է 14 թատերական ինքնուրույն և շուրջ 90 թարգմանական պիեսների, որոնցից շատ-շատերը տարիներ շարունակ խաղացվել են Անդրկովկասի հայկական թատրոններում: Նա տասնյակ տարիներ շարունակ եղել է ռուսաց գրականության հմուտ դասախոսներից մեկը Երևանի տարբեր բարձրագույն հաստատություններում:

Գրականության և արվեստի թանգարանում.— Երևանի գրականության և արվեստի թանգարանը տարեցտարի հարստանում է նորանոր նյութերով: Արխիվային ու պատմական բազմապիսի նյութեր են ստացվում ինչպես արտասահմանից, այնպես էլ Սովետական Միության տարբեր վայրերից:

Անցյալ տարի թանգարանն ստացավ Դանիել Վարուժանի արխիվը, որը 50 տարի շարունակ խնամքով պահպանվում էր եղերաբախտ բանաստեղծի զավակների մոտ:

Վերջին տարիներին թանգարանն ստացել է սփյուռքահայ գրող մտավորականներ և հասարակական գործիչներ, զ. Մալեպյանի, Սիմանթյանի, Անասիսի, Վ. Շուշանյանի, Զ. Գալենթյանի, Վ. Սվաճյանի արխիվները, մասնակի կամ ամբողջովին: Հայրենի թանգարանը հարստացնելու համար իրենց ջերմ մասնակցություն են բերում սփյուռքահայ մտավորականները և գրական-մշակութային կազմակերպությունները:

Վերջերս թանգարանը Լենինգրադի արևելագիտական ինստիտուտից ստացավ ծովանկարիչ Հովհաննես Ավալովսկու, լեզվագետ Նորայր Բյուզանդացու, Գևորգ Հախվերդյանի, Ռաֆայել Պատկանյանի, Ստեփանոս Նավարյանցի և Հ. Ղևոնդ Ալիշանի ավելի քան 700 խիստ արժեքավոր նամակների միկրոֆիլմերը: Մոսկվայից ստացվել են մի շարք հայ գրողների բազմաթիվ նամակների պատճենները, որոնք պահվում են հայտնի ռուս բանաստեղծ-թարգմանիչ Վալերի Բյուրուովի արխիվում:

Շարլ Ազնավուրը Երևանում.— Մարտի առաջին կեսին Երևան այցելեց ֆրանսահայ հայտնի երգիչ, կոմպոզիտոր և բանաստեղծ Շարլ Ազնավուրը, որը Սովետական Միություն էր հրավիրվել համերգներ տալու:

Երևանում Շարլ Ազնավուրը տվեց երեք համերգ Հայֆիլհարմոնիայի մեծ դահլիճում: Համերգներն անցան բացառիկ հաջողությամբ: Համերգներից մեկը տրվեց հեռուստացույցով:

Երևան ժամանելու հաջորդ օրը, Շարլ Ազնավուրը իր քրոջ և ֆիլհարմոնիայի ղեկավարների ընկերակցությամբ այցելեց Ս. Էջմիածին, դիտեց Մայր Տաճարն ու թանգարանը և ընդունվեց Վազգեն Ա Վեհափառ Հայրապետի կողմից:

Անվանի երգիչը շրջեց Երևանը, եղավ Սևանում, հանդիպում ունեցավ իր ազգականների ու բարեկամների հետ:

Զրույցի ժամանակ Շարլ Ազնավուրը մամուլի աշխատողներին հայտարարեց.

— Ես ուրախ եմ, որ գտնվում եմ Հայաստանում: Այստեղ ես շատ հարապատենք և բարեկամներ ունեմ: Երեկ ես տեսա իմ տատին, որն ապրում է Լենինականում: Ամենից շատ ես սիրում եմ ժողովրդական երգեր: Թեպետ գրում և երգում եմ ֆրանսերեն, սակայն սիրում եմ իմ

ժողովրդին և չեմ կտրում իմ կապերը Հայաստանի հետ: Ես ինձ հետ կտանեմ հայկական երգեր:

Երևանի նոր արվարձանները.— Հայաստանի մայրաքաղաքը շարունակում է ընդարձակել իր սահմանները: Զաղաքի հանրաժանոր արվարձաններից է Աջափնյան, ուր այժմ բնակվում են այնքան մարդիկ, որքան բնակվում էին ամբողջ Երևանում 1922 թվականին: Այս արվարձանը բաղկացած է նորակառույց 10 թաղամասերից: Այս տարի կառուցման աշխատանքներն այստեղ պիտի ավարտվեն ամբողջովին:

Արագորեն աճող արվարձաններից է Նոր Զեյթունը: Այս տարի այս թաղամասում կառուցվելու են 40 000 քառակուսի մետր ընդհանուր բնակելի տարածությամբ բնակարաններ, որոնց մեկ քառորդ մասը հատկացվելու է զաղաքի բարձրագույն ուսումնական հաստատություններին իբրև հանրակացարաններ: Կբացվեն ճաշարաններ, սրճարաններ, խանութներ և մանկապարտեզներ:

Երևանի նոր թաղամասերից մեկն էլ Ծենգավիթն է, ուր այս տարի նախատեսված է կառուցել ավելի քան 20 000 քառակուսի մետր բնակելի տարածությամբ նոր բնակարաններ:

Բոլորովին նոր արվարձան է լինելու այսպես կոչված Ուլթեբեյերը, Երևան—Էջմիածին խճուղու ծախ կողմը, շերամապահական կայանի ետևն ընկնող երեք ամայի բլուրները: Գարնանից այստեղ կսկսվեն շինարարական աշխատանքները: Տարվա ընթացքում նախատեսված է կառուցել շուրջ 40 000 քառակուսի մետր բնակելի տարածություն: Հետագային դա կլինի Երևանի գոլտրիկ թաղամասերից մեկը:

Երևանի պետական համալսարանի նոր շենքը.— Երևանի պետական համալսարանը հիմնվել է 1921 թվականին: Երկար տարիներ այն տեղավորված էր մի քարաշեն երկհարկանի փոքրիկ շենքում, որը նախասովետական Երևանում եղած սակավաթիվ բարեկարգ շենքերից մեկն էր: Հետո այն անճանաչելիորեն վերակառուցվեց, դարձավ չորսհարկանի, ուր սովորում են հիմա ավելի քան 2 500 ուսանողներ:

Սակայն եղածն էլ խիստ անհարմար է և անբավարար: Մի քանի տարի է ինչ Զարենցի փողոցի վրա կառուցվում է համալսարանի նոր շենքը: Այն պիտի արժենա 5 000 000 ռուբլի նոր դրամով: Ծենքը կունենա 10 ֆակուլտետներ, որոնցում սովորելու են 10 000 ուսանողներ, կունենա բարեկարգ լաբորատորիաներ, աշխատասենյակներ, գրադարան-ընթերցարան, գրապահոց, 1 000 տեղանոց հանդիսասրահ, 6 հատ կոնֆերենց-դահլիճներ, թանգարան և այլն:

Ամբողջ շենքի կառուցումը նախատեսվում է ավարտել 1965 թվականի վերջերին: Այս տարի շինարարության կարիքների համար հատկացված էին երեք անգամ ավելի շատ միջոցներ, քան 1963 թվականին:

Հայաստանի կուրորտային հարստությունները.— Հայաստանի գիտությունների ակադեմիայի երկրաբանական գիտությունների ինստիտուտի ավագ գիտական աշխատող, պրոֆ. Ա. Բաղդասարյանը կապմել և հրատարակել է Հայաստանի բնական կուրորտային միջոցների (ռեսուրսների) քարտեզը: Դա մի հետաքրքիր քարտեզ է, որից պարզվում է, որ Հայաստանի սահմաններում գոյություն

ունեն շուրջ 1 000 հանքային ջրերի աղբյուրներ՝ ամենատարբեր բաղադրությամբ և հատկությամբ: Զարտեպի համաձայն կարելի է որոշել ոչ միայն աղբյուրների վայրերը, այլև ծանոթանալ դրանց ջրերի ֆիզիկա-քիմիական և բուժական հատկություններին:

Զարտեպի վրա տրված են նաև Հայաստանի տարբեր գոտիների կլիմայական առանձնահատկությունները: Հեղինակը Հայաստանը բաժանում է 10 տարբեր կլիմայական գոտիների:

Զարտեպի վրա տրված են նաև տեղեկություններ Ստեփանավանի և Սևանի ավազանի ջրջաններում գտնվող տորֆի հանքերի մասին, որը, ըստ հեղինակի, կարող է հաջողությամբ փոխարինել բուժիչ ցեխին:

Արփա—Սևան.—Նախապատրաստական երկար աշխատանքից հետո, անցյալ 1963 թվականի աշնանից սկսվեցին Արփա գետի ջրերը դեպի Սևանի լիճն ուղղելու համար անհրաժեշտ թունելի փորման անմիջական աշխատանքները: Արդեն փորված է մի քանի հարյուր մետր տարածություն: Փորումը կատարվում է Ջերմուկի և Մարտունու կողմերից միաժամանակ: Բացի այդ, Ջերմուկի և Մարտունու միջև ընկած տարածության գրեթե կենտրոնում, Գյուլլիդուլ գյուղի մոտ, փորված են ստորերկրյա անցքեր և թունելի հորատումը կատարվում է միաժամանակ երկու ուղղությամբ՝ դեպի Ջերմուկ և դեպի Մարտունի:

Նախքան թունելի հորատման անցնելը, շինարարները Մարտունու և Ջերմուկի շինարարական տեղամասերում կառուցել են բանվորական կոկիկ ավաններ՝ հարմարություններով, ինչպես նաև երթևեկության ճանապարհներ: Թունելի փորման աշխատանքները լրիվ մեքենայացված են:

Այգիներ ամալի դեբրում.—Հայաստանի ամենամալի, քարքարոտ և անհրապույր վայրն էր Լենինականից մինչև Հոկտեմբերյան ընկած տարածությունը: Տասնյակ հազարավոր հեկտար անջրդի տարածություններ դարերից ի վեր մնացել են անմշակ: Միակ հարստությունն այստեղ հրաբխային տուֆն է, որն այնքան առատորեն սփռված է ամենուր՝ սկսած Արագածի ստորոտներից մինչև Ախուր-

յանի ու Արաքսի ափերը, թե՛ գետնի երեսին և թե՛ գետնի տակ:

Արդեն մի քանի տարի է, ինչ սկսված է այս խամ ու խոպան հողերի յուրացումը: Աներևակալելի համառ աշխատանքի գնով, մեքենաների օգնությամբ հերկվում է խոպանը, հավաքվում են քարերը, պարարտացվում և մշակվում է հողը: Դա հնարավոր դարձավ նախ և առաջ Թալինի ջրանցքի շնորհիվ, որը սկիզբ է առնում Ախուրյանից: Ոռգելի ջրի քանակը ավելացնելու համար, կառուցվում են նաև վիթխարի ջրամբարներ՝ անձրևաջրերն ու ձնհալի ջրերը կուտակելու և խոպան հողերը ոռոգելու համար: Այս միջոցառումների շնորհիվ, 1964—1970 թվականների ընթացքում շատ ավելի բուռն թափով կընթանա այստեղի խոպան հողերի յուրացման գործը:

Առ այժմ այս հողերի վրա հիմնված են մի շարք այգեպտղաբուծական սովխոզներ: Դրանցից մեկն է Կառմարաշենի սովխոզը: Այն ունի 800 հեկտար մշակված խաղողի և տարբեր ծառապտուղների այգի: Այս տարի գցվելու է ևս 100 հեկտար նոր այգի: Մի այդքան տարածություն էլ մաքրված է քարերից ու հերկված եկող տարվա տնկումների համար: Արդեն երկրորդ տարին է, ինչ սովխոզները խաղողի, պտուղների, սեխի, ձմերուկի և բանջարեղենի բերք են ստանում:

Ավտոմատ հարմարանքներ.—Երևանի երկաթուղային կայարանում շուտով դրվելու են մի քանի ավտոմատ սարքեր, որոնք սպասարկելու են ուղևորներին:

Սարքերից մեկը տոմսավաճառի դեր է կատարելու՝ վաճառելու է գնացքի տոմսեր, մի երևույթ, որը խիստ անհրաժեշտ կլինի ամռան ամիսներին, երբ ուղևորների թիվը չափազանց շատ է լինում:

Մեկ ուրիշ սարք լինելու է ավտոմատ տեղեկատու, որի միջոցով կարելի է ստանալ ուլած տեղեկանքը գնացքների մեկնման ժամանակի, ճանապարհաճախի և մեկնելիք քաղաքի մասին: Դրվելու է նաև սարք, որի միջոցով կարելի է պահ տալ ձեռքի ճամբրուկը, պայուսակը կամ այլ իր: Դրա համար պետք է միայն մեքենայի մեջ սահեցնել 15 կոպեկ:

